

ASO LUA, 18 IUNI 2013

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2013.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: E muamua ona ou taia le vai manino ma ou vaisausauina le paia maualuga o lenei taeao fou, aua ou te talitonu o lea ua nofo a tofiga le paia na tofi, le paia na atofa, le paia o le aso ma le Fonousu a Samoa, ae e muai ou sauua le va e pei o le faiva o Leatiogie ma ou afea lauu tuvanu e pei o le fetalaiga i le fale na toese o Aana, aua ua mamalu sauoo le tupua ma le Malae i Tiafau. E muamua ona ou taia ulugalua e pei o le fetalaiga ia Ulufanuasesee aua o lele ua nofoia auoloolo i le paia o le Atua Soifua, o Le e ou le Mana ma le Malosi uma lava, o Le na tofi Samoa ma tofi toa, o le Mataisau o tausamaaga ma le aufolasa. Ona ou manatu lea, ua maioio taiao i ou paia popo Samoa aua ua Alii Tupu le Atua o lo ta Faavae. O Ia ua tatou maua ai pea Ao ma Iu o Malo i le aso.

I lou agaga faaaloalo ma le agaga aloaia ou te ofo alofa atu ai ma faatalofa atu i le paia o le Palemene i lenei taeao fou. E momoli atu le agaga faafetai tele i lau Afioga i le Taitai o le Malo aemaise le paia maualuga o le Kapeneta i ona tulaga faalupe. Le paia maualuga i lea talana atoa i lau Afioga i le Taitai o le Itu Agai, le Sui Taitai ma sui usufono mamalu uma o le Maota Fono, aemaise le paia o Samoa ua potopoto i ona tupu ma ona ee, tamalii ma failauga, faleupolu o tofiga, le paia i Faauluuluga o Matagaluega o lo o vae ma lima i ai le auunaga a Samoa e tua i ai le Malo i ana galuega fai. Ma le agaga faaaloalo ou te faafeiloai atu i lenei taeao fou; malo le soifua manuia, malo le folau, malo le onosai mai i a tatou usugafono i lenei aso.

E le faagalo Afia i si ona vao i le tapuaiga a Samoa. Samoa, o oe o le tapiga o le fale tele e tafea i ai pulu i le vasa, e toa i ai le aupeau o Samoa ma lana Fonousu. O lau faatufugaga ua mafua ai ona faailo lupe o fuifui o manu ua pale nei i Salafa; matou te omai e fai le galuega e lipoi ni manu ma manuia o Samoa mo a taeao. Faafetai tatalo, faafetai tapuai ia te outou o Faafeagaiga Taulagi ma Tamasa o lo o outou tui mai le mulipapaga ma outou tapuaia faiva a lau Palemene. E leai se atoatoa, e leai se agavaa, ae faalagolago i lau tapuaiga mau e manuia ai faiva a lou Palemene i le fonotaga o le a faagasolo.

O lenei la taeao e ofo alofa atu ma faatalofa atu i le paia maualuga o lo tatou Maota. Ia sagai maia ai o le tai. E talitonu ua atoa tino o le tama e pei o ia upu ma tufala le taulafoga i lenei taeao. O le tatou aso fonon lenei e soalaupule ai a tatou polokalame ua uma ona faataatitia. I lou agaga faaaloalo ia viia le Atua ona ua taitai mai lo outou soifua manuia i lenei taeao fou.

Ona i ai lea o le talitonuga, e tele le tatou galuega faagasolo mo lenei vaiaso atoa ma faaauau ai pea i tulaga masani i aso fono faapenei.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoaio Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o le Soloia o le Tulafono o le Faalapotopotoga o Oloa tau Faatoaga 2013.

TUUIINA ATU i lou nei Lima i lenei Aso Gafua 17 o Iuni i le tausaga 2013.

(Sainia): Tui Atua Tupua Tamasese Efi
OLE AO O LE MALO.”

ISI FAASILASILAGA A LE FOFOGA FETALAI

FOFOGA FETALAI: Mo le silafia e lenei Palemene, o lenei taeao ua tatou faatasi ma le paia mauuluga i nisi o alo ma fanau a le atunuu mai Aoga ma Kolisi Mauuluga uma mai Salafai ma itumalo mamalo i Upolu nei. O lea faamoemoe o le amatalia o le vaiaso faalauiloa o matafaioi ma galuega faa-Palemene, o se tasi o galuega ma polokalame atinae i faiga faa-Palemene o lo o faagasolo nei, o lo o taulamua ai le Ofisa o le Fono Aoaio ma le lagolago a le Lala o Polokalame o Atinae a Malo Afaatasi (UNDP), faapea le Malo o Ausetalia ma le Palemene o Tasmania, ae faatupe e le AUSAid ma le Malo o Samoa.

O le agaga ma le faamoemoe ma le manulauti o lenei polokalame ina ia uluulumatafolau ma ia nofo fale ia Satuiamaa ma ilo vea ma iloa taiao i fuafuaga alualu mamao a le Palemene ma le manulauti o tupulaga lalovaoa o Samoa ma le lumanai o Samoa, e tataua ona amatalia ona faalauiloa tu ma aga a le Palemene, aua o tatou nei a o latou taeao.

O le sini autu ia taiala fanau aoga i le faalauiloa o le Palemene ma ana galuega ina ia silafia e tagatanuu o Samoa avanoa e mafai ai ona latou fai se sao faa-Palemene aemaise ai le tele o taimi i mataupu e iloiloaina ai Tulafono ma Lipoti a Komiti e manaomia ai ni fautuaga ma se finagalo o le atunuu.

I le amataga o lenei galuega e momoli ai le agaga faafetai tele i le Minisita mo Aoga, Taaloga ma Aganuu aemaise o le Matagaluega ona o lou talisapaia o lenei aso ma le faamoemoe ma le lagolagosua ina ia tau i manu le faalauiloa, aemaise le manulauti o le Fono Aoaio Faitulafono ina ia silafia e alo ma fanau lalovaoa o le atunuu ma tupulaga fai mai mo le lumanai le taua o galuega faa-Palemene.

O le agaga ma le faamoemoe, e faafeiloai atu ai i le paia ma le mamalu maualuga ua sasao, o se avanoa lelei foi lenei tou te omai ai i le Maota Fono o le atunuu, tou te matau, tutu i le too ma tepa i le ata aua o le Maota lenei, o le faata mo le lumanai. Ia pau ni toa ae toe tutulalai mai ni toa mo le lumanai aua le faaauauina o galuega faatino a le Palemene i ni Taitai lelei ina ia see pea le sa o Samoa i au tafeloa ae le o ni au vili. Ia faamanuia tele le Atua ia te outou o alo ma fanau a lo tatou atunuu i lenei aso ma ia manuia tele a outou sutesuega e pei ona tatou faatasi ai.

TUUNA ATU O PEPA

1. *Na faataatia i luga o le Laulau a Fono e le Fofoga Fetalai le P.P.2013/2014 Nu.12, Lipoti a le Pule ma Suetusi Sili i le Fono Aoaio Faitulafono mo Iulai 2010 – Iuni 2011. (E tusa ai ma le Mataupu 99 o le Faavae o le Malo Tutoatasi o Samoa).*
2. *Na tolaulauina e le Failautusi Pepa nei ua faataatia i luga o le Laulau a Fono. (E tusa ai ma le T.T.48).*
 1. P.P.2013/2014 Nu.13, Lipoti Faaletausaga a le Faalapotopotoga o Mea tau Fale mo le tausaga 2010.
 2. P.P.2013/2014 Nu.14, Faamatalaga o Tala o Tupe a le Pulega o Petipetiga mo le Tausaga Faaiiina 30 Iuni 2012.
 3. P.P.2013/2014 Nu.15, Lipoti Faaletausaga a le Faalapotopotoga o le Malosi Faaletise mo le tausaga 2011/2012.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono. (E tusa ai ma T.T.51(5)).

1. P.P.2013/2014 Nu.16, Lipoti a le Komiti o Tupe Maua ma Tupe Totogi i le Tala Faatatau o Tupe Faaopoopo Lona Lua o Tupe Maua ma Tupe Totogi a le Malo o Samoa mo le Tausaga Faaiiina aso 30 Iuni 2013, P.P.2013/2014 Nu.8.
2. P.P.2013/2014 Nu.17, Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiiina aso 30 Iuni 2014, P.P.2013/2014 Nu.9.

**FAAMATALAGA FAA-MINISITA A LE AFIOGA I LE PALEMIA,
SUSUGA HON TUILAEPFA FATIALOFA LUPESOLIAI AIONO
NEIOTI SAILELE MALIELEGAOI**

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai ma le mamalu o sui usufono o le Fono Aoao Faitulafono, ou te faatalofa atu i lenei taeao fou. E faatalofa atu foi ia te outou o fanau aoga ua mafai ona oo mai i lenei taeao se i outou vaavaai mai ia i matou ma matou vaavaai atu foi ia te outou. O le fautuaga tuusao atu, o e ave, faamalosi ma ia outou fiafia e ave mataupu o le numera – mathematics, physics, chemistry, biology ma le science. O mataupu na e vave maua ai a outou sikolasipi, a o isi mataupu na tou te avea, ia o loa e muamua a’o la outou kirikiti po o le lakapi ina ia maua ai ni tagata taaalo lelei. O mataupu ia e aupito maoae ona moomia e Samoa sa ou tau atua.

Ua ala ona ou vave tau atu mea ia, ona pau lea o le taimi tatou te mafuta ai i lenei taeao aua o le 99% o saunoaga a le Fofoga Fetalai lea na fai nei i le taeao, e matua outou le malamalama ai lava aua o upu faamatai, a o lea ua ou talanoa atu i upu tuusao. Ia aoga ia te outou lo outou omai i le taeao lenei ina ia avatu se fautuaga lelei ina ia outou o e fesili i outou faiaoga ina ia aoao atu mataupu e manuia ai le atunuu mo le agai atu i le lumanai.

E faatalofa atu foi i le paia maualuga o le atunuu o lo o faafogafoga tapuai mai i ona tulaga faalupelupeina. O se taeao fiafia lenei i le maleifua mai ma le alafai mai i faguga lelei o le mamalu o le atunuu, o faguga lelei ma le soifua faafouina faaauau. Aisea? Ona o le taunuuga manuia manumalo o faagatama na taumafai i ai le au a le atunuu, le Manu Samoa na faatoilaloina ai le au malosi a Italia, ae ua maea ai foi ona faatoilaloina i le vaiaso na muamua atu le au a Sikotilani. Ua toe nei o le au a Aferika i Saute o lo o totoe o le a taaalo i le Aso Toonai nei ona maea loa lea o le taamilosaga. Ia talosia ia taaloga o lo o totoe, ia saga faatamaoigaina e le Atua le taleni ma le malosi i le tino o tatou tama fanau ina ia faavaivai ai e mea vaivai mea malolosi ina ia faailoa ai le Mana lilo o le tatou Matai Sili o lo o faavae ai le tatou Malo ma faamoemoe i ai tatou atinae uma lava o lo o fai nei.

O le vaiaso foi na tea nei na manumalo ai foi le isi alii Samoa o Joseph Parker i le faagatama o le faipele na fai i Niu Sila e pei ona faasalalau mai i ata o le TV ae o le faaiuga o le masina nei e faatino ai foi isi tauvaga i le lalolagi i le faagatama o le Lakapi Taitoafitu.

I le alofaiva ai o tatou tama fanau i so o se tausinioga e matua manaomia ai lava feau tusitusia faamalosiua faalototele e siitia atili ai lo latou loto talitonu maumauai i le mau o le Tusi Paia pe a auai le Atua ia te i tatou, o ai se e faasagatau mai. O lau faamalosiua sa molimoli i le Manu Samoa, o le manumalo o latou, o le latou lea sao e fofo ai gasegase ma mafatiaga uma o Samoa i lenei vaiaso. Ua leai ni vevelaga faale ulugalii o toe lipoti i le Matagaluega o Leoleo ua oo mai ia te au. Ua oo lava i nisi o failele sa taliga aso e ola ai, ua pei o ni ufi e tutupu lagona ma ok ai mea uma i le taimi na soosoo ai latou sikoa. O le faanaunautaiga o le taofi, o le a faapena foi ona sologa lelei ai ma taulaumaga o le tatou Tauaofiaga i le aso aua o le fiafia e fanau mai le le faafinauaia.

Ua le namalelaina ua toe ono nei masina ona see ese loa o Samoa mai le lisi o atunuu pito matitiva o le lalolagi ma le latou faatulagaga o i ai Samoa. Ua

tuu nei o se tasi o atunuu ua siitia maualuga le tamaoaiga - middle income level country o se faailo taualoa lea o se taunuuga lelei. O taumafaiga uma lava na faatino e Nofoaiga o Faigamalo ma Palemene uma lava ua tuanai, na togi le maa ma fai sao i le atinae o le tatou Malo Tutoatasi mai lava i le amataga o le aso na Tutoatasi ai le tatou Malo sei tau mai lava i le aso, 51 tausaga o tatou galulue ma galulue pea e le mafai, le mafai ona tuuititia le agaga galuega. Aisea? Aua o lo o tupu pea le faitau aofai o tatou tagata ma tupu ai foi le manao, manao lasi i le soifua faaneionapo ina ia sologa lelei i ona itu uma e leai se mea e mativa ai. O le tiute faifaipea lena o so o se Malo ma Taitai tofofi o lo o nopiai i totonu o le Fono Aoaio Faitulafono ia aua nei galo ia tatou. Ae tasi lava faapogai e faatagi tuia ai fuafuaga o so o se Malo i malo uma o le lagolagi e aofia ai ma Samoa, o le le lava lea o mea e fai ai ana fuafuaga. E oo lava foi i malo tetele o le lalolagi, e leai se malo e mafai ona fai uma nei mea i se tausaga ona o le faapogai lava lea e tasi, e le lava mea e fai ai. O le a la le mea e tatau ona fai? O le a se faiga poto e tatau ona fai e fetuutuunai ai le tele o le manao ma le toatele o tagata o lo o fananau pea ma tupu pea ma le taulia ai o mea e faatino ai le fia fai mea lelei. Na o le tasi pe lava le filifiliga e fai, po o le tele, po o le lapoa, po o le laititi o se atunuu po o se malo, na o le tasi pe, tasi pe lava le mea e tatau ona fai, o le a? O le fai o le filifiliga, fillifili mea aupito moomia, mea taua e tatau ona fai nei loa, ao nisi mea e mafai ona fai mulimuli i nisi tausaga o mulimuli mai e taatia ma faasolosolo malie atu i ai le faasologa pe a maea mea ia e tatau ona fai muamua. O aga na faale-malo, o aga na faale-Palemene, o aga foi na faapisinisi, o aga foi na faaleaiga, o aga foi na faale-ekalesia, fai le mea e mafai i le taimi nei ae tuu isi mea e fai mulimuli. Ae i ai isi faiga e faaoga i ai le faautautaga tatau po o le common sense e mafai ai ona faafeololo ai ni nai mea taua e fai muamua. O a ia mea? O le talosaga lea i isi e tele a latou mea, e aumai ni nai mea e fesoasoani mai ia i tatou ma le lona lua, e tatou te o e saili i faletupe o i ai ni latou tupe tatou te aitalafu ai ae totogi mulimuli - take now pay later.

O mea na o lea foi tatou te faia, a tatou faalagolago tasi i lo tatou lava malosi, o le mea e tupu o le matua agai i luga o le mativa ma le le tagolima. Aisea? Aua o lo o tupu pea tagata aua o Samoa lava ia e tele malo e fia fesoasoani mai ona o lo latou iloa, o lo latou talitonu ma lo latou mautinoa tatou te faaoga tatau a latou fesoasoani. O lona uiga e faaoga sese loa e tatau a latou fesoasoani, leai loa ma se seleni e toe aumai. E faapena foi i tupe nono, e iloa loa e latou e ana tupe o lo o faaoga sese, leai foi ma se tupe e toe mafai ona maua ona o tatou nonogatupe mo atinae eseese mai lava i le amataga o lo o aumai pea, aumai pea i faalapotopotoga tau tupe a le lalolagi na tuu faapitoa e atunuu malolosi o le lalolagi ina ia faamama tului ma tupe totogi ma faaumi taimi e totogi, o iina lea e sau ai pea ma faatonutonu ai tatou nonogatupe.

O le tatou nonogatupe muamua lava e mo atinae eseese, na tatou aumaia mai le Faletupe o Asia, o le Faletupe lea na faatuina i le tausaga 1966, fa tausaga talu ona tutoatasi Samoa. E leai lava se isi atumotu o le Pasefika ua tutoatasi. O lona uiga na o Samoa na ave ma sui faavae o le Faletupe lena o Asia. Na aumaia ai lea o le tupe mai le Faletupe o Asia e fai ai le malae vaalele i le tausaga 1971. O le nonogatupe lena e na o le \$232 le tului lea e avatu uma lava i totonu o le Tala o le Tupe lena e tou te tilotilo i ai, ina ia faatino ai le agaga o le good governance faigamalo malamalama, leai se mea e natia, e

avatu uma i luma tou te vaavaai i ai. Ae na o le \$31,000 le tupe e totogi i le tausaga ae faitau miliona ma miliona tala na nono mai ai mo le fausia o le malae vaalele. E le fausia se malae vaalele ini nai \$100,000 e fausia i miliona ma miliona tala. Silasila i le mea matou te fai atu ai pea lava pea, soia ia le popole vale outou ia e tutu soo atu i le TV ma fai mai ua oti le atunuu i le tele o aitalafu.

I le tausaga faaletupe lea o le a soosoo nei, e \$45miliona e alu i le tausaga e totogi ai tatou nonogatupe uma lava ae \$760miliona e maua mai i tatou lava alagatupe masani ma meaalofa e silia ma le \$200miliona lea e aumai e malo mo tatou o mea maua fua e faaopoopo i tatou alagatupe masani. A toese ai la le \$45miliona e totogi ai nonogatupe ia ona totoe ai lea o le \$715miliona e fai ai isi mea. Silasila, ao le tou tutu atu i le TV ma tau atu i le atunuu ua matua saisaitia le Malo, ia lena ua tou maua mai e lei taitai le malosi tatou te o ai e nono mai tupe e fesoasoani i lo tatou le tagolima. O tatou nonogatupe foi o fai nei, e fa i le lima tausaga o la e lava e faasolosolo le faatinoina o atinae, pei o le falemai, ua fia nei tausaga o fai? Ao la e lava e lei uma. O lea o le a uma le isi vaega ao lea e faasolosolo le isi vaega o le atinae tele ae faapena ona faasolosolo mai ae le faapea e aumai uma i le tausaga e tasi. E tala mai faasolosolo. O nonogatupe o lo o outou vaai o lo o avatu i le Tala o le Tupe, o atinae o lo o faaauau e le o ni nonogatupe fou o fai ao nonogatupe tuai e lei uma ao la e lava e faasolo mai ma e leai se mea tele faapenei e fai ini nai masina, e tele tausaga o faagasolo. Ae ua ou tei i lou tilotilo atu i le TV ua lauga mai isi faipule o le Maota lena ma faapea mai, “a faaopoopo la i ai ma nonogatupe ia e i ai nei ua piliona le nonogatupe”. E lei oo i se piliona, sei silasila i le umi ona avatu pepa ia te outou ao lea lava tou te le malamalama. A o lea foi e i ai le tou avanoa e valaau ai le Matagaluega o Tupe e o atu e faamalamalama ao lo o ou talanoa foi i le Faauluuluga o le Matagaluega o Tupe o la e faamalamalama. Ua ou le iloa masalo e sili ia ona o atu e faa Peretania atu pe faa Saina atu ia te outou.

Lau Afioga i le Fofoga Fetalai, e mafai ona e logoa le o lo o tulai mai e sa ona tulai mai.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai o le mea e fia faamalamalama

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: O le mea lava lena lau Afioga i le Fofoga Fetalai....

FOFOGA FETALAI: Malie lau Afioga i le Taitai o le Itu Agai o le Saunoaga Faa-Minisita lea e fai lau Afioga i le Taitai o le Itu Agai, lava papale ma lava mai le onosai, sei usi le saunoaga faa-Minisita, ona lafo atu foi lea i le tou itulagi e saunoa ma faamalamalama le mataupu. Ao le saunoaga faa-Minisita, Tulafono Tumau e leai se felafolafoaiga leai se mea e faamalamalama. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Faamalamalama i ai le mea lea, e te tulai loa e te saunoa faa-Minisita, e sa ona toe faalavelave, ae o le tulai mai ae sa i lalo o lau Kapeneta, o le mea lea o lea ou te le fiafia ai. O le mea taua, e le i taitai

ona oo i ai i lina fainumera, e lelei ona fai ma toe fesili ma ii le Kapeneta manu o loo soifua pea alii Minisita e maua atu ai le faamalamalamaga mo outou ae le o le pa ma oso.

E iai le tusi oti a le EFKS e i ai le solo na aumai e faatatau i le mea lea, e te soona oso loa e pau loa i le omo. A e alu e nono mai sau \$1,000.00 mai soo se faletupe e fai ai sau toaga kapisi e fafai loa lau toaga kapisi ona e alu lea e totogi le loan, e toe totogi lava e kapisi ia le loan. E faapena foi nogatupe a le Malo, a fai o se nogatupe e 100 miliona tala e fai ai se eletise poo se auala e totogi lava e le eletise ia poo le auala lina nogatupe. Faapefea ona fai, o atinae eletise o atinae autu ia e fai e le Malo, lea e faalupe i le gagana Peretania o le infrastructure development, o le a le mea e faaigoa ai o le infrastructure development, mafua ona faaigoa faapena ona o atinae autu ia e taula uma i ai isi mau atinae a tagata fai pisinisi, atinae fou o tagata taitoatasi, a ola la pisinisi maua tupe maua ona totogi lea o latou lafoga mai le Malo, lafoga na e build up ai ma tele ai tupe a le Malo e maua e toe totogi ai nogatupe ia.

E pei ona ou faamalamalama atu o lona uiga e toe totogi lava e le atinae ia le loan na faatupe ai, faigofie o le matua faigofie o nei mea. E le o le tele foi o le loan e taua ao le mafai ona togitogi e le malo tupe totogi i tausaga taitasi, o le mea lina e taua, e le mafai e le Malo ona fai uma atinae moomia i se atunuu, o le taua lina o le i ai o le Private Sector o le au faipisinisi latou o loo faaoga lelei avanoa o atinae autu o loo faatamua ma o loo tausolomua ai le Malo ona fai, e faaosofia ai i latou o loo taumafai poo fuafua e fai ni pisinisi poo ni atinae fou. O le mafuaaga lina ua mafua ai ona fai e le Malo fesoasoani mo le Private Sector i latou o faia atinae e lagolago mai i le pitolaau a le tatou Malo. E pei o aoga a Ekalesia, lea e fesoasoani mai ai Ekalesia i le galuega tele o le faaogaina o tama fanau a Samoa. Lea foi ua toe faaopoopo i ai le isi miliona tala e le tatou Malo e siitia ai le vaegatupe mai le 5 i le 6 miliona tala e fesoasoani ai i ekalesia ma latou o aoga o i tua atu ma le Malo. Faapea foi ona fausia uafu i Savaii, e pei o fesoasoani e ave i faletalimalo ona lafo lea ia i latou, e o e faaoga e le faapea e toe alu atu le Malo e fai latou galuega e tataua ona fai ae na ona momoe ma selesele, e le faapena ona faia le mea. E fau le uafu e le Malo, o le faaopoopoga lea na fai e le Malo i tai e 60 miliona tala na fai ai, ona lafo lea i kamupani fai vaa e o latou e aumai latou vaa e aumai e taula i le uafu ae le toe alu se malo e aumai ni vaa, e faapena foi i Savaii e fau le uafu e le Malo ona lafo lea i le au faipisinisi e o e aumai o latou vaa lea sa i ai foi vaa na taula ai i Savaii. Nei pei o loo mafuli atu i meli o loo faia le galuega lina i le taimi nei, ae le toe o le Malo e toe talau mai ni vaa o mea na a le au faipisinisi e fai. E fau le auala ona lafo lea i tagata e o ifo e faaoga le auala ae le o le toe o atu o le malo e o mai e savavali i luga o le auala ma feoai a le feoai o le a ave outou i le falepuipui.

E faapena foi i aoga faapena foi i faletalimalo, fia piliona ua faaalu e le Malo e fesoasoani ai i le atinae lenei aisea ona o le atinae e pito sili atu ona toatele tama fanau a le atunuu lea e galulue i totonu o le faletalimalo. E fai la e le Malo le isi vaega ae o latou e fai le isi vaega lea tuu i lalo a latou tau ia sili atu ona taugofie nai lo Fiti. Pau na o o le mea e tataua ona latou faia, ae o le mea lea ua ou vaai atu ua manao foi e toe o atu le Malo e toe fai isi mea ma avatu tupe i o latou lima latou te faaogaina ae o la na ona nofonofo e le faapena ona faia ni mea, e le toe alu atu le Malo e faia a latou galuega.

Lau Afioga i le Fofoga Fetalai, o le tatou tiute i totonu o le Palemene lenei o le faatupu manatu ia i latou e o e galulue, faatino le latou foi pitolaau ae le o le tausolomua ia i tatou i totonu o le Palemene lenei ona faatupu ia tatou lauga e fai le ola faalagolago lauga e faapea ane e tatau ona fai fua lea mea ma lea mea, ave fua tupe e tufa ma aua nei sue tupe le malo i le fai o ni lafoga. Ae o le a faatupe i ni a mea ia tou te fai mai ai e fai, sa lelei i aso la ao fua mai laau fua mai i tupe ae e le toe tupu le mea lena e fiu e toe o atu laulaau ua le toe talia e se isi.

O le taimi lenei o le taimi ia tausolomua ia i tatou i totonu o le Maota lenei ona faamalamalama ma faatupu le lotu galue ae aua le tausolomua tatou ona faatupu le ola faalagolago. Aua foi tou te seetia i tamaiti ia e o mai ou te le iloa pe na oo i le Form 2. Lele o mai ma faatupu tala ia te outou ma tou sese ai, lea e faaigoa o le au tusitala. A outou vaavaai i nei tamaiti ma nei teineiti o le tino laiti ia ae le o le o mai a ma latou televise tou tutu i luma ma faasee outou e nei tamaiti.

Lau Afioga i le Fofoga Fetalai o le tulaga lena ia i tatou, aua foi nei galo ia i tatou e atamamai tele le tatou atunuu, e faitau mai lauga faaoloataua tatou te iloa uma a faaoloataua ma afai ae tatau liliu lea, tatou liliu e fai le faaoloataua, ona ou matua popole ai lea, matua ou popole lava, ou te alofa ia te outou i lena itu o le Itu Agai ona o atalii o atalii o atalii o faaoloataua nei faaoloataua na, o le mea lea tuu ia na mea o le faaoloataua e le lelei mo le tatou atunuu. O Malo e magafagafa e saili ma saili latou e i ai feleni ma isi atunuu e faatosina mai i totonu e fai ai a latou atinae i totonu o latou atunuu, maua ai ma galuega a fanau aoga, o le isi lea mea ia faataua e tatou, fia selau ma selau o tatou fanau e nonofo mai ma aoga, faapefea ona maua ni latou galuega, o mea ia e vave ai ona maua ni galuega e faigaluega ai o le tosina mai o tagata i fafo e maua ai tupe e atinae ai le atunuu lenei.

O le faiga lea o la e fai e Niusila fai e Ausetalia fai e Saina fai e Iapani fai e Siamani, e oo lava ia Amerika, ao Amerika o le atunuu mauoloa ae o la foi latou te faatosina atu tagata e i ai tupe e o atu i totonu o Amerika ma atunuu Arapi o loo tafe ai le suasusu ma le meli, o lo o tafe ai le suauu. Ai tatou te faapea e tele tupe a atunuu nei ona latou le faia lea o le faiga lea. O le afe ma afe kamupani Toyota kamupani Sapani o la e i totonu o Amerika, ua mafai ona toso atu e Amerika i totonu o Amerika, ao la foi e i ai kamupani Amerika i totonu o Iapani, o le pisinisi a Iapani o loo i totonu o Samoa na o le tasi pe lava o le Yazaki, anoano pisinisi taavale o le afi foi lele o le Ford a Amerika la foi o lo o i totonu o Siamani. Ou te iloa mea na i le taimi sa ou i ai i Europa sa ou nofo ai ma galue i Europa, fealuai solo ai ma ou matamata ma ou faapea ifo, aisea ua tele ai pisinisi ma taavale afi a Amerika iinei ae o lea foi e tele taavale a Siamani latou.

O lea ou te talanoa atu na o le Yazaki lava se pisinisi tele ua mafai ona tatou aumaia i Samoa nei, o le mea moni tatou te le toe maua se isi pisinisi faapea, o le pisinisi ua mao mai iinei ua leva ona fia o ese, ae i ai nai a tatou foi faatosina o lea e fai i le Yazaki, o lona uiga vagana ni faletalimalo, na o faletalimalo e mafai ai ona tatou faatosina mai i ni pisinisi mai fafo e o mai iinei ma maua ai ni galuega a tatou fanau le afe ma afe o nonofo mai ma aoga o loo taumafai e fia maua galuega.

O le sui usufono lava la e tausolomua ona lauga e tetee atu i taumafaiga nei a le Malo e faatosina mai ai tupe a atunuu i fafo e teu faafaigaluega iinei, o lona uiga, o ia lena ua nofo ma faasala fanau a Samoa ia aua ne i maua ni a

latou galuega. O le mea lena tatou te mafaufau loloto i ai po o le a le aafiaga o le atunuu lenei i a outou saunoaga e fai.

O lea foi la o le a ou matau atu pe a oo nei ina tatou lauga i le Tala Faatatau o le Tupe lea, o le a matua matau lelei. O lo o faafogafoga mai le atunuu, ia matau mai outou sui usufono o lo o tete e faatosina nei o pisinisi mai fafo o le a maua ai ni galuega a outou fanau, a oo i le faiga palota lea, ua le aoga lena sui usufono ona toe aumai i totonu o le Maota.

Lau Afioga i le Fofoga Fetalai ma le mamalu o le Maota, e leai se Malo o nei malo tetele na ou taua e vaavaai po o le a le lanu o tagata faipisinisi ia e omai, e vaavaai i mata pe lapotopoto pe uumi pe pii, e le vaai i ai i foliga o tagata ma o latou lanu, pe saina, pe paepae pe uliuli, pe lanumoana. Na pau le mea e vaai i ai, o le lanu o le tupe e atinae ai o latou tamaoiga ma maua ai galuega mo a latou fanau ma maua ai galuega mo le tóatele na o le nofonofu i aiga ae le o e faigaluega. O le mea lena e tatau ona tatou faia, so o se Malo ma so o se Palemene, e tatau ona latou faatau faiga nei faatosina e faatosina mai ai atinae tetele mai fafo e faatu i Samoa nei. A o le a le mea lea e tupu i Samoa? E tau mai loa o le faipisinisi Saina lea na vaai o fealualuai i le aualatele i Apia, alalaga loa, 'Auoi tafefe! o le Saina foi o le a latou ave Samoa.' Ua matua matautia nei manatu. Ou te le iloa po o fea e sau ai nei manatu, ae amata atu i totonu o le Maota lenei. O le Maota lenei e amata atu ai uiga ia, nei i le taimi lenei, ua agai uma Malo e fia maua se avanoa e o e ave a latou oloa i Saina ma le Malo o Saina. O le atunuu lea e pito tele le maketi i le lalolagi ona e piliona faselau miliona tagata.

A tatou talanoa i le upu lea o le maketi, o le maketi o le mea e fetau i tagata e tóatele, o nisi e i ai a latou mea e faatau atu, a o nisi e omai e faatau mai a latou mea. O lona uiga a tatou talanoa i le upu maketi, ua tatou talanoa i tagata e tatau ona tausami, e tatau ona aai, moomia meaai, o tagata e tatau ona feinu e moomia ai faguvai e faatau i ai. O tagata e moomia laei e oofu ai. O le ala lena o le fia faauo uma o atunuu o le lalolagi ia Saina. E leai ma se Malo na moemiti o le a tulai mai Saina o se atunuu komunisi e avea ma taitai na te taitaia le lalolagi lenei i le tulaga o le malosi o pisinisi.

O lea ua tatou faalogo po o le tausaga fou ua numera tasi loa Saina ae numera 2 Amerika. O le mea lena sa le moemiti i ai le lalolagi ona o le vaai mauualalo i faigamalo faa-komunisi. Ua leva ona faauo i ai Niu Sila ia Saina aua e uma i ai ana pata ma ana susu ma ana lau mamoe lololo, le mamoe a Niu Sila lea e aumai e mamai ai tatou, e le tofu tagata. E tutusa uma le aufaipisinisi mai fafo i a tatou faiga faavaega.

O lena sa faamanino atu e le Sui Palemia i le po talaatu anapo, ua leva ona taoto a tatou faiga faavae e lauiliu ai talosaga a lea kamupani ma lea kamupani e ulufale mai i totonu o Samoa. E suesue muamua po o le Saina po o le papalagi po o le Initia, Initia mumu po o le Initia uliuli, e matua suesue muamua e tatou tagata, e ana komiti o experts a latou foi tomai na aoaoina ai faapitoa latou te vaai mea ia, po o ni tagata e faatuatua. Pe tausaga pe lua tausaga pe tolu tausaga pe fa tausaga o faatalatalanoaga i itu eseese uma o a latou o le faatoa fai lea o se faaiuga. E le faatopelaua ona fai.

O lona uiga, e umi lava le taimi o fai faatalanoaga, ae le o le faatoa taunuu mai loa o ni tagata ua amata ona vaai i le taulaga o ni Saina, e omai e fia saili, e fia vaavaai pe i ai se mea aoga o i ai i totonu o Samoa e ono omai e atiae ai Samoa. A o le mea lea ua tupu, e ta te tei ua amata masaa solo mai lapataiga, lapatai mai lea, lapatai mai lea e faapei ua uma ona fai se iuga. E

tolu i le fa tausaga o lea lava e fai faatalanoaga. Po o tau manatua le Taumeasina, na fai ai le Tulafono iinei i le Palemene e fai ni faatosina faapitoa. Ia lale la faatoa amata, ae na fai i le 1970. A 1970, 1980, 1990, lea ua tatou oo mai i le 2013, ua ova i le 43 tausaga. Ua ova i le 43 tausaga talu ona tatou talanoaina na mea, a o lea faatoa maua le kamupani e faatinoa le fuafuaga lea. Masalo o outou lea talavou, o la e tou te kindergarden i le taimi lea na faatalanoa ai le mea lea. A o le mea lea ua poto, o le sau o le poto ua ese, sau le pepa. Oka, oka, oka, lafo mai pea le galuega i le Malo o lea lava e i ai Mose ma le Au Perofeta. A o lea ua amata ona sau lapataiga mai lea ma lea e foliga mai ua fai se iuga ae aliali ai i ina le faavasivasi. O le upu a le poto, 'e sili ona gugu nai lo le matala mai ona iloa tele ai lea o le lapoa o lota faaletonu.' E le i faatoa fai nei ananafi faiga faavae a le tatou Malo e puipuia ai le Malo mai so o se ituaiga mala. Afai o se fale e fia fau, e i ai aiaiga faa-inisinia e fai fuafua i ai le ata, o aiaiga ua faataoto atu e le ona le fale ona faatoa tusi ai lea o se ata. E i ai se galuega mo le fausia o se fale tele o le Malo.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai....

FOFOGA FETALAI: Malie lau Afioga i le Sui Taitai.

Afioga Hon Aeau Peniamina Leavaiseeta: Ou te tulai atu ma le ava e tatau ai, o le tuliloaina o le tulaga mamalu o le Palemene.

FOFOGA FETALAI: O lea ua maua e le Fofoga Fetalai lau Afioga i le Sui Taitai. Malie lau Afioga i le Sui Taitai o le Itu Agai, o lea ua uma ona ou fai atua le faaiuga muamua, ia taatia pea le saunoaga a le Afioga i le Palemia, a usi, ona folasia lea o le lafo talanoa i se taimi le mataupu. Ae faamalie atu o lo o i ai a tatou tulafono faatonutonu ma Tulafono Tumau e faafoefoe ai le tatou Fono. Tulai mai lau Afioga i le Palemia e faaauau le saunoaga.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga fetalai, ou te faafetai i le Atua na ou maua mai nofoaiga a toeaia e le i tumalo i totonu o le Maota lenei. Lau Afioga i le Fofoga Fetalai, ou te fautuaina le na tutulai mai e afio e faitau taualumaga o Fonotaga i aso ua tuanai, ona outou iloa ai lea o le maoae o felafolafoaiga sa fai ma upu sa fai ai i le taimi lena. Tatou te le i oo i le ooooga o mea.

O le mea lea ua tupu, na ona tau agiga atu lava o lea fasilaupepa tulai mai lea ua a ma a. Ou te fautuaina outou nei e i ai manatu faapea, e tele le tou poto masani pe a outou o e toe tilotilo i felafolafoaiga sa fai ona outou iloa ai lea o ooooga o upu na fai, i le lauiluina o taofi, o upu na fanau mai ai upu nei, e le milimilia faauu upu o le Palemene lenei. A oo loa ina talanoa mataupu e faalagolago i ai le manuia o Samoa, e o o lava i ooooga. Lau Afioga i le Fofoga Fetalai, o le fautuaga lena i le sui usufono na tulai mai nei. E le faatoa faia faiga faavae a le tatou Malo e puipui ai le Malo. E leai se galuega o le fausia o se fausia o se faletele o le Malo e leai se ata, e tatau ona tausia....

FOFOGA FETALAI: Malie lau Afioga i le Sui Taitai, e ava tele atu i le tatou va nonofo ma taualumaga o le tatou Fono. O lo o i ai pea lo outou avanoa, malie lau Afioga i le Palemia – o lo o i ai lo outou avanoa i le lumanai, ona avatu pea lea o le avanoa e taausi ai o outou finagalo ma lagona. A o le taimi lenei, ou te faamalulu atu o lo o tatou i luga o le Saunoaga Faaminisita, ma ua uma ona taoto aulape o ia tulaga ma le tatou Tulafono Tumau. O le mea lea ou te faamalulu atu ai le Sui Taitai o le Itu Agai, ua fai le Faaiuga a le Fofoga Fetalai. Ua uma foi ona ou faamalulu i le Afioga i le Taitai o le Itu Agai, o le a tatou o ai i lea, o lena e limataitaiina ai le tatou Fono. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga ua fai lava si ou faanoano aemaise o se sui usufono sa saofai i luga o le Nofoa o le Fofoga Fetalai. O lona uiga o le tausaga atoa sa saofai ai i luga o le Nofoa o le Fofoga Fetalai i le 1988 i le 1990, e matua le malamalama i mea ia, e maoae le solitulafono.

Afioga Hon Aeau Peniamina Leavaiseeta: Lau Afioga i le Fofoga Fetalai, e lea mafai ona ou tuua le mataupu lea. Na o le tasi lava sina fuaiupu lea.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: E toe tulai mai loa le sui usufono, ona ou faatu atu lea o le lafo e ave i fafo.

Afioga Hon Aeau Peniamina Leavaiseeta: Leaga e faavalevlea le mea lea e fai.

FOFOGA FETALAI: O le ala lea le Sui Taitai o le Itu Agai, malie mai. O le agaga lena sa ou mau iumaea ai ma ou taotaoama i ou paia ma ou mamalu. O le agaga lena o le taumafai atu, ia outou finagalo malilie.

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama, leaga o la e ua agai mai saunoaga a le Palemia.

FOFOGA FETALAI: Malie lau Afioga i le Taitai o le Itu Agai, tau lauama tootoo le tatou Fonotaga i lenei taeao. Silasila foi o lea ua uma ona faataatia le alafua o le tatou Fonotaga. O le taimi lenei o le saunoaga faamalamalama Faa-Minisita, ma e leai se felafolafoaiga, leai nisi o fuafuaga e pei ona outou silafia i tatou mea masani. A maea le faamalamalama a le Malo ua manino ma malamalama a le latou alafua o le aso, ia ona lafo atu foi lea e fai lo outou finagalo.

A o le taimi lenei, ou te faamalulu atu, ia malu ave i fale lo outou finagalo, ne i mea ua outou pea mai, a o lea e tau tata i le moa o le ala e faaauau le saunoaga faamalamalama a le tatou Malo.

Ia tulai mai lau Afioga i le Palemia e faaiu mai le saunoaga.

Susuga Hon TUILAEPFA SAILELE FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o lena, e faamalulu atu foi ai ona o le tiga o le mea moni. E leai se galuega e faia o le fausia o se fale tele o le Malo e leai se ata. E tatau ona

tusia se ata e se tusi ata ua pasi atoatoa. E leai foi se tusi ata e le totogina, e totogi uma lava.

O le profession lea o se profession e taugata tele. A uma ona tusia le ata e tatau ona toe siaki ona fetuunai lea po o.... aua e i ai manatu e tutupu pe a uma ona tulai mai lea o le ata ona toe silasila lea o le ana le ata pe talafeagai, pe le talafeagai ona toe tusi lea. E leai lava se ata e aumai e atoatoa, a aumai e le atoatoa ona toe fetuunai lea. A vaai atu la le e ana le fale e le fetau e toe faatonu lea o le ata e toe fai. E le faatopelauina se galuega e faitau miliona, e le faatopelauina. A faapea o se fale e fau i fuafua, fau ma gatae, ae, e tasi lava le aso e mafai ona fai ai, ao galuega nei o galuega e faitau miliona.

Lau Afioga i le Fofoga Fetalai, o uiga na e tupu pe a faatopelau se galuega tele. O le fai mea palafu, faapena le auala o lo o fai ai le maketi i Fugalei, o lo o fai i le atoatoa ma le faaeteete leai se mea e popole ai fua po o afea e maea ai, la le e fau le mau maketi. O Apia o le matua tele lava o maketi la e i ai i totonu o le taulaga ma lumafale o aiga i le tolu po o le fa maila faatafafa o Apia, o le matua tele o maketi la e i ai. O lo o faatau ai mea a aiga. E mai lava i felafolafoaiga i totonu o le Palemene lenei lau Afioga i le Fofoga Fetalai, mai le tausaga 1982 ina ua faatoa tulai mai le Vaega lenei e Puipuia Aia Tatau i le foe o le Sa o Samoa, o lo o solisoli muliaao pea le Vaega lenei i se faaiuga lelei na faavae mai i lona taimi e faafaigofie ai ona malamalama gofie mataupu i le faaoga o le gagana o aso uma ma le vave faasao o se mataupu o lo o lauiliu i luga. O le mau maumaututu i le taimi sao e faasao ai se mea o piotu, o le taimi e aasa ai ma o taimi foi e faasao ai ni mea faaletonu o le taimi lea e fai felafolafoaiga.

O le taua o le itu lea i le faafogaga mai a le mamalu o le atunuu ona e lafo loa se tuuaiga matuia i totonu o le Maota lenei i se sui usufono o lenei Itu la le e popomanoo ma se isi tamaitai, ae le faasaoa i le taimi lava lea ae faatali sei oo i le taimi e tali atu ai Minisita i le faaiuga o lafolafoga o le talanoaga o le Tala o le Tupe ao la le e faafogafoga mai le atunuu, o le a le latou manatu ina ua faafogafoga mai i le leai o se tali a le Malo i se upu e faasao ai?

E tasi lava le manatu o lona uiga ua leai se upu ona e sao. O le a lava la se faafogafoga mai a le atunuu pei ua tau pao papa le matou tutulai atu, tutulai atu soo e faaali se manatu e faasao ai se mataupu e le o sao. O mataupu o le a lagalaga mai i le tatou felafolafoaiga lenei o le Tala o le Tupe o le a le tuufauina e alu loa.

E faamalulu atu ai e tasi lava le agaga o le faiga faavae a le Vaega lenei mai lava i le amataga ia malamalama le matou pitolaau. E le o se mea leaga foi po o se solitulafono le faamalamalama o se mea aua le faafogafoga mai a le atunuu.

Lau Afioga i le Fofoga Fetalai, o nai motugaafa puupuu ma le saasaa lona a au nei o le Taitai o le Malo e tomua ai le fefaaliaiga o taofi i le Tala Autu o le Tupe. Soifua ma ia manuia le tatou Maota.

Afioga Hon Palusalua Faapo II: Lau Afioga i le Fofoga Fetalai....

Afioga Hon TUISUGALETAUA SOFARA AVEAU (Minisita mo Fesootaiga ma Faamatalaga Faatekonolosi): Lau Afioga i le Fofoga Fetalai ou te faatu le lafo.

FOFOGA FETALAI: Malie le Taitai o le Itu Agai ona o lea ua faatu mai le lafo, sei tuu atu le avanoa i le Minisita mo Fesootaiga ma Faamatalaga Tekonolosi.

Afioga Hon TUISUGALETAUA SOFARA AVEAU: Faafetai i lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia faataatia le Faamatalaga Faa-Minisita a le Afioga i le Palemia i luga o le Laulau-a-Fono ae le talanoaina.*

Ma le faaaloalo.

Faaluaina e le Taitai o le Itu Agai.

FOFOGA FETALAI: O le a tuu atu le avanoa i le Taitai o le Itu Agai, tulai mai.

Afioga Hon Palusalue Faapo II: Lau Afioga i le Fofoga Fetalai, ua ou tulai atu ma le faaaloalo ua ou faaluaina le lafo ma e fia malamalama foi la i lau maitau i le Paeaiga lenei o le lima ai lenei o Faamatalaga Faa-Minisita a le Afioga i le Palemia.

18 IUNI 2013

Faamatalaga Faa-Minisita a le Afioga i le Palemia, Susuga Hon Tuilaepa Fatialofa Lupesoliai Aiono Neioti Sailele Malielegaoi

Ae leai ma se mea faataoto mai i le faagasologa o le tatou fononao saunoaga faapenei e tatau lava ona faataatia lau Afioga i le Fofoga Fetalai ona e matuia tuuaiga ia e aumai ai i le Itu lenei.

O lou tulai atu lea ma le faaalolo e faalua le lafo.

FOFOGA FETALAI: Malie lau Afioga i le Taitai o le Itu Agai o lea ua faatuina mai le lafo e le Afioga i le Minisita mo Fesootaiga ma Faamatalaga Faatekonolosi ma ua faaluaina e lau Afioga i le Taitai o le Itu Agai ina ia faataatia le Faamatalaga Faa-Minisita a le Afioga i le Palemia i lenei taeao ina ia tuuina mai i le Maota Fono i se fonotaga o lumanai ona soalaupuleina ai lea pei o mea masani.

Sei tulai mai le sui usufono mo Falealupo.

Afioga Hon Aeau Peniamina Leavaiseeta: Lau Afioga i le Fofoga Fetalai faafetai tele mo le avanoa. O lea ua ou tulai atu lau Afioga i le Fofoga Fetalai nei faitauina ou te le mafaufau ao se mea e fia faamalamalama i le saunoaga a le Afioga i le Palemia ae na o le pau lava le mea na ou fia tuliloaina lau Afioga, ona ua umi tele ae fia tuliloaina tulaga mamalu faa-Palemene.

Silasila foi lau Afioga o le tatou Tulafono Tumau leaga e taua tele le mea lea it's a privilege o le avanoa e ana gata, e maua gata, nao Minisita e maua ae i ai la ona aiaiga, o ona aiaiga e te saunoa i se faaiuga taua a le Malo o fai. Ao le lauga lea na fai nei ua alu ai le tatou itula atoa, o le lauga faalauaitete o lona uiga e le fetau, e le fetau, e sese.

O le mea lena ua ou fai atu ai leaga o le take advantage e Minisita uma ituaiga mea faapea.

FOFOGA FETALAI: O lea ua ou maua lou finagalo. O lea e taumafai e faapupula atu le tulaga lea le sui usufono mo Falealupo. O avanoa e ave i le Malo i le tali mai lena a le Malo i mataupu na laga.

Sei tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E mafai lava ona ou fesoasoani atu ae lei faia lau faaiuga. Ua faatolu ona solitulafono le sui usufono lea ma o se solitulafono le mafaufau. O lea foi e tulai mai o lau faalogo atu pei e faasuaava, afai e te faasuaava aua e te toe sau i le fonu ae sei e manino aua o le mea lava ou te maitauina e te faasuaava loa e toe foi i tua.

Afioga Hon Aeau Peniamina Levaiseeta: Aua e te le mafaufau faapea, aua le faatalaula leaga ou te le ula ini mea ou te iloa e sa, ou te le faia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le tulaga lena lea ou te tulai atu ai e leai se mea o tusia i lalo o tatou Tulafono Tumau e faamuta ai le taimi, leai se mea. O fea e aumai ai au tulafono? O le a e agai i mea faigata pe na o mea faigofie e te le o malamalama ai. O lou tu sasae ane lava i luga ae le talafeagai, faapefea la ona fai? Lau Afioga i le Fofoga Fetalai, o le mea lena lea ua ou tulai atu ai ma lou agaga faaaloalo.

FOFOGA FETALAI: Ou te manatu ua malamalama le mataupu i lau Afioga i le Palemia. Malie lau Afioga i le sui usufono mo Falealupo, e ava tele atu i lena Itu o le Maota.

Afioga Hon Palusalua Faapo II: Lau Afioga i le Fofoga Fetalai ma le faaaloalo lava leaga e matuia tuuaiga ia e aumai e le Palemia i le sui usufono mo Falealupo ina ia aveese ma faamaumauga leaga o le taeao, leai se isi e inu i se taeao sau ai se fonu o la e faalogologo mai le atunuu.

FOFOGA FETALAI: O upu lava e felavasai, e le o ni upu fou o lea lava e maua e le atunuu ma le tapuaiga a le Maota e leai se isi o ona i le taeao. Ae toa mai le tai, o lena o le a louloua le mea e lei amataina le tatou fonu ma talanoaina le tatou Tala o le Tupe. Na o le pau lava le mea lea e lafo atu i le Maota ia outou finagalo malilie taatia mai pea le galuega o lea e faasoaso atu i tatou Tulafono Tumau mo le silafia e le faatapulaaina tulaga o saunoaga faa-minisita ma e le maitaulia foi pe fia, pe selau lava saunoag faa-minisita mai lea taimi i lea taimi e fai lava leaga ua uma ona faatulagaina i tatou Tulafono Tumau e saunoa ai le Malo i mataupu e fia faamalamalama. O lea ua faatu le lafo e le Afioga i le Minisita mo Fesootaiga, faalua e lau Afioga i le Taitai o le Itu Agai ave lea i uta i se taimi ma se malama ona oo lea i ai o le faautautaga.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2012/2013 MA LE TULAFONO TAU FAAOFI O
LE FAATATAUINA O TUPE 2013/2014 - faitauga faalua**

FOFOGA FETALAI: E i ai le faamoemoe o le a tauaveina faatasi felafolafoaiga o le faitauga faalua o Tulafono Tau Faaofi o le Faatatauina o Tupe Faaopopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014 ma ou te vaalauina Tulafono Tau Faaofi e pei ona faatulagaina i le Pepa o Galuega.

E tusa ai ma le Tulafono Tumau 132 o le a faaauau felafolafoaiga i Tulafono Tau Faaofi nei e lua e pei ona valaauina ma e tatau ona saunoa sao lava i le tulaga tau tupe ma le tamaoaiga o Samoa faapea faiga faavae tau tupe a le Malo.

O lea la ua tatou taunuu mai i le vailiu ma le avanoa lenei i le tatou Maota e tulei saunoa ai i tatou Tulafono Tau Faaofi nei. O tulaga ma lavasiga o lenei aso i le faamalamalama mai ma le saunoaga a le Palemia e tatau lava ona folasia i Malae le manatu o le Malo ae lei tatala atua le avanoa e saausi ai la outou tofa saili, tofa momoli ma la outou faautautaga loloto aua le tatou Tala o le Tupe lenei ua opea i le Maota. O le avanoa lenei, ua avanoa le Maota mo tuleiga ma saunoaga i le paia ma le mamalu maualuga o le tatou Maota i se sui usufono e fia saunoa.

O le a tatala le tatou maea i lenei taeao e le sui usufono toa mai Salafai, i le itumalo o Faasaleleaga Nu.2 o le itumalo e sa ona leaga ni saunoaga na o saunoaga lelei ma saunoga timai ma saunoaga faatupu manatu e atinae ai le atunuu.

Tulai mai le sui usufono mo Faasaleleaga Nu.2 ua avanoa le Maota mo lau saunoaga.

Susuga PAPALII LIO FAAVAIIVAIOMANU TAEU MASIPAU (Faasaleleaga Nu.2): Faafetai tele i lau Afioga i le Fofoga Fetalai mo le avanoa. Faafetai i le Palemia ma le Kapeneta ma le la Itu o le Maota ma le Vaega Faaupufai. Ia faafetai foi i le Taitai o lenei Vaega Faaupufai faapea foi sui usufono o lenei Vaega Faaupufai. Malo galulue, faafetai lava i lenei aso atofaina i lenei foi fonotaga taua mo le tatou atunuu aua le lufilufiina o le tamaoaiga. Malo faafetai i lau Afioga i le Fofoga Fetalai mo le faatautaia o le tatou Maota.

E le faagaloina foi le agaga faafetai i le tapuaiga a Lana Afioga Mamalu, O Le Ao o le Malo, Sui o le Fono a Sui Tofia faapea foi le Faamasino Sili ma le mamalu o le Faamasinoga. Aemaise foi o le tapuaiga a so o se fata faitaulaga i totonu o le tatou atunuu, malo le tapuai. Faafetai foi i le tapuaiga a le loaloa o le tatou atunuu aua foi le alofaiva o lau Afioga ma le mamalu o le Palemene aua ana Fonotaga masani.

E le faagaloina foi si ou itumalo pele o Faasaleleaga Nu.2 o lo o tapuai mai. I le afio o Leilua o le Sao faapea Aiga o Sa Alalatoa ma Sa Malietoa faapea foi Tuilagi ma Namulauulu ma le Maopu Tufuga, lau fetalaiiga Fauolo le Aimalae faapea foi Safotulafai, malo tapuai, lo lua nofo Tooa ma le Aiga Sa Malietoa, ma le alalafaga o Leusoalii Mago ma Luasiufanua, faafetai mo le tapuaiga aemaise foi le nofo a so o se faafeagaiga i totonu o le tatou itumalo, malo tapuai, faafetai lo outou tatalo, faafetai mo le tapuaiga a le tatou itumalo e le gata i Salafai a o Tumua nei.

E le faagaloina foi le galuega a faauluuluga o Matagaluega a le tatou Malo aemaise foi o faalapotopotoga malo le galulue faafetai i le Failautusi ma le vasega o le Fono aua le tapenaina o le tatou fonotaga. Momoli le faafetai tele i lau susuga i le Palemia mo le saunoaga faa-Minisita, tasi lea meaalofa a le Atua i soo se tagata ma soo se taitai foi o le lototele o le mea lea malo faafetai, o lea foi ua folasia finagalo aua foi le tomatauina ma le amatalia o le tatou talanoaga o le Tupe malo faafetai. E talitonu e le umi foi ni matou taimi, manatu lau Afioga i le Fofoga Fetalai, ae ou te lei oo atu i le Tala o le Tupe ia e muamua ona avatu malu i puega i lau Afioga i le Palemia le aiga Kapeneta aemaise o le aiga Minisita ia e ao foi ona avatu nai manaoga o lou itumalo ua leva ona tuuina atu. E ao ona faamuamua atu ae ou te lei oo i le tala o le Tupe.

Lau Afioga i le Minisita mo Galuega, Felauaiga ma Atinae Eeseese e tauala atu i le Nofoa o lo o ina lava le talosaga a lenei itumalo pei foi ona ou tuuina atu e le gata i le feiloai atu ae o le avatu foi o tusi ma mea faapena, ia o lea lava e talitali lenei itumalo. Pei ona ou avatua le auala lena i le va o Vaiaata ma Fatausi, o auala na e lua leaga e leai se mea e saofaga ai le aumatutua o lenei itumalo pe a oo ina osofaia faafuasei e sunami ma tulaga faapena e fai si vavamamao ae tele le aumatutua i le va lena o le auala lea o Vaiaata ma Fatausi o le ala lena o lea e tatalo atu ai i le auala lena i Fuifatu ma Eleele o le agaga lena, avatu pea i lau afioga i le Minisita le talosaga a lenei itumalo. Oo mai i le talosaga i Sapapalii o lena ua i ai le vai i ai le auala ae toe o le moli, faapea le talosaga a si ou nuu o Fatausi i le moli ma le vai o lea foi ua oo atu i luma o lau Afioga le talosaga a Fatausi. Pei foi ona saunoa ma talatalanoa ma lau Afioga, polokalame lava ia faataatia a le tatou Malo e o faatasi lava le auala o le moli o le vai, tulaga na ua avatu ai se talosaga i le agaga faaaloali i lau Afioga, ia sei alofagia. Masalo e uma le tala o le Tupe lenei toe lua tatou tala o le Tupe uma tatou nofoaiga o le ala lea o le tatalo atu o lenei sui faipule sei alofagia galuega lenei itumalo. O le auala laupapa ia faafetai o lea ua maua atu o le a faatino le auala laupapa o Samalaeulu, o lea ou te faamauina lau saunoaga i totonu o le Maota lenei, o auala laupapa i Savaii na muamua mai lava Sapapalii, Samalaeulu Sasina ae ui i lea leaga o le matou motu, ae o le tatalo ia alofagia o lea lava o le a faatalitali mai, o le fesoasoani lava i le feafioai o le mamalu o le tatou atunuu aemaise lava o le tatou falemai tele i Tuasivi ia e i ai gasegase faafuaseia o le taua lena o le tatalo atu. Ona ou oo mai lea i le Afioga i le Minisita o Punaoa faa-Natura ma le Siosiomaga faafetai atu i lau Afioga.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Faafesili atu lau Afioga i le sui o Faasaleleaga.

FOFOGA FETALAI: Malie le sui o saunoa sei tuu atu le avanoa.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O i ai se auala laupapa i lou itumalo o e manao e fau?

FOFOGA FETALAI: Tulai mai le sui mamalu. O le fesili pe o i ai se auala laupapa o le tatou itumalo e fia fau.

Susuga PAPANII LIO FAAVAIVAIOMANU TAEU MASIPAU: E le i fauina pe ua fau?

FOFOGA FETALAI: E fia fau.

Susuga PAPANII LIO FAAVAIVAIOMANU TAEU MASIPAU: Ioe, o lea ua i ai le auala laupapa le tuaoi ma Lalomalava, lea foi na lauga ai foi Gatoloai i le isi fono talu ai iina i Sapapalii.

Susuga Hon Tuilaepa Fatialofa Lupesoliai Aiono Neioti Sailele Malielegaoui: A o lena e i ai le ala sima manaia lava.

Susuga PAPANII LIO FAAVAIVAIOMANU TAEU MASIPAU: O lo o i ai le auala sima ao le faalavelave e le sao ai taavale, le falemai lea i Tuasivi a oo ina o atu mai seiloga lava e maui i lalo le vai e oo i e e o mai e tuli mai le vaa i faigamalaga e poloka uma lava i le vai lea. Mafua ona le maliliu tagata i le ala sima lea ona e i ai le tapuafanua a le nuu lenei o lea e puipuia tagata maliliu ma tagata feoai ma faalavelave tutupu o le ala lea o le le aafia.

FOFOGA FETALAI: O lea ua maua atu. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Na ou manatu o le a e faafaigofie mai foi i le Malo sei fai i se isi tausaga o lena e i ai le tapuafanua e faasaoina tagata.

Susuga PAPANII LIO FAAVAIVAIOMANU TAEU MASIPAU: O lena ua taatia atu se talosaga.

FOFOGA FETALAI: Faaauau le saunoaga.

Susuga PAPANII LIO FAAVAIVAIOMANU TAEU MASIPAU: Faafetai i lau Afioga a le Minisita mo Punaoa faa-Natura ma le Siosiomaga i le talosaga a lenei itumalo mo taligalu. O la ua maea mai Fogapoa, ae toe o Fatausi ma faasolosolo mai ai i Fusi ma Sapapalii - faafetai o lea ua e tali mai. O lea lava ou te taulimaina lau tusi lea na aumai, faafetai lava i lau Afioga. E ese le manaia o le vave ona tali mai, ae tusa pe tuai ona fai ae ua tali mai tusitusia.

O lea o le a ou faamauina lelei i totonu o le faila a Faasaleleaga Nu 2, faafetai. E faamoemoe atu i lau Afioga, ou te le tau fai atu a mea o lenei itumalo e tautua e a ma a, e le faitaua foi se tautua malo a Faasaleleaga Nu 2. A silasila i ai i Tuasivi o lo o ogatotonu i ai le Matagaluega a le Soifua Maloloina, o lo o i ai le fale faamama toto, o le falemaliliu tua atu foi i le Ofisa o Faamasinoga, o lo o i ai le Faamasinoga o Fanua ma Suafa, Faamasinoga Faaaitumalo, Faamasinoga Fesoasoani faapena foi i le Ofisa o Leoleo. E faapena foi i le Koluse Mumu o Samoa le Victim Support o mea uma ia o lo o i totonu o Tuasivi, o la lava e faamalumalu Tuilagi Namulauulu Safotulafai i le tatou Malo ona o le manatu tele i le tatou Malo.

O lo o i ai foi le falepuipui o la ua tutoatasi le falepuipui o i foi i le itumalo lenei i Vaiaata, o fea, o Faasaleleaga Nu 2 lava lea e i ai. Tuu ifo i le tautua a

se tasi o tamalii o Pa'u Letoa Sefo Pa'u i le tautua i le falemalii i Salafai o totonu foi o le itumalo lenei. A tou silasila foi i le lomiga muamua lava o le Savali a le Palemene lenei, o ai le toeaina lea e tutu ma lona fue ma lona tootoo o le toeaina Safotulafai, o le a, o le tautua Malo lea na taitaia le mau a Pule, lea na faaunuua na ave faatasi ma fafine ma tamaiti i fafo ona o le a, o le tautua Samoa mo Samoa. O le ala lea o le faatauaina o le toeaina lea o le matou itumalo. Ou te le faapea atu a mea ou te faitau tautua Malo, e leai na ona avatu i luma mea o le agaga moni tautua i le Malo soo se ala.

FOFOGA FETALAI: Malie le sui o saunoa e mafai ona e saunoa i le suafa o le tamalii leaga e tele tamalii totoa o le tou nuu.

Susuga PAPALII LIO FAAVAIVAIOMANU TAEU MASIPAU: O Lauaki Mamoe Namulauulu lea na faaunuua i Saipani ave faatasi ma lona toalua ma lana fanau avatu ai ma isi tamaloloa ma fafine o le matou itumalo ave uma i fafo! Ona o le a? Tautua Samoa mo Samoa o le ala lena, ou te le faapea atu a mea ou te faitau mea ae o le agaga lena.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te faalogo atu e muamua le Lauaki faasolosolo mai, o lona uiga e matua taulealea le taulia le toeaina.

FOFOGA FETALAI: Tulai mai le sui mamalu e faaauau le saunoaga o lea ua maua le tautua Malo o le tatou itumalo.

Susuga PAPALII LIO FAAVAIVAIOMANU TAEU MASIPAU: O le isi mea lau Afioga i le Palemia pei ona ou pesepese atu eleele ia e i uta o le itumalo na mafua ona fao ese e Siamani o le tau i o le tu o le toeaina lea ma le itumalo lenei mo Samoa na aveese faamalosi ai lea o matou eleele ia e i uta.

O le ala lea o le tatalo atu sei alofagia lenei itumalo. O lea a ma te momoe ma le Tulafono lea ei i, teuteuga lea 2008 Faamasinoga o Fanua ma Suafa o lo o manino ai ii e mafai ona foai e le Malo ona liliu lea i eleele faaleaganuu. O le mea lea lau Afioga i le Palemia ma le Kapeneta o le agaga lena o lenei itumalo. Lou itumalo tapuai maia tatou maua pea le onosai ma lavapapale, tatou faia pea le tatalo a Konelio e ui lava i le toto ma tama faa-Isaraelu ae saumani afaese lava i le vaai faa-Iutaia ae tatou onosai pea, o le a le mea na oo i ai, na oo ae lava le nanamu o le tatalo a Konelio i le Atua, ia lea na avea ma fatu o le Tala Lelei i nuu ese.

O le mea lea lo tatou itumalo, tatou onosai ma tatou tatalo pea toetiti lava oo ae nanamu o tatou tatalo ia Tuilaepa ma le Faigamalo, fesoasoani mai loa i tatou mea ia. O le mea lea le tatou itumalo tapuai maia ma le manuia aua le alo o le tatou Malo i ona tiute fai.

Ona ou oo mai ai lea i le Tala o le Tupe: ou te faafetai i le Minisita o Tupe faapea foi le Ofisa Sili ma Pulega ma le Matagaluega mo le tapenaina o lenei Tala o le Tupe, e le faigofie le galuega, e fai o le tau faaupuga o tatou Tala o le Tupe ina ia manaia i le vaai ma le faalogo ae o le tapenaga foi o mea uma. O le mea lea faafetai tele i lau Afioga i le Minisita. E momoli foi lau faafetai tele i lau Afioga i le Minisita mo Tupe Maua ma le Ofisa Sili ma le Pulega, aua o lau maitau ma lau vaavaai e ese le tele o la outou galuega o le tau aoaoina o Tupe e fai ai galuega a le tatou Malo, o le mea lea malo faafetai,

faafetai i lau Afioga i le Minisita mo Tupe Maua ma le tamaitai pule ma le Matagaluega. O lau vaai i ai o le laitiiti ia o la outou seleni lea e faaoga e la outou Matagaluega a o tupe ia tou te aoina e sili atu ma le afa o tatou tupe maua. O le mea lea malo faafetai. E le tuua foi lau faafetai i le Matagaluega o Tupe lau afioga i le Minisita ma le Matagaluega o Tupe o lea foi e maua o lo o feololo foi a outou seleni o lo o outou aoina malo faafetai. Faafetai foi i le Palemia ma le ofisa o le Palemia faapea foi lau Minisita mo Fesoootaiga ma Faamatalaga Tekonolosi o lea foi e i ai le tou sao i tatou tala o le Tupe, o le mea lea malo faafetai aemaise o le fesoasoani i tatou Tupe Maua.

Ona ou oo mai ai lea i taiala o Tala o le Tupe, manaia le mea lea ua i ai le tatou taiala o le a le siitia tatou lafoga ma tiute, ae o le a siitia nisi o auunaga a nisi foi o Matagaluega a le tatou Malo ma Faaalapotopoto. Pau se matou fautuaga sei silasila totoa i ai ma mataitu aua o le mea moni lava ia, nei tei ua feololo pe ana sii lafoga ma tiute i lo le afaina. Aua manatua o le tele o Matagaluega nei i lau vaai, o le tele o auunaga mo le atunuu lautele, ao se matou fautuaga silasila totoa pea mo le agai i luma ina ia maua pea se fesoasoani mo tatou tagata. Pau le mea lea ou te vaai atu i ai pei e tau fai sina lapoa tele o lona siitaga o le penisini (petroleum) lea ou te vaai atu i ai e 200% lona siitaga, ia e leai o le tatalo lava ia sei fesoasoani ane, o le mea moni lava ia o matou nei e utu a matou taavale matou te feoai ai e le o toe afa se taavale i se \$100.00, o lona uiga tasi lea mea i tei ua toe faaopoopo atu, ma le isi mea ua tele foi taavale a le tatou atunuu lea ua aumai nei tei ua alu le taavale a se isi toaina ma se isi loomatua tutu ua le mafai ona utu. O le mea lea avatu i luma mea sei silasila i ai mo le agai i luma.

Ona ou oo mai lea i le ootoga o le Tala o le Tupe, faafetai i lau Afioga i le Minisita, masalo o le mea foi lea sa ou lauga ai foi talu ai, o mea lava ia o tupe faasiliga o tupe alu ma tupe maua, ona aumai lea o tatou nonogatupe mama tului e fesoasoani i le faatupeina. O le va lea o tupe maua ma tupe faaalu o lea e maitau atu o tatou nonogatupe lea e faatumu ai le va lea, pau lava lau fesili e le se fesili e tali mai nei, ae faatupu manatu mo le agai i luma. Po o le a se taimi tatou te le toe faalagolago ai i nonogatupe e faatumu ai le va lea, o lona fesili e aoga mo le lumanai. Poo le a se taimi i le lumanai tatou te mafaufauina ai o le a tatou le toe....

Afioga Hon Faumuina Tiatia Faaolatane Liuga (Minisita o Tupe): Lau Afioga i le Fofoga Fetalai.

FOFOGA FETALAI: Malie le sui o saunoa sei tuu atu lava le avanoa i le Minisita o Tupe.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai ou te lei fia faalavelave i le saunoaga matagofie a le sui mamalu. Pei o le mea lea na maua mai i le saunoaga faa-Minisita a le Palemia, o tatou polokalame e tai 5 tausaga po o le sili atu, o nonogatupe lava ua leva ona faataatia o lea e faagasolo ai, e oo foi i polokalame i meaalofa mai atunuu i fafo i tatou paaga e i ai foi le tai tolu tausaga poo le lima tausaga e faapena ona auauai ai o lona uiga o lona mea e faasolo a tatou atinae i fuafuaga ua uma ona faataatitia, ao le fuafuaga a le Malo ia tuutuu i lalo le tulaga o le tatou faalagolago i tupe e nono mai.

FOFOGA FETALAI: Faafetai mo le saunoaga faamalamalama a lau Afioga i le Minisita.

Susuga PAPALII LIO FAAVAIVAIOMANU TAEU MASIPAU: Pei ona ou fai atu e aoga mo le faatupu manatu mo le agai i luma, o lea ua e saunoa, e le aoga foi ona nofo lou sui e aoga ona avatu pea se fesili, o le isi au fesili, o lea o le tausaga fou lea o le a tatou mei ai i luga o le LTC, e ono tumau pea le faaupuga lea nonogatupe mama tului, pe tei ua faapea nonogatupe feololo le tului pe faapea o le nonogatupe e sili atu le tului. Mo le agai i luma aua o le tausaga fou lea o le a tatou mei ai i luga i atunuu foi ia o le LTC.

Ona oo mai lea i le tatou Tupe faameaalofa e \$222 miliona se faafetai.

Afioga Hon Faumuina Tiatia Faaolatane Liuga: Lau Afioga i le Fofoga Fetalai.

FOFOGA FETALAI: Malie le sui usufono o lo o saunoa se i tuu atu le avanoa i le faauilavea a le Afioga i le Minisita. Tulai mai lau Afioga i le Minisita o Tupe.

Afioga Hon Faumuina Tiatia Faaolatane Liuga: Faafetai mo le avanoa i lau afioga i le Fofoga Fetalai. O le classification lea e te saunoa i ai lea o le a mei ai tatou i luga, o classifications e fai e Malo Afaatasi.

O lona uiga, o isi a tatou faiga faapaaga ma isi faletupe o le lalolagi e tumau pea mo se vaitaimi. Ae pei o le naunautaiga o le Malo, e faaoga pea le avanoa lea e maua ai nisi faaunegatupe e mama le tului, po o le tulaga i tupe faameaalofa mai fafo. Ma le faaaloalo lava.

FOFOGA FETALAI: Tulai mai le sui usufono e faaauau le saunoaga.

Susuga PAPALII LIO FAAVAIVAIOMANU TAEU MASIPAU: Malo faafetai o lea ua manino foi i le matou faalogo o lea lava e maua le tatou avanoa, ua maua foi a tatou tupe e mama le tului. Malo faafetai. O tatou tupe faameaalofa lea e fesoasoani i le Tala Faatatau o le Tupe lenei e \$222miliona, ou te iloa ua tele tele lenei tupe faameaalofa. Ou te iloa ua tatou laki ua tele lenei tupe faameaalofa ua fesoasoani i le tatou Tala Faatatau o le Tupe. O le mea lea, malo faafetai.

FOFOGA FETALAI: Malie le sui usufono o lo o saunoa se i tulai mai le faauilavea a le Minisita o Tupe.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e leai e le o le laki, o le faatuatua e a tatou paaga lea tatou te faifaimea faatasi o le faaogaina ma le faamalieina o tuutuuga pei ona tuuina mai e faletupe o le lalolagi, ma a tatou paaga e pei o le Iuni a Europa e faapena foi ia Ausetalia ma Niu Sila. Ma lou faaaloalo lava.

FOFOGA FETALAI: Malo faafetai. Tulai mai le sui usufono e faaauau le saunoaga.

Susuga PAPALII LIO FAAVAIVAIOMANU TAEU MASIPAU: Malo faafetai o lea ua maua atu. Na pau lava le mea ia faasoasoalelei, ae manaia lea fesoasoani, afai o se tulaga faapena, malo faafetai. Ia i lau lava vaai, aua ou te matau atu o le tausaga fou e ono o ai tatou i le mea lea o le tupe faameaalofa. Ae faafetai o lea ua maua mai le fesoasoani e faatupe ai a tatou galuega i lea Tala o le Tupe o le a faagasolo nei. O le mea, faamalo faafetai. Aua a tatou mei loa i luga ua le tataua loa ona tatou toe maua se \$222miliona. Ia ae tatou tatalo pea, tatou talosia ina ia fesoasoani mai mo tatou.

O le tupe faaalu le fuafuaina, ia manatua a alu i luga a tatou tupe faaalu, ua tele foi ma tupe foi nei e faaalu le fuafuaina. Aua o le tausaga lea sa \$13miliona, a o lea ua \$16miliona. O lau fesili, po ua uma ona faaoga le isi \$33miliona talu ai po o totoe lava.

FOFOGA FETALAI: Malie le sui usufono o lo o saunoa se i tuu atu le avanoa i le faamalamalamaga a le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaai: Lau Afioga i le Fofoga Fetalai, na o se mea sia e fia faamalamalama. O mea ia tatou te vaavaai i ai, o fuafuaga, mo estimation. A alu alu alu tatou vaai atu ua tupu foi nisi faafitauli i atunuu i fafo ma afaina ai tupe maua foi a le kamupani ona pau lea o latou oloa e aumai, ona alu ifo foi lea i lalo o tatou tupe maua. O le ala lena e subject uma mea maua i tupe ia. A alu alu la ae le maua, ona toe tifato uma lava lea i mea uma, e oo lava foi i tupe le fuafuaina, e tatipi uma lava e le Malo. O le ala foi lena na fai ai a tatou Tala o le Tupe ua auma, ua le o ni tupe faaalu, ae o tupe tatipi, ina ia fuafua i mea ua maua. O lona uiga, o a tatou fuafuaga ia, o lea e aumai nei, o fuafuaga ua matua tuu atoa i ai le atoatoa e le Minisita ma lana Matagaluega i le tulaga foi lele o mea na maua. Ae le faapea e iloa e tatou le mea o le a tupu, na o le Atua na te silafia mea, a tulai mai loa la ni faafitauli faafuasei, ona afaina loa lea o tatou tupe maua. E o o lava la i tupe ia na e fesili i ai, o tupe e fuafua. O le mea aupito sili ona taua, o le malosia lea ua aumai i le Kapeneta e mafai ai ona faaoga e tau i le aofaiga lena e te saunoa mai ai. Ae afai lava e le o talafeagai, ua leai foi ni tupe e faaoga. O le tulaga lena ina ia e silafia, o estimation uma mea ia tatou te talanoaina, ae faalagolago i le faagasolo o tausaga ona iloa ai lea ma toe fetuutuunai, tatipi nisi mea o lea e fuafua ua le talafeagai ma le Tala o le Tupe. O le tulaga lena, e le faapea a ta sau loa i i ona faapea lea o le a...

O le isi vaega taua lau Afioga, o le mea lea ou te faalogo soo mai ai, ua uma ona pasia e tatou le Budget, o tupe uma ua maua, ae ou tilotilo mai i le TV, ua outou tutulai, fai mai e tataua ona fai se mea i le mea lea ma le mea lea. A o a ni mea e toe fai o lea ua uma ona tatou paketi uma mea i inei, ma ua ave uma i ai tupe, e leai la nisi tupe o totoe e toe fai ai nisi mea. Lau Afioga i le Fofoga Fetalai, o le tulaga lena. Ia outou silafia, a toe o atu la le au faalaiti lea e faasee outou, e tataua ona fai ni mea fou ma ni mea fou ma ni mea fou. E leai ni mea fou, o mea uma ua uma ona fai e le Malo i totonu o le 12 masina, o lea ua aumai uma i totonu i i ona toe maua ai lea o le avanoa e toe tilotilo i ai ia Tesema po o tutusa pea fuainumera. A fai atu la ua le fetau, ua toe tifato uma lava i lalo mea uma. Lau Afioga i le Fofoga Fetalai, e faapena le mea o le faautautaga tataua, ina ia aua ne i pau atu le Malo i le faaletonu.

FOFOGA FETALAI: Malo faafetai i le saunoaga faamalamalama a lau Afioga i le Palemia.

Afioga Hon Palusalue Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: O le a le mea fia faamalamalama lau Afioga i le Taitai o le Itu Agai?

Afioga Hon Palusalue Faapo II: Leaga ua saunoa soo le Afioga i le Palemia i tamaiti laiti foi nei e taufaatauvaaina ai le au tusitala. O le tulaga lea e fia faasao atu, e leai, e le o omai faasee matou, leaga o mea o lea e tutupu. O le faataitaiga o lea e saunoa e aumai uma mea iinei e pasia ai le paketi. A o lea na ave le \$67,000 a le Matagaluega o Tupe e fesoasoani i le faiga o le ofisa o le Minisita. O le mea la lena na fesili ai, pe na aumai i le Palemene, pe leai.

Ou te tulai atu ai lau Afioga, e tau faasao le mea lea o le tau faatauvaaina o le au tusitala.

FOFOGA FETALAI: Malie lau Afioga i le Taitai o le Itu Agai sei tau avatu le mea lea. O lea na amata lau saunoaga i tamaiti ia a o lea ua oo i le ofisa o le Minisita o Tupe. Sei tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga o le mea e fia faasao. O le mea lea e saunoa mai e \$600,000 ua uma ona ou talanoa mai i ai, e le tasi se ofisa, na ou talanoa atu, pe fitu ofisa eseese. Ae na ala ona oo i le \$600,000, o le tala a le isi tusitala na tau atu ia te oe. O mea uma lava nei e fai ai tou mea, e toe omai uma lava tusitala toe tau mai ia te au. E faatupu manatu atu la ia oe, e see ai loa faasalalau mai le \$600,000 lea. Se i vaai la i le tele o lou sese, ona sesea tu ai lea ma isi? O le mea lea, e le faapena, e fai suesuega. O le mea lena e aloaia ai lou taitai. A o le faapena soo o au mataupu le le suesue lelei, e oo lava i le tou Vaega. O le mea lena ou te tau atu ia te oe, e te toe tilotilo atu i tua, ua leai sau vaega. O lau fautuaga lena i lau Afioga, aua le toe tuu atua e tamaiti mataupu e oso loa. A suesue maeaea, ona e malamalama ai lea.

Afioga Hon Palusalue Faapo II: Lau Afioga i le Fofoga Fetalai, o se mea e fia faasao ona o le tau soo o nai tamaiti ia.

FOFOGA FETALAI: Ioe, o lea ua ou maua atu lau Afioga i le Taitai o le Itu Agai.

Afioga Hon Palusalue Faapo II: Ia manatua foi le mataupu lena, e le o matou na mafua ai. Na mafua i le Vaega Faaupufai le la le mea lea e vevesi ai nei. Leai e le o matou, e le o le au tusitala, o le Vaega Faaupufai a le HRPP na mafua ai.

FOFOGA FETALAI: Malie lau Afioga i le Taitai o le Itu Agai. O e maua mai le tala lea ou te fai atua? Ia o lena o le a tuu maa ae maa i aau. O lea na agai le faamalamalamaga a le Palemia i le saunoaga. Se i vaai i ai i le

matautia o le saunoaga a le Palemia ia Faasaleleaga Nu.2? O lea ua matua tulai atu le Malo e faamalamalama, ae aua le tosoa soo le tatou Fono i le isi ogasami, sei maua lava le avanoa ona e saunoa lea i mea o lena e i lou finagalo. O le apoapoaiga lena a le Fofoga Fetalai, e tatau pea ona avatu leaga o lea ua lagalaga le mataupu lenei. E vaai pea ma le faanoanoa i le mataupu lenei, ua tauau ina talatala i fafo le faatalanoaina ma le opoopo o mataupu e talanoa i totonu o le Maota lenei. Ua le aneanea ni tatou Fono e toe fai, leaga ua uma ona talatalapipi i luma o ofisa faasalalau ma leitio mataupu e tatau ona lotea i totonu o le Maota lenei.

O le ala lea o le fautua atu o le Fofoga Fetalai, malie le Fono Aoa, ia, faatoa matala lava le ato ponapona i la outou tofa faaali ma la outou sailiga i totonu o le Maota lenei i le tofa saili. Silasila i le saunoaga matagofie a le sui usufono mo Faasaleleaga Nu.2? O mea na o tu ma aga o tatou tofiga e le fai i fafo i le alatele le mea lea tatou te vevesi ai. Aua o lea ua tatou vevesi nei i le mea o lea e pisa i le alatele, o le tala a le tai ma le usoga.

O le mea lea, malilie sui usufono ia outou alofagia le tulaga lea leaga o lea ua aliali mai le mataupu lenei. O upu, e le pulea mai fafo aiga, e le taupulea mai fafo iuga a le Maota lenei. E tasi lava le mea e tatala ai le tofa ma le faatofalaiga, o ogatotonu o le Maota lenei, o le Fono sili a le atunuu. Ma e tatau ona ou fautua atu i le tulaga lea le paia e ma le mamalu o le tatou Palemene i lenei taeao, ia outou alofagia le tulaga lena. O mata o maasiasi le toe folasia o le tatou Maota i tuleiga ma saunoaga, ua uma ona salalau ia Samoa atoa mataupu e tatau ona talanoa i inei.

O le ala lea o le fautua atu o le Nofoa, sei tau lauama tootoo manatu ma lagona. E le aumaia fetauiga na fai i fafo i i ma o e fai ai le tulaga o lea tatou te talanoa i le tulaga tatau ma le taimi talafeagai ina ia limataitaiina le tatou Fono i le tulaga e tatau ona i ai.

Ona manatu lea o le tulaga o lenei aso ma le faamoemoe, o lea ua manino ma malamalama le mataupu, ia alofagia le tatou Fono ia tautata i le moa o le ala ma le faatinoga o le tatou Fono.

Ia tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai lava si mataupu lea e tasi e tatau ona faasao. O mataupu uma lava faale-Malo e faagaoioi ai le Malo, e aumai i inei i le tatou Tala o le Tupe. A o mataupu lava tau Faalapotopotoga a le tatou Malo, e le aumaia la iinei, lena e i ai le Faalapotopotoga, le Komiti e pulea e latou mea na, e le aumaia i inei.

O le mea lena o lea ou te faasaoina atu, ona o lea foi ua toe sese le Taitai o le Itu Agai i mataupu ia e faasino i le maota lea e faatupe e le NPF, e fai lava le latou faaiuga, e le aumaia iinei i le Maota lenei lau Afioga i le Fofoga Fetalai. Na ona toe faasao atu, o le mea lena e fesetetai ai mea, ona ua aumai mea a le Faalapotopotoga e le oo i ai, e le aumaia i inei i le Palemene i le Tala o le Tupe e talanoa ai, ae o lea ua laga mai i inei e talanoa ai. E le aumaia iinei mea na, i lalo o latou Tulafono e faafae ai latou mataupu.

FOFOGA FETALAI: Faafetai i le saunoaga malamalama a lau Afioga i le Palemia.

Afioga Hon Palusalue Faapo II: Lau Afioga i le Fofoga Fetalai, ma le faaaloalo lava o se mea e fia faasao. O lea ou te malamalama lelei lava i Faalapotopotoga Tumaoti a le Malo, ae ona o lea e aafia ai ma le Matagaluega o Tupe. O le mea lena e ala ai ona fesiligia. O lea e sao lelei lava le saunoaga a le Palemia i le tulaga lea.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. O tulaga uma lava e aafia ai le fale lea ma fuafuaga faapena, o mea na e nafa ma le NPF lau Afioga i le Fofoga Fetalai. O le toe faasaoga lena.

FOFOGA FETALAI: Malo. Ou te manatu o lea ua manino ma malamalama le mataupu. Ou te faamalulu atu i le sui usufono o lo o saunoa, o le taua tele o manatu ma lagona, o lenei lava e tuu atu le Fofoga Fetalai ona o le silasila foi i le anoa o mataupu o lo o tuuina mai. Toe lima ou minute. Ae a tatou taliu mai i le tatou malologa masani, ona toe amata lea o lau lauga.

Ou te faasilasila atu o le a faataatia ese Taulumaga a le Fono Aoa mo lana malologa masani o le taeao.

Na faataatia ese Taulumaga a le Fono Aoa mo lana malologa masani i le itula e 10.45 i le taeao.

Na toe faaauau Taulumaga a le Fono Aoa i le itula e 11.20 i le taeao.

FOFOGA FETALAI: E momoli atu le agaga faafetai tele i le onosai o le tatou Maota i lenei taeao ua tatou pasia le vaega muamua o le tatou galuega masani, mai le taeao aena i le itula e 9:00 seia oo mai i le tatou malologa, faafetai o lea ua tatou laasia le vaega lona lua o le tatou malologa muamua.

E talitonu foi le lagona o lea ua tali le sua ma taumamafa ma matu i fau la outou faamalositino i lenei taeao fou. E asuasu atu vaimalu i puega, o le a se taumafai a le Failautusi ma le Matagaluega o le Fono i se mea e tala ma sinei ai le taligasua aua la outou faamalositino mo le faaauauina o le tatou galuega faatino.

E momoli atu foi le faafetai tele i lau Afioga i le Palemia aemaise o le Taitai o le Itu Agai, lau Afioga i le Sui Fofoga Fetalai mo le faaavanoaina o lo outou taimi sei fai atu se upu ma se tala a le tatou Maota e ala i le asiasiga a alo ma fanau o le tatou atunuu na malaga mamao mai Savaii, aemaise afioaga tumamao i Upolu nei aua o lea ua tautino le solo a le tamaloa i lenei taeao. E atagia ai lo outou agaga faaaloalo ma lo outou fatuaiga tausii o le aputiputi lea o alo ma fanau a le atunuu o lo o latou fia maua le malamalamamaaga e uiga i mataupu faa-Palemene, ou te talitonu ua matagofie lenei taeao ona o fautuaga ma timaiga, ma upu faatama e limataitaiina ai lo latou soifua auauna ma lo latou soifua aoaoina.

O lenei itula o le a tatou alo e faaauauina le tatou galuega ma e i ai le talitonuga o le a faaauau seia paia le itula e tasi i le aoauli nei ona faatulaga ai

lea mo le tatou galuega nisi e tulai mai. Ae ou te talosaga atu i lau Afioga i le Palemia mo le lafo e faatulaga ai tatou galuega o le aso.

Tulai mai lau Afioga i le Palemia.

LAFO MO LE SUIA O ITULA FONO

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, faamalo o lea ua toe taliu mai le Afioga i sui usufono mamalu ua maea le faasiliga malosi na taumafai i ai le Matagaluega.

O le lafo ua ou tulai atu ai ma le agaga faaaloalo, *Ina ia suia tatou itula Fonotaga e afua atu i le aso mai le 9:00 – 1:00 i le aoauli ona toe fono ai lea i le aoauli mai le itula e 3:00 – 7:00 i le po.*

Faaluaina e le Sui Palemia ma le Minisita o Tupe.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2012/2013 ma le Tulafono Tau Faaofi o le Faatatauina o Tupe 2013/2014.

FOFOGA FETALAI: E faia le tatou malologa o saunoa le sui usufono mo Faasaleleaga Nu.2. Tulai mai le sui usufono mamalu e faaauau mai le saunoaga, toe lima ou minute.

Susuga PAPALII LIO FAAVAIVAIOMANU TAEU MASIPAU: Faafetai i lau Afioga i le Fofoga Fetalai ua maua foi se faasiliga malosi e lau Afioga ma le paia o le Maota. Ae faaauau le lauga a lenei itumalo.

Ona ou oo mai lea i le tupe faasili o lo o i totonu o le Tala o le Tupe lea e i ai le \$39miliona lea ua maua. I le faa-Peretania o le cash surplus after borrowing ae oo mai i le faa-Samoa ua tupe faasili. O lona uiga aua manatua foi o le \$80miliona lea e faatumu i le va lea o tupe alu ma tupe faaoga lea e i ai le \$80miliona ona totogi lea o le tatou nonogatupe lea e \$120miliona o lona uiga e totoe le \$39miliona lea o tupe faasili. Ia leai, pau lava le mea o le agaga e tatau ona faapea o tupe faasili aitalafu pei o se mea faapena na ona faaopoopo i ai i mea na a o mea ia o la ua aumai i le tatou nonogatupe. E pei o se faailoa atu lea i le faa-Samoa ona o lea ua gata i le tupe faasili a o lea e manaia le faa-Peretania cash surplus after borrowing ae oo mai i i ua tupe faasili. A o lea ua malamalamama atu.

FOFOGA FETALAI: Malie le sui usufono mamalu, sei tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea e maitau atu o lo o faitioina le sui usufono le au faaliliu upu. O lea la ou te fesili atu i le sui usufono pe i ai sona tomali faaliliu upu aua o le mea lava lea o lea e faaliliu ai ae lelei ona tuua lau galuega ae afio mai e faaliliu upu.

FOFOGA FETALAI: Tulai mai le sui usufono mo Faasaleleaga Nu.2 e faaauau le saunoaga.

Susuga PAPALII LIO FAAVAIVAIOMANU TAEU MASIPAU: O lea lava e manino lava ao le fautuaga lava ia mo le agai luma. O lea ua tatou malamalama i le mea lea e maua mai ai le \$39miliona lea.

Ona ou oo mai lea i atinae, faafetai lava i le Polokalame a le Soifua Maloloina, le Matagaluega o Aoga, Taaloga ma Aganuu lea ua toe faaopoopo le Tala o le Tupe ou te iloa ua manaia foi lea faaopoopoga mo le Matagaluega o Aoga, Taaloga ma Aganuu. Ia sei alofa ane i totogi o nai faiaoga Aoga Tulagalua, aemaise lava faiaoga o nai aoga na e pei e toatele i ai le lautele o le atunuu a maua sina fesoasoani i faiaoga Aoga Tulagalua i nuu i tua.

Ona ou oo mai lea i le Matagaluega o le Soifua Maloloina e \$12miliona lea e faasili mai....

FOFOGA FETALAI: Malie lau Afioga i le sui usufono mamalu, sei tuu atu le avanoa i le Minisita mo Aoga, Taaloga ma Aganuu e tali atu i le saunoaga.

Tulai mai le Minisita mo Aoga, Taaloga ma Aganuu.

Afioga Hon Magele Mauiu Magele (Minisita mo Aoga, Taaloga ma Aganuu): Lau Afioga i le Fofoga Fetalai ma le mamalu o le Maota o le mea e fia faasao. O le tulaga lea o totogi e pei ona saunoa le Palemia i se tasi o Polokalame ua tolu nei masina talu ona galulue le Komisi o Galuega a le Malo ma le Matagaluega i le tulaga lea. Faafetai.

FOFOGA FETALAI: Ou te manatu ua manino. Ua tali lau fesili lau Afioga i le sui usufono mamalu.

Susuga PAPALII LIO FAAVAIVAIOMANU TAEU MASIPAU: Faafetai o le mea sili o lea ua manino, malo lava faafetai o le matou lava tiute o le faamanatu atu ae faafetai o lena ua i ai fuafuaga.

Ona ou oo mai lea i le Matagaluega o le Soifua Maloloina lea foi e i ai lona faasiliga i lena tausaga. O le mataupu foi lena sa ou lauga ai muamua foi i le mea lava lena o le foma faapitoa o taotoga o e maliliu e fia maua le mafuaaga (pathologist). E le namalaina i lau Afioga i le Fofoga Fetalai ma le mamalu o le Maota o si tama Salelavalu lea na maliliu i le amataga o le masina lena, o le tala ua oo mai faatoa avanoa mai le pathologist i le aso 1 o Iulai, o se taimi umi tele lea taimi ae manatua foi e tele nai tagata o aiga na malaga mamao mai fafo o lo o faatalitali sei oo i le aso lea. Sa ou laga muamua foi lena mataupu ua tatau lava ona i ai se tatou foma faapitoa ona e tele faalavelave faapea ae manaomia foi e aiga le taimi ina ia vave faatino ia fuafuaga ae sei fai o latou toe taimi e faamavae i ai. Ao lea e faamanatu atu mo le agai i luma.

Faafetai i le Matagaluega o Faatoaga....

FOFOGA FETALAI: Malie le sui usufono mamalu, sei tuu atu le avanoa i le saunoaga faamalamalama a le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): O tulaga i taotoga ia e fai mo e maliliu e saili ai, e le o le pule a le fomai e taofi ai. O le vaega lea a le Matagaluega o Leoleo. O le Coroner e fai lana faatonuga e tatau ona fai se taotoga, o latou foi la e talosagaina se pathologist mai fafo ona o le galuega lea e pei o se galuega faa criminal investigation ae le o se galuega a le falemai. E i ai lava gasegase faa falemai e fai latou taotoga faa falemai e saili ai po o le a le mafuaaga o le maliu i gasegase e maliliu ai. E pei o se faamalamalamaga lena.

FOFOGA FETALAI: Malo faafetai. Tulai mai le sui usufono o lo o saunoa ua toe lua ou minute.

Susuga PAPALII LIO FAAVAIVAIOMANU TAEU MASIPAU: Ou te le teena le finagalo o le Minisita mo le Soifua Maloloina. O mataupu nei e leai se malosiaga o le Matagaluega o Leoleo po o le Matagaluega o Faamasinoga. E manatua foi o le fomai o le poto faapitoa o ia na te faailoa mai le mafuaaga o le maliu ona faatoa faatino ai lea o le tiute o le Faamasino ma le Matagaluega o Leoleo. O le mea lea ana ua i ai se tatou pathologist tumau e leai se fetotoai faapea. E pei ona silafia o le tomai faapitoa faafomai, o le tomai faapitoa e le oo i ai se malamalama o se leoleo, o le fomai nao ia lava e malamalama i le mafuaaga o le maliu, pau lava lea. Ana i ai se tatou pathologist e leai se vevesi.

FOFOGA FETALAI: Malie le sui usufono mo Faasaleleaga Nu.2 sei toe tuu atu le avanoa i le Minisita mo le Soifua Maloloina mo lana faamalamalamaga.

Afioga Hon Tuitama Talalelei Tuitama: Lau Afioga i le Fofoga Fetalai, o lea ou te malamalama i le atugaluga o le sui usufono ona pei lava o le maliu lea na maliu i le tagata o le itumalo o le sui usufono lea e saunoa i ai le sui usufono. Po o le sao lea lau Afioga i le sui usufono?

Susuga PAPALII LIO FAAVAIVAIOMANU TAEU MASIPAU: O le itumalo o le sui usufono mo Faasaleleaga Nu.1 lena e afio mai i lena pito. O le Salelavalu le matai, o Suafoa le suafa matai, ua leva ona omai lana fanau ma ona tuafafine ae ua faalavelave ua tuai le mea lea.

FOFOGA FETALAI: Ou te fautua atu i le sui usufono mamalu o lea ua maua e le Afioga i le aMinisita mo le Soifua Maloloina. Ia lafo mai laia e taliu foi ae popoe ona o lo o faafofoga le atunuu aemaise i latou o lo o taua suafa e le mama foi lea mataupu na tulai mai i le Motu tele i Salafai ae fautua atu i le sui usufono faaiu maia le saunoaga o lea ua manino ma malamalama le tulaga o finagalo faaalua.

Sei tulai mai le sui usufono mo Gagaemauga Nu.2.

Tofa Levaopolo Talatonu (Gagaemauga Nu.2): Lau Afioga i le Fofoga Fetalai, ua ou tulai atu ma le agaga faaaloalo i lau Afioga toetiti lava maea le faamatalaina o maliu a le sui usufono mamalu ae, *Pe maua se lima minute faaopoopo* ma le agaga faaaloalo lava.

FOFOGA FETALAI: O le lafo le mea lea e te faatuina mai le sui usufono mo Gagaemauga Nu.2?

Tofa Levaopolo Talatonu: Ia o lea lava o le lafo faamolemole.

Faaluaina e le sui usufono mo Aana Alofi Nu.3 ma le sui usufono mo Faleata Sisifo.

E le i tuuina atu le maliega autasi a le Maota i le lafo.

FOFOGA FETALAI: Ia malie ia le sui usufono mo Faasaleleaga Nu.2 e le ni ai i avea. O lea e i ai le tulaga o le auiliiliga ona avatu loa lea o le avanoa e te toe saunoa ai. Ae faaiu mai lau saunoaga ua uma lou taimi.

Susuga PAPALII LIO FAAVAIVAIOMANU TAEU MASIPAU: Faafetai ae ui i lea o le a taumafai atu ia e faauma atu se matou taofi ae i ai nai fesoasoani e aoga mo e agai luma.

Ona ou oo mai lea i le Matagaluega o Faatoaga, faafetai o lea ua ou maua le \$500,000 lea e faatuina o le fale i Matautu e taua tele mo fua o faatoaga, o le mea lea malo faafetai mo ia fuafuaga taua.

O le atinae mo tagata tafafao maimoa mai fafo, manaia foi le seleni lea ua fuafua i ai ae pau lava le mea o lau tatalo atu a outou susu atu ma afifio atu i Savaii i le uafu i Salelologa na ona matala lava o le faitotoa tau tonu lava outou fofoga i faaputuga ala vaeatu lava le Maota. O le agaga o lenei sui usufono o le vaaiga muamua foi lea o Savaii latou pe a ulufale atu tatou malo mai fafo. Ao le tatalo atu lena e aoga foi le teuteu ma faaaulelei le uafu i Salelologa aua malo fegasoloai.

Ona ou oo mai lea i le penisione a tagata matutua, faafetai ua outou tali mai i le tatalo atu a lenei Itu o lea ua maua o lea ua tali o le a sii. O le mea lea outou le aumatutua faafetai o lea ua tali le tatou Malo aua outou penisione. Ao lau tatalo lava toe lava o le o nai toeaia ma loomatutua i Tutuila o lea ua taofi i vaa ae manaia pe a toe faaauau lena tulaga mo le aumatutua e fia o i Tutuila ma toe foi mai. O se faaopoopoga lena i le aumatutua.

O le Ofisa o Faamasinoga i Tuasivi, o le mea moni lava lau Afioga i le Fofoga Fetalai ma le Minisita mo Faamasinoga e le o lava le faamasinoga lea ae fai ai faamasinoga faaitumalo, o lena fale faamasino o le tele o le mamalu o le atunuu i Salafai e nofonono mai lalo o laau vaeatu lava le Maota ao le tatalo sei alofagia a maua sina fesoasoani mo le tatou fale faamasino la e i Tuasivi mo le tatou motu i Savaii.

FOFOGA FETALAI: Ua maea lou taimi le sui usufono mamalu.

Susuga PAPALII LIO FAAVAIVAIOMANU TAEU MASIPAU: O le a faaiu atu se tala. E ese lou fiafia i le mea lea na ou tau i ai o le Public Finance Management Reform Plan po o le Fuafuaga mo le Pulea Lelei o Tupe a le Malo lea o le a silasila i le 10 tausaga ua tuanai lea o le a toe vaavaai ma silasila i ai le Malo i mea talafeagai. O le tele ia o le aoga o lenei fuafuaga, ia te au lava ia ua matuai ou lagolagoina o lea lava ua fetuutuunai foi le Malo i le tatou maketi faafetai mo lena fetuutuunaiga ao nisi atinae tetele se a lava

lava tupe fai ae a leai tatou tatalo i le Alii atonu e aumai e le Alii se taimi e faatino ai tatou atinae tetele.

O le a faauma atu ai i i se matou faamatalaga leaga o lea ua maea lo matou taimi ae o lo o silafia e le Atua le agaga o le fia fesoasoani atu i le tatou Tala o le Tupe. Ia manuia tele lau Afioga i le Fofoga Fetalai, manuia foi le Afioga i le Palemia ma le Kapeneta ma le la Itu, manuia foi le Taitai ma le Sui Taitai o lenei Vaega Faaupufai, manuia foi le tapuaiga a le tatou atunuu. Faafetai.

FOFOGA FETALAI: Malo faafetai saunoa i lau Afioga i le sui mamalu mo Faasaleleaga Nu.2. Ou te talitonu o lea ua tomua ia te oe saunoaga o le Tala o le Tupe. O lea ua avanoa le Maota mo se sui usufono e fia saunoa aua le Tala o le Tupe.

Tulai mai le sui usufono mamalu mo Vaisigano Nu.2.

Tofa MOTUOPUAA UIFAGASA AISOLI VAAI (Vaisigano Nu.2): Faafetai i lau Afioga i le Fofoga Fetalai mo le avanoa. Ou te fia faatalofa atu foi i le paia tele o le Palemene o Samoa i lenei taeao ua maua so outou ola ma so outou soifua laulelei i le alofa ma le agalelei o le Atua. Faafetai atu foi ia Samoa o lo o faafogafoga mai aemaise le Maota nei i e o ee ma papa aao i totonu o le Maota nei i Afioga i sui usufono faapea Faauluuluga o Matagaluega. O lenei taeao lau Afioga i le Fofoga Fetalai, e puupuu lava se manatu. Ua fesouai foi lenei taeao, na amata lava i le fesousouai, ee mai lena Itu, ee atu lenei Itu lea la ua oo mai ai se manatu i le lauga i lenei taeao, e sili ia ona ou lauga faa faifeau i lenei taeao ona toalua ai lea o faifeau a le matou Itu, o au ma se tasi o sui usufono mo Salega, Tofa Tapuai Toese Ah Sam. O le ma lauga lenei ma se tasi o sui usufono mo Salega, Tofa Tapuai Toese Ah Sam o le a fai atu.

Lau Afioga i le Fofoga Fetalai, o le matua o le lauga i lenei taeao, laa, laa laa, laa ma le faaeteete - walk with caution. I le Tala o le Tupe lea ua luma nei o le Maota Fono, ia faita nei lava tatou te vevesi i tupe ae o le matua manaia le Tala o le Tupe a si ou uso a Minisita na fai nei. Malo faafetai lau Afioga i le Minisita o Tupe. Ona pau o lea ua ou vaai atu ua tau televave le alu a le tatou Malo.

Na pau lava le mea ou te fautua atu ai, aua ne i tatou faataitai fua tatou i isi atunuu, ia fai lava tatou, aua tatou te faataitai fua ia Fiti. O Fiti e tele ana minerale, e tele ona eleele, tele ona tagata, e tele mea e tua i ai. Ia e faapena foi si tamai atunuu foi lele o Sigapoa. O Sigapoa e laitiiti, ae siosiomia e Asia, laa atu i i o Asia, laa atu i i o le tupe o Asia. A o tatou, e mamao le mea lea tatou te i ai, e fia afe maila le mamao, laa atu o le matafaga, tago atu po o fea le mea la e laa i ai, o le oneone le mea la e tu ai, laa atu tu atu o le matafaga, o le oneone foi le mea la e tu ai. O lea la lau Afioga i le Palemia, faifai easy le tatou Malo, aua le soona vave, faifaimalie.

O le Tala o le Tupe, o lea ua silasila atu ua siisii i luga. E tele Matagaluega lea ua siisii i luga, e pei o le Ofisa o le Soifua sa \$66miliona i le la tausaga, o lea ua \$77miliona i lenei tausaga. O Matagaluega uma lava ua faapena. E i ai la ma le Ofisa lea amata atu i le Afioga i le Minisita mo Leoleo ma Falepuipui. Po o le a le siisii i luga o le Tala o le Tupe, a le lelei le faatinoga e le afaigaluega, po o le faapapalagi foi lele, efficiency o le service, e maumau fua lava le taimi e siisii ai i luga le Tala o le Tupe, ona o le tele o Matagaluega ou te matau i ai, o le slack ia o le service. O le Matagaluega o

Leoleo lau Afioga i le Minisita, ia ua tatau foi ona siisii i luga lau Matagaluega, ua tatau foi ona toe tilotilo i metotia. A tatou vaavaai nei i mea ua tutupu mai nei i misaaga a tupulaga i nuu, leoleo ma tupulaga, o nuu ma nuu, o nuu ma le Malo. Pe le ua tatau loa ona taumafai e toe faafou a tatou metotia e pei o atunuu la. Silasila foi ia Niu Sila ma Ausetalia i aso ia, sa mumusu lava e faaauepegaina leoleo foi nei e feoi i le aualatele. Na matua tetee lava i ai tagata Niu Sila i aso ia i le 1960. A ua sau sau lava ua sui le olaga, a vaai ia Ausetalia, e vaai lava e feoi leoleo ma fana ma auupega foi nei. E pei la o le mea lea lau Afioga ou te le fai atu nei o le a faaauepega a tatou leoleo, ae mafau i ai. E pei la o le mea lea na tupu latalata mai nei i le va o tupulaga o nuu i le talafatai o Apia, fai mai ua o atu leoleo ua le mafai ona o. Ia ou te le tuuaia leoleo, o ai leoleo valea o le a o atu ma pulou foi nei a o la e tauai mai? A na o au o se leoleo ou te le alu. O le mea lea, e tatau ona fai mea nei o gears, e tatau ona fai ni training. E faapena lau Afioga i le Minisita mo Leoleo ma ia faa-efficient le service. Ou te manatua lava lau Afioga i le Minisita, ae le i faia le afa o Eveni, sa ou alu atu ai ma avatu lau laau malosi e lesitala. O lea ou te talanoa atu mo le efficiency o le service. Sa ou tusi foi i le Komesina ma ave lau... e oo mai lava i le taimi lenei, o lea o le a toe oo mai le tausaga atoa talu ona tupu Eveni, e le i iloa mai lava se tala. A fai atu ae fai mai na alu atu lava Eveni ua elea uma ai le fana i totonu o le latou ofisa. O leni lava ou te faatali lau Afioga i le Minisita. Na ou o o atu foi i lau Afioga ta talanoa, faafetai o lena lava e te taumafai e fai se faatatau i lea mataupu. O le uiga o lau tala, o le efficiency.

FOFOGA FETALAI: Malie lau Afioga i le sui usufono mamalu o lo o saunoa, sei tulai mai le Afioga i le Minisita mo Leoleo e tali atu i le saunoaga. Tulai mai lau Afioga i le Minisita.

Afioga Hon Sala Fata Lisati Pinati (Minisita mo Leoleo, Falepuipui ma Auaunaga tau Tinei Mu): Faafetai lava mo le avanoa e momoli atu ai lau faafetai i le sui usufono o lo o saunoa. Faafetai i timaiga ma fautuaga. O galuega a tatou e faapea, o a lava fautuaga e aumai, e talia ma le faafetai. O le faaaloalo ia e le tuua, o tu masani ma aga a tatou. A o fautuaga e pei ona tuuina mai, ou te manatu o lo o faapena ona sailiili i ai le Matagaluega nei ma malu o le Malo ina ia faapena ona ia maua tulaga uma e pei ona taua i mea ia o crisis foi ia o le faaauepegaina.

O vaega na, sei vagana lava se matuia o ni soligatulafono, ona oo lea i ai i se tulaga faapea. A o ia foi vaega, e tatau lava ona malupuipuia le faaaogaina o auupega. E saina foi e o lo o faauluulu i ai i le faaaogaina o ia vaega. Ae o le a faapena lava ona mataitu ma agaigai pea i ai le auaunaga.

O le taua o mea ia o le fana, e moni na afio atu lava le sui usufono ma talanoa, o le tuualalo lava foi sa faapea ona agai i ai lou nei tagata, e faapena ona faamalieina le sui usufono. O le fana lea e pei ona taua e le sui usufono, pe a ma USD\$7,000 ona e faapea o se winchester. Ia ona ia faatau mai lea o le fana, masalo pe SAT\$2,000 pe SAT\$3,000 na faatau mai ai le fana, ae peitai ane, ua avatu i le Matagaluega o Leoleo, e le iloa po o ai na ia faaaogaina. Atonu la o le itu lea, tusa o tala o lea ua aumai, ua leiloa le fana. A o lea sa tau saili po o le a se auala ina ia maua se tala maumaututu i le vaega lea. Ae pei lava ona ou fai atu i lou uso a sui usufono, o lo o faapena

ona fai pea sailiiliga. Ma ia lafo maia lou faatuatua ia te au, a faaletonu lava, ia pau i luga ia au. Ma lou faaaloalo lava.

FOFOGA FETALAI: Malo saunoa i lau Afioga i le Minisita. Ia sei tulai mai le sui usufono mamalu e faaauau le saunoaga.

Tofa MOTUOPUAA UIGAFASA AISOLI VAAI: Faafetai lava i lou uso a Minisita. Na pau lava le mea, e faafetai foi i lou amanaia o lou savalivali atu. Ae sa ou matamata i le parade a leoleo sa fai i le tutoatasi, ou te tilotilo atu i le isi fana, e pei lava o lau fana la e amo mai e le isi leoleo, ona ou alu lava lea i le fale ma le faanoanoa.

Lau Afioga i le Fofoga Fetalai, ona ou oo mai lea i le Matagaluega mo Galuega. Ou te faafetai atu lava mo mea uma na fai mo lou itumalo, sa talosaga mai ai. Ae i ai lava lau talosaga lau Afioga i le Minisita na fai i le Paeaiga lea na tea nei, sa ou tusi atu foi, o lea ua toe oo mai lava i lenei Paeaiga, o lea foi ua ou tusi atu i lau Afioga. Aua na ou tilotilo i tauofoga foi nei o le faiga o auala galue, pe 14 ea auala galue, e 13 le HRPP ae tasi lava na o si ou uso lea mai Faasaleleaga. Ia o lata talosaga o lea ua alu nei le valu tausaga ea lau Afioga faamolemole, se i e silasila ifo i le auala galue lea e alu i le matou aoga ma le vai ma le....

FOFOGA FETALAI: Malie le sui usufono o lo o saunoa, sei tuu atu le avanoa e tali atu ai le Minisita mo Galuega, Felauaiga ma Atinae Eseese. Tulai mai lau Afioga i le Minisita.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseese): Lau Afioga i le Fofoga Fetalai ma le maualuga o lenei Fonousu, o le tau matau atu i le saunoaga a le sui usufono mamalu e pei e agai i le tulaga foi lele o le faaso. A o le faaso o lea e tau aumai ai e faapea o le itu lenei a le Malo ma le Itu Agai. A o le faaso, e fua i sui usufono mamalu o le Palemene, e 49 e o lo o i ai, na faatoai mai, ae le gata i lea, e i ai nisi afioaga e afifio mai alii ma faipule, ae le o auala mai i sui usufono mamalu e talosaga mai. E pei foi ona faamanino atu, e le i lalo ifo o le 100 i le 150 le aofai o auala o lea e fia fausia ma faaleleia. O isi sui usufono e toeitiiti o o i le 10 auala galue o lona itumalo. Ae le o fua i ni Vaega Faaupufai. E leai, o lea e fua i sui usufono mamalu ma le loaloa o le atunuu o lea e afifio mai ma talosaga mai mo galuega e fia faaleleia auala galue aua atinae. Ma le faaaloalo.

FOFOGA FETALAI: Malo faafetai. Ia tulai mai le sui usufono mamalu e faaauau le saunoaga.

Tofa MOTUOPUAA UIFAGASA AISOLI VAAI: E faafetai atu i le Afioga i le Minisita, ua saunoa o nisi e omai alii ma faipule, ia a o lou itumalo, na ou fai i ai e aua tou te omai o lea e i ai le tou sui usufono e alu e fai mea na. O le mea lenei na ou sau ai i le Palemene. Ae faafetai atu foi i lau Afioga i le Minisita, e sao lava lau Afioga o lo o i ai... Ae o lau talosaga lea ua valu tausaga. Na ona toe soso atu ai i lau Afioga, se i toe tagai ane. O lenei foi e i ai tusi sa avatu i lau Afioga se i toe silasila ane i ai. I lou ava ma lou faaaloalo.

Ia, faamolemole lava lau Afioga i le Fofoga Fetalai, ae a pe a faamalie i Minisita e aua ne i toe tali mai sei uma lau folasaga, ona alu ai lava lea o lou taimi. Ae sei oo i le taimi e tali mai ai Minisita ona tali mai lea faamolemole. E tele mea ou te fia talanoa i ai, ae tauau ina uma i le tutu soo mai o le aualii lea e tutu mai i i.

FOFOGA FETALAI: Malie le sui usufono o lo o saunoa, sei tuu atu le avanoa i le tali atu a le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, e tataua ona matou tutulai atu pea leaga o lea ou te iloa na ou alu atu tatala ou auala e lua, ae ou te le iloa la le tasi lea e aumai, o lona uiga o le a tolu ai ou auala. O le mea e sili ona taua le mea lea e saunoa i ai le sui usufono. O le Vaega lenei, e 37. O le 76% o Nofoa o le Palemene o lea e iinei. E le faapea la a tele iinei ona le fetau lea. E fuafua i le tele o sui usufono ma le tulaga o le moomia. A o le faalavelave lena, e le faia i ni tusi ni mea, e tataua foi ona fai ma e savalivali mai oe, o le mea foi lena o la e fai e isi sui usufono o le savalivali mai ma faamanatu. A o le mea lena o lou nofo ma aumai le fasi laupepa, o le mea lena e oo i lau fasi laupepa o le aumai toe faaopoopo mai ma le 15 o isi fasi laupepa o talosaga, ona agai lava lea i lalo ua 16 loa au fasi laupepa. A o le tulaga lena, e le taofia le tutulai atu o sui usufono e tali atu ina ia faamanino atili lau mataupu. Ma le isi mea, e fua na o le auala, e fuafua e le Malo o la e foi e fai isi mea e ese ai mai auala.

FOFOGA FETALAI: Malo faafetai. Ia tulai maia le sui usufono mamalu e faaauu mai le saunoaga o lea ua tali atu le tatou Malo.

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai o le mea e fia faasao, e le tolu ni auala galue o le matou nuu, na o le tasi lava le auala galue o le matou nuu, a o le auala galue foi na fai ae ou te le i avea ma sui usufono. Ma le faaaloalo. E le faapea foi na o tusi, na ou oo foi i Minisita ma ou talanoa i Minisita. O lea la ou te fai atu, e le faigofie foi ia te au, e tausaga lava ma le tusi, e oo foi i Minisita ma talatalanoa. Na ou lauga atu foi iinei, ae tuuaia ia. O le a tuu atu pea i lau Afioga i le Minisita.

FOFOGA FETALAI: Malie ia le finagalo o lau Afioga. Ou te lagona o lea ua lagona. Malie le sui usufono o lo o saunoa sei tuu atu tasi lava le avanoa i le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala: Lau Afioga i le Fofoga Fetalai, o lea na saunoa le Palemia i le tulaga o le faasoa. O le faasoa afai ua fai le suavai, ia ua tau fetuunai faapena, ua fesoasoani i le suavai ae faamulimuli le auala. E faapena ona faasoa, ou te iloa o se faasoa talafeagai lena e agai i ai le tatou atunuu. O la e ua au i Sataua le faatinoina o le suavai e pei ona aumai ai lana talosaga ae tele lava magaala i le matau i ai ma aiga o lo oi ai, ae lafo maia.

FOFOGA FETALAI: Faafetai. Ou te manatu ua faamalieina le faalogologo a le Nofoa le sui usufono mo Vaisigano Nu.2, o lea ua fai le isi talosaga ae taatia le isi talosaga sei aulia le isi taimi. Ae tulai maia e faaauau lau lauga.

Tofa MOTUOPUAA UIFAGASA AISOLI VAAI: Ia, e le afaina. O le vai o le matou nuu ua leva ona i ai.

Lau Afioga i le Fofoga Fetalai, ona ou oo mai ai lea i le Matagaluega mo le Soifua Maloloina. Ia lou uso a Minisita o lea ua ou vaai atu ua siisii i luga le Tala o le Tupe. O lau tilotilo atu i ai ua manaia le Falemai fou, e pei ua ou vaai i ni taj mahal i le manaia o le Falemai. Lau Afioga i le Minisita, na ona tuu atu lava i ou tafatafa o le tatou Falemai o lo o i ai ma le Iunivesite o le Aoga faa-Fomai, tusa o le tatou Falemai ua avea nei ma teaching hospital. O lona uiga a teaching hospital ua le University level.

O le mea lea i lau Afioga i le Fofoga Fetalai, e manaia la pe a atoatoa uma lava mea...ae toe itiiti lava atoa lelei a o lo o manaomia lava le siitia o le auaunaga Faata, e manaomia se tatou radiologist. E lua lava mea taua e fesoasoani ai i Fomai i le diagnosed iga o mai po o le suesuega ina ia maua ai le tonu po o le a le gasegase o le ma'i, o le Laboratory po o le Fale Suetoto ma le Faata. A le lelei nei mea e lua ua faale-lelei foi le tatou service.

O le mea lea lau Afioga i le Minisita e manaomia se tatou radiologist, aua o le tele lava o Faata na ona oka lava o le Faata sau le mai ma aumai le faata ua faitau lava e ta ita lo ta faata. O se mea lelei foi ae manaomia lava le professional opinion o se tatou radiologist faapea foi a tatou per radiologist e lipotia anthological specialist pe a avatu i le Fale Suetoto. E pei foi ona saunoa se tasi o sui usufono e fai ai ma taotoga o e ua maliliu i se faatonuga mai le Matagaluega o Leoleo po o le Matagaluega o Faamasinoga ma Pulega Tau Faamasinoga. O lo o maitauina pea le siisii i luga o le koko maualuga ma le suka lau Afioga i le Minisita, ua ou vaai atu foi ua siisii i luga le Tala o le Tupe. O atunuu uma o le lalolagi e fai paaga le Malo ma Fomai Tumaoti, Private Practitioners o i latou na e amoina le tele o le galuega o le Matagaluega o le Soifua Maloloina....

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E le logo lelei ia te au le saunoaga soona lafo lea na fai mai nei e le alii Fomai (*faasino i le sui usufono mo Vaisigano Nu. 2*) ona e le sao i le tulaga lea o lou alu atu lava o au fai lou faata ona ou sau a lea o au faatau lau faata. Ou te le malamalama ai i lea tulaga, e i ai Fomai e te avea i ai le ata lea e faamatata mai ai ia te oe, ae le alu atu ta ita e alu atu i inei i o, o le uiga lea ma le faauigaina o le saunoaga, a e alu atu lava so o se isi lava o i matou nei e fai le faata ona e sau a lea o oe ma e nofo ma faauigaina. E faapefea ona ou faaiugaina ni mea faapea e le o au o se Fomai, atonu e tataua ona saunoa i ai le Minisita mo le Soifua Maloloina i lea itu.

FOFOGA FETALAI: Mo le faasaoina o le taimi o le sui usufono mamalu sei tulai mai le Afioga i le Minisita mo le Soifua Maloloina e tali atu.

Afioga Hon Tuitama Talalelei Tuitama: Lau Afioga i le Fofoga Fetalai sa ou manatu ona e tele nisi o vaega o lo o laga e sui usufono se i matua osi lelei se tali e aofia uma ai nei vaega, ona o lea e maitau atu ua tau lalata ina uma le taimi o le sui usufono. O lea ua saunoa le Afioga i le Palemia ma ua ou manatu foi ua tataua ona fai se faamalamalama o lea vaega. O le tulaga i le Faata i le taimi nei ua i ai le Fomai o lo o ua aoga i fafo mo le tomai faapitoa mo le faitauina o faata. Ia manatua foi o le tulaga o le aoaoga faa-Fomai o le tasi lea vaega o le aoaoga e faitau faata ina ia iloa po o le a le uiga o le ata lea e vaai i ai i le faata, o le tasi lea vaega o aoaoga faa-Fomai. O so o se Fomai lava ua tele lo latou tomai e mafai ai ona iloa faamai po o le pneumonia, po o le suavai ua toa i le afuafu o le mama po o vaega o le mama ua aafia i le siana po o le TB, po o le foliga mai o se cancer po o se mama foi ua faaleagaina ia i latou e ulaula tapaa ma ua poloka ai le ea ona ua papa tamai mea laiti e pei o ni mapu ia e tau o areolas.

A oo ina papa ona ua afaina i sikareti ma faamai ma soo faatasi ona avea lea o se bubble po o le paluni i totonu o le mama ma faoa uma ai le vaega o lea mama e fesui ai le okesene mai le ea ma toe manava i fafo carbondioxide. O so o se fomai lava e iu mai o i latou na e i ai le tomai e mafai ona silasila i ai ae i ai vaega o Faata Faapitoa e pei o faata e vaai ai vaega e afaina o le manava po o..., i ai foi faata ia e tau e tatou o ultra sounds, o lo o ua i ai foi a tatou technicians le tomai i le vaaiga o ultra sounds o lo o faaoga e le falemai. O le taimi nei foi o lo o ua i ai le tatou CT scan o le tasi lea ituaiga faata o lo o tatou faaogaina, o le faalavelave o le tatou CT scans o lo o i ai i le taimi nei e na o le tasi le slice. E tusa e vaevaeina e le faata lea itutino o le tagata e mafai ona pikiina tamai lesions laiti o lo o i totonu o le mama.

O le taimi nei i Niu Sila ua oo i le 64 slicers o le CT scan o le tulaga lea lau Afioga i le Fofoga Fetalai ua....

FOFOGA FETALAI: Malie lava lau Afioga i le Minisita – o le a le mea e fia faamalamalama?

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama. O le a alu le taimi o le sui usufono i le saunoaga a le Minisita. O le mea ou te tulai atu ai o le tele o le lauga ae a silasila ua savali i le 10 minute le saunoaga ae pe le mafai ona tau tuu mai i le taimi lenei se i oo i le taimi o lana tali.

FOFOGA FETALAI: O lea ua ou maua lau Afioga i le Taitai o le Itu Agai le faautautaga, tuu mai pea le taimi o au lea e time keeper. Ia taatia mai pea lau galuega, e ala ona tuu pea le avanoa ona e taua le mea o lo o saunoa i ai le Fomai (*faasino i le sui usufono mo Vaisigano Nu. 2*), ae a na ua tulai mai le sui usufono mo Vaisigano Nu. 2 ma faapea mai ua malie ua ou talosaga i le Minisita, ae ona o lo o usi pea le faafogafoga, ona o le mataupu lea e tataua ona faamalamalama ona o le masina fou tatala le Falemai fou. E tataua ona matua faamalamalama le Afioga i le Minisita leaga o le Faata o le tasi lea....

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai, malie ia le Afioga i le Minisita sei faaauu atu lau lauga?

FOFOGA FETALAI: Afai o lena ua malie lau faafogafoga le sui usufono na saunoa i lea mataupu, ia o lea e faafogafoga mai le Minisita. Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le ala lea na ou tulai atu ai ona o le tala tuulafoai a le sui usufono po o le Fomai na lauga e faapea lana tala. “O le taimi nei e te alu atu lava oe fai lou faata ona e sau a lea o oe faitau lou ata”. O se lafoga matuia tele lenei aua o lona uiga a ou alu atu i le Falemai ma pue lou ata ona fai mai le sui usufono, ona ou sau a lea o au ma faitau lou ata. E faapefea ona ou faitauina ou te le iloa? O le uiga la o le saunoaga o le faaleaga i galuega o lo o fai, o le faaleaga le mea lea sa fai. O lea sa ou tapa ai le Minisita mo le Soifua Maloloina sei aumai sana saunoaga e faamalamalama i le atunuu. E le faapea o oe o le Itu Agai ona e tulai mai lea e saoloto e faapogisa le atunuu. O lea la ua faamalamalama mai e le Minisita mo le Soifua Maloloina ma ua malamalama a o lea e le i maea ona e taua la matou faalogologo i lana saunoaga e faigofie ai. Ae ana le saunoa nei le Minisita e oo nanei ou fai atu, alu e fai lou faata ae fai mai e faapefea ona ou alu e fai? O la ua tau mai i tai i le Palemene e leai lava se isi o agavaa o i ai i uta. Ia silasila i le matua matautia o le faaleagaina o le tautua a le Soifua Maloloina o lo o faia nei, se i maea pea le saunoaga a le Minisita i le mataupu lea ona faaauau ai lea o le saunoaga o lena e te faatulagaina lona taimi.

FOFOGA FETALAI: Malie lau Afioga i le Minisita, sei avatu le avanoa i le sui usufono mamalu e saunoa leaga o ia e ana le matauu i le tulaga tau le Faata lea e te taumafai e faamalamalama mai. Ia sei tuu atu le avanoa i le sui usufono o lea ua aumai le faasaoga a le Minisita.

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai, masalo a le o leaga le faalogo a le Palemia po o ua leaga ona taliga po o le le malamalama. Lau Afioga i le Minisita, a uma le Fono ona e faamalamalamaina lea i le Afioga i le Palemia le uiga o lau tala na fai. E aumai a e le Fomai i uta i le faata, a i ai se mea e complicated o le mea lena e manaomia ai le radiologist lea ou te talanoa atu ai. Ae sei ave le Afioga i le Palemia sei vaai se Fomai Taliga ou te iloa ua leaga lana faalogo.

FOFOGA FETALAI: Ua maua le sui usufono mamalu, sei tuu atu le avanoa.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E sili ona faa-alaala mai i lalo le sui usufono, e aliali mai i i o le alii Fomai ua moomia se fesoasoani. O le mea lea ua aliali mai ua galo ia te ia ana faaupuga, o ana toe upu upu “o le mea lea e fai nei e te alu a oe e fai lou faata ma e sau a oe faitau lou ata”. O nei ituaiga saunoaga tuulafoai faapea? O le le mafau, o le tau faaleaga i galuega a le tatou Falemai a o oe sa e i ai i uta.

Tofa MOTUOPUAA UIFAGASA AISOLI VAAI: Lau Afioga o le matautia o le mea lea ou te faia nei....

FOFOGA FETALAI: Malie le sui usufono, sei maea atu le saunoaga a le Afioga i le Palemia, ia tulai mai.

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai, o anafea lava na e alu atu ai e te alu e fai sou faata ona e sau lea e fai i le Fomai o lou ata lea e faapea ma faapea, se a e maua mai le uiga o lau mataupu lea o le a uma ai ma lou taimi....

FOFOGA FETALAI: Malie le sui usufono o lo o saunoa, sei tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga o lo o ou tuituliloa le saunoaga a le sui usufono, leai e i ai e matau upu e i ai foi e faalelefulu. O lea ou te nofonofo ma maitau lelei lava au saunoaga, sei maea le faasilasilaga a le Afioga i le Minisita ona toe tuu atu le a e faaauau, o lena ua e popole. O le mea lea ua aliali mai o oe le isi Fomai pepelo lea e i ai, ae se i uma le saunoaga a le Minisita.

FOFOGA FETALAI: Faafetai i lau Afioga i le Palemia, ou te manatu lau Afioga i le Minisita e leai se isi faamalamalamaga i luga atu o lau faamalamalamaga. Ou te talitonu o lo o ua tulai mai le sui usufono e tau faamanino atonu ai o lape o lauga le fesetai i upu na lafo a o lea foi e maua e le Nofoa le tulaga e pei ona saunoa i ai le Palemia.

Tulai mai lau Afioga i le Minisita e faamalamalama ma faaiu mai le mataupu ona toe faaauau ai lea o le saunoaga.

Afioga Hon Tuitama Talalelei Tuitama: O le a ou taumafai e faapuupu masalo pe toe 30 nai minute ona maea lea.

FOFOGA FETALAI: Ia malie o lenei e tau faasoasoa e anoa le mataupu a le sui usufono mamalu.

Afioga Hon Tuitama Talalelei Tuitama: Lau Afioga o le taimi nei o lo o faatali le tatou CT scan e 16 slice mo le Falemai fou ina ia faaleleia atili ai le auaunaga o le isi lea ituaiga faata. O le tulaga i le siitia o le tomai o o tatou lava Fomai faatasi ai ma tamaiti aoga e pei ona taua e le sui usufono, o le faamoemoe o le Falemai fou lea na fai o le igoa o le Teaching Hospital, o le faamoemoe o le falemai lea, o le igoa o le falemai o le Teaching Hospital. E sao lelei, o le faamoemoe ina ia aotauina ai tamaiti ia e faamoemoe i ai ina ia faaleleia o latou tomai faa-fomai o lo o aoga ai nei i le OUM.

Ua lua nei tausaga talu ai ona maua mai le isi fesoasoani mo le falemai ma le Aoga faa-Fomai, o le televise foi lea e mafai ai ona talanoa i fafo ma sa faaogaina la le mea e tau o le tele-conference. Sa faaogaina la le televise lea ma o lo o faaoga lava e fai mai ai lectures a fomai faapitoa mai Amerika i Utah mo o tatou fomai, e le gata i o tatou fomai ae atoa ai foi ma tamaiti aoga i le OUM. O le tausaga talu ai na fai ai le course, o le radiology course po o le aoga mo le faitauina o ata o le faata. E tasi le vaiaso na fai ai le course lea, ona o ane lea o fomai faapitoa o Amerika fai mai ai aoga i luga i le televise lea, ae o atu uma i ai fomai o lo o faigaluega i le falemai e toe

upskill ai a latou ability e mafai ai ona faitau ata ma malamalama ai i foliga faigata o ata o le faata. Ua tele la le tomai ua maua nei e o tatou fomai e ala i lea aoaoga na faia i le course lea faatasi ai foi ma a tatou tamaiti fomai.

Lau Afioga i le Fofoga Fetalai, o le taimi nei e ui lava ona e le o i ai se tatou radiologist po o se fomai e faapitoa i le faitauina o ata o faata, a o lo o mafai pea ona access tatou i tomai mai fafo ia i latou e faapitoa i le vaega lea aua e mafai ona faaoga le service lea i le televise e tilotilo i ai, ae faitau mai e latou le ata. E mafai foi ona lafo a tatou ata i Niu Sila ona aumai ai foi lea o se second opinion.

Lau Afioga i le Fofoga Fetalai ma le mamalu o le Maota, e le o tuulafoaia le atunuu i le auaunaga lea e ui lava ina e le o i ai se tasi o tama fanau a Samoa. Ia manatua foi sa i ai o tatou tagata ae ua tuua le atunuu ona o nisi avanoa ua latou maua i atunuu i fafo e tele ai o latou tamaoaiiga, faapea foi ma nisi ua fai i lagi le folauga sa galulue ai i tulaga faapitoa i le radiology e pei o le afioga i le alii fomai ua afu le tautua sa auai atu i ai le malo, le Afioga Afamasaga Sila. O se auauna ua loa lona soifua i ituaiga faata eseese sa faalagolago i ai lo tatou falemai i lona tomai.

O se faamalamalama lea mo le taimi nei, ae tele lava se vaega o lo o totoe pea atonu o le a ou toe agai i ai i se taimi mulimuli. Ou te fiafia foi i lenei avanoa ua maua ina ne i te i foi ua toe laga mai e se isi le mataupu lava lea e tasi, a o le tulaga lena lau Afioga i le Fofoga Fetalai.

FOFOGA FETALAI: Malo faafetai le saunoa malamalama i lau Afioga i le Minisita mo le Soifua Maloloina. Ia malu ave i fale foi i le saunoaga a le sui usufono mamalu. E le faatumutumu lima pe faatemeteme le tali atu a le Malo i tulaga tau le soifua maloloina. O lea ua talatala ma le la le finagalo o le Afioga i le Minisita, ma e manatu e le toe fesili lava se isi o outou i mea tau le soifua maloloina ma e le mafai ona motusia a o faamalamalama se mataupu ina ia matua maioio, ma manino lelei outou finagalo.

Tulai mai le sui usufono mamalu e faaauau le saunoaga.

Tofa MOTUOPUAA UIFAGASA AISOLI VAAI: Faafetai atu lava i lau Afioga i le Fofoga Fetalai, e faafetai foi i le Afioga i le Minisita mo le lauga umi lava ma le faamalamalama o le mataupu. E ui lava ona ua faoa le tele o lou taimi, ae e le afaina. O le mataupu lava lenei i se tatou fomai faapitoa o le faata e taua tele. E tele ina ou taua tele ona o i ina e faalagolago i ai sutesuga a fomai. E le na o le faata foi le galuega a le fomai faapitoa e fai, ae i ai foi isi procedures na te faia. E pei o le faanaunaga lea o lou sui usufono ina ia maua mai se tatou fomai faapitoa faapea.

Na ou faalogo foi i se alo o le atunuu na ave i fafo e aoaoina faapitoa i lea matata, ua ou faalogo atu foi atonu pe moni pe e le moni, e faapea ua sui foi le mataupu ua alu agai i ai, a o le taimi nei lau Afioga i le Minisita, pe e le maua mai lava se isi se i fesoasoani mai ia i tatou mo lenei vaitaimi ona o lo o tau sutesue atu le tele o gasegase e le o mautinoa e fomai po o le a le pogai.

Sa uma lau lauga ua oo i le mea lea o le suka ma le toto maualuga lau Afioga i le Fofoga Fetalai ona ua tuputupu pea i luga. Masalo o le isi sefulu tausaga o i luma pe ua ova atu i le 25% i le 30% o lo tatou atunuu ua maua i le suka ma le toto maualuga. O lo o ou vaaia pea i totonu o lau Clinic le tele naunau o i latou ua maua i lea tulaga ma e oo lava i tamaiti i lalo ifo o le 21 tausaga ua maua i le suka ma le toto maualuga. O le mea lea e fai lava sina

fefeu o le mea o le a oo i ai lo tatou atunuu. O lea la e pei ona talanoa atu ai pe e le i tatau ona vaavaalua le Malo ma le private sector, ae tuu mai le suka ma le toto maualuga ma isi gasegase o lo o vaai i le out-patient e faatino e fomai tumaoti e pei o le tele o atunuu ia. O le backbone lava lena o le health service i le tele o atunuu i mea ia o gasegase faa-general out-patient, ina ia fai lava e general practitioners po o fomai tumaoti. E talosaga atu ai i le Malo lau Afioga i le Minisita, se i tilotilo ane i lea itu pe mafai lava....

Afioga Hon Tuitama Talalelei Tuitama: Lau Afioga i le Fofoga Fetalai....

FOFOGA FETALAI: Malie lava le sui usufono o lo o saunoa, sei toe tuu atu le avanoa i le Afioga i le Minisita.

Afioga Hon Tuitama Talalelei Tuitama: Lau Afioga i le Fofoga Fetalai, e leai se manatu e faalavelaveina le saunoaga matagofie a le sui usufono. Ona pau lava lea ona o le mataupu lea e saunoa i ai, o le tulaga tonu lava lea o lea e fai e le Malo.

O le taimi nei o lea foi sa ou sainia contracts a fomai tumaoti o lo o galulue nei o la e faasolo i nuu i tua e follow up le village health care lea na fai sa faatupe mai e le Malo o Ausetalia. O le taimi nei la o lea e galulue fomai ia e \$200 i le itula lea e totogi ai fomai tumaoti ia e faia le galuega lea. O le tulaga lea e fai e le Matagaluega o le taumafai e faaitiitia le faamai oti o le NCDs po o non-communicable diseases. O le taumafaiga lea e agai i ai le Malo ona ua uma ona i ai le faaiuga a le United Nations Assembly ia Setema o le 2011, na saini ai le Political Declaration ma o i ina na amata mai ai taumafaiga nei a le Malo, e oo mai i le taimi nei o lo o faatino pea ma faasolo i nuu i tua o lo o galulue ai fomai tumaoti e follow up mea ia o mai suka ma toto maualuga. O le target lava lau Afioga i le Fofoga Fetalai lea e galulue ai le SPAGHL. O lo o galulue foi le tatou Palemene i le tulaga lea i le taumafaiga foi lele e faalauiloa le matautia o mai ia e le pipisi.

O le tulaga lea e galulue ai nei le SPAGHL e i ai a latou asiasiga ia e tapisa ai nei i lo tatou atunuu e o i aoga ina ia faaitiitia faguinu suamalie, o meaai ia e taua e tatou o twisties ma meaai gaoa ma meaai uma faapena lea sa fai ai le galuega a le SPAGHL po o le Samoa Parliamentary Advocacy Group for Healthy Living.

E pei la o le agaga lea e ala ai ona ou tulai atu ina ia aua ne i faalavelavea ai le taimi o le afioga i le sui usufono ona o mea tonu lava na o lea e agai i ai le faamamafa a le Malo i le taimi nei. Ua uma ona tatou ioe faatasi i le maliega i le Political Declaration lea la e address ai vaega ia e hypertension and diabetes.

Ma le faaaloalao tele.

FOFOGA FETALAI: Malo faafetai saunoa faamalamalama lau Afioga i le Minisita. Tulai mai le sui usufono mamalu e faaauau le saunoaga.

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai, faafetai i le Afioga i le Minisita. O le mataupu lava lena sa ou laga foi i le Fono talu ai lau Afioga i le Minisita, sei toe silasila ane i ai lau Afioga ma le Matagaluega i le mataupu lea i tagata ia e penisione, ua 65

tausaga agai i luga lea e avefua a latou vailaau i le fale talavai. O tagata matutua foi ia ua fai ifo o latou soifua, a o lea ou te talanoa atu i tamaiti laiti e i ai pepe mai le 3, 4 i le 5 tausaga. Pe e le o i ai se fuafuaga a le Malo ae faamama foi le avega i tina aua o le taimi lea o le maaleale o le soifua o le tamaitiiti e le i lava sona malosi e tetee atu ai i faamai. A avatu la le talavai i le tina e pei e tilotilo le tina pe lava sana tupe e tala ai vai mo si ana tama, ae na o le 3 pe 6 masina le matua.

Afioga Hon Tuitama Talalelei Tuitama: Lau Afioga i le Fofoga Fetalai, o le mataupu lea sa laga foi e le sui usufono i le fonotaga talu ai.

FOFOGA FETALAI: Malie le sui usufono, sei tulai mai le Afioga i le Minisita.

Afioga Hon Tuitama Talalelei Tuitama: O le taimi nei o lea ua uma ona faatalanoa e le Matagaluega le vaega tonu lava lea e saunoa i ai sa faatupu manatu ai le afioga i le sui usufono ina ia vaai fua tamaiti laiti ma maua fua a latou talavai. O lo o galulue nei le Matagaluega i se faiga e mafai ai ona faatino aua o se faiga lelei. E logo i tino matagi lelei pe a aumai fautuaga lelei e aoga mo lo tatou atunuu ma le soifua manuia o tagata o Samoa, e talia ma le faafetai.

O le agaga lea na ona logo atu i le Afioga i le sui usufono ona o lea o le a toe agai i ai lana saunoaga, o lo o galulue ai nei le Matagaluega i se faiga, ia manatua foi, o le vaega lea i le paketi lea sa tatalo ai nei. E tatau lava ona i ai se isi vaega e toesea ae faaopoopoina i se isi vaega ina ia tumau pea le aofaiga o le seleni o lea e faaoga. O fetuunaiga la ia o lo o galulue ai le Matagaluega i lea auala e mafai ai ona faatino le manatu matagofie lea sa faaalua i totonu o le Maota leneni.

O lau faaaliga lea ma le agaga faaaloalo lau Afioga i le Fofoga Fetalai.

FOFOGA FETALAI: Tulai mai le sui usufono e faamaea le saunoaga ua maea lou taimi.

Tofa MOTUOPUAA UIFAGASA AISOLI VAAI: Lau Afioga i le Fofoga Fetalai, o le tele ia o mataupu ia e le i taitai uma, ae ua toso, toso o lea ua uma lou taimi. Ua uma foi lou fia lauga. Ua uma lau lauga lau Afioga i le Fofoga Fetalai. Ia manuia le Fono.

FOFOGA FETALAI: Malo saunoa i lau Afioga i le sui usufono mo Vaisigano Nu.2. E faafetai atu foi i le Afioga i le Minisita i le taumafai e tali mai le Malo mo ia mataupu, a o le agaga lava ma le faamoemoe e taumafai pea e tautata i le moa o le ala i le tulaga i le faatonutonuina o a tatou galuega ina ia taatia i lagatonu le fesili mai ma le tali atu a lo tatou Malo. O le ala foi lena o le taumafai e tuu atu le avanoa i a outou Afioga i Minisita, ae tatalo atu foi ma le faaaloalo ona o taimi faatulagaina ina ia tali mai, ae ia tali mai foi mo le faapuupuuna o le taimi ina ia lelei Tualumaga o le Fono.

Afioga Hon Palusalua Faapo II: Lau Afioga i le Fofoga Fetalai, o le mea e fia faamalamalama.

FOFOGA FETALAI: Sei tuu atu muamua le avanoa i lea Itu o le Maota. Sei tulai mai lau Afioga i le Taitai o le Itu Agai.

Afioga Hon Palusalue Faapo II: O lo o manino lava i Tulafono Tumau e i ai lava le avanoa i Afioga i Minisita e tali mai ai. O le mea lea e tupu i lauga a lenei Itu ua tele ina fao e faauilavea. O lea e saunoa le Afioga i le Palemia e le mafai lava ona matou nofonofa ai ae tatau la ona teuteu le Tulafono Tumau ina ia atagia ai mea ia e saunoa ai le Afioga i le Palemia, e fai faauilavea i taimi uma. A o le Tulafono Tumau lava ia i le taimi lenei, e i ai taimi e saunoa ai Afioga i Minisita e tali ai. O le ala foi lea o le toso o tatou fonofono aemaise o saunoaga a lenei Itu ua tele lava ina faoa taimi....

FOFOGA FETALAI: Malie le Taitai o le Itu Agai, sei tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le taofia le aia a so o se sui usufono e laga se mataupu i lalo o mea e fia faasao.

FOFOGA FETALAI: O le ala lena lau Afioga i le Taitai o le Itu Agai....

Afioga Hon Palusalue Faapo II: Lau Afioga i le Fofoga Fetalai e le o se mea e fia faasao mea e fai mai ai.

FOFOGA FETALAI: Onosai mai sei fai atu le tala lea le Taitai o le Itu Agai. O lea na ou faafofoga nei ua ave lau tuualalo i le la Itu o le Maota. Ua uma ona fai nei le mea lea e te atugalu i ai. E tatou te seu silasila foi i le taumafai e faapupula atu manatu ma finagalo o lena Itu o le Maota ma nisi o sui usufono ao lea foi ua ou tatalo i le Kapeneta ina ia lauama tootoo ma faataatia i le agatonu ia faapuupuu mai faamalamalamaga ao lo o maua foi taimi i le taimi mulimuli e tali ai le Kapeneta ae le mafai ona taofiofia le tali a le Malo ia outou silafia le mea lena. O le taimi e tulai ai saunoaga ma fetalaiga i se mea e faamalamalama pe fia faasao o lea e avanoa le mea lena mo le taimi o tatou felafolafoaiga. Ao lea ua ou tatalo i le Kapeneta ia alofagia ona o le tulaga o taimi faatulagaina ia maua pea le avanoa o sui usufono e faaleo ai o latou manatu.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, na umi lava lau tautalaga i le taeao i le nei i le mataupu lea. O le tulaga lea, a sao lava le sau o le saunoaga e leai lava ma se matou faalavelave pe a sau sao lava ma aumai sao fautuaga. Ae a i ai loa se mea matou te lagona ua fesiligia ma tauvatea ai le Malo ma le faatinoga a le Malo, e tatau loa ona matou tulai atu e faasao. O le mea tele lava le mea lea sa saunoa i ai le sui usufono mo Vaisigano Nu.2 mo se faataitaiga. O lea la ua fetamiai solo ae matua manino lava. E pei foi ona ou fai atu ia te outou aua tou te faaoloataua, aua a matou liliu loa e faaoloataua o le atalii lava o le tou faaoloataua le matou faaoloataua. O le mea lena matou te inoino ai e fai ae ala ona matou tulai atu ona o lena e momono mai tou saunoaga i mea e le sao ma e tatau ona matou tulai atu e faasao.

FOFOGA FETALAI: Ou te manatu ua malamalama lea mataupu. E faamalulu atu foi i lau Afioga i le Palemia ma le paia o le Kapeneta. O le agaga foi o le taumafai atu o lea Itu ina nei mea ane ua faomalo i taimi o sui usufono. O lea ua uma ona ou fai atu lau Afioga i le Taitai o le Itu Agai, e lava papale mai pea o lea ou te faasoaso atu ma e le tasi, le lua ni avanoa e tele o lea foi tatou te lei oo i le tulaga o le iloiloga auiliili ona faapena lea ona toe maua nisi avanoa mo sui usufono mamalu.

Tulai mai lau Afioga le sui usufono mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga): Faafetai i lau Afioga i le Fofoga Fetalai mo le avanoa. Afio lau Afioga i le Fofoga Fetalai, afio lau Afioga i le Palemia ma Minisita o le Kapeneta aemaise o sui usufono mamalu o lenei Maota. Faatalofa atu foi i lau tapuaiga Samoa i le afio o Lana Afioga Mamalu O Le Ao o le Malo, lau Afioga i le Tui Atua ma lau Masiofo, afio lau Afioga i le Sui Ao, lau Afioga Tuimalealiifano ma lau Masiofo, afio lau Afioga i le Faamasino Sili ma le Vasega o Faamasino o le Faamasinoga, afifio le Aufaigaluega Paia a le Atua o lo o faanonomanu aua se manuia o Samoa. O le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Lau Afioga i le Fofoga Fetalai, ou te fia faaoga foi lenei avanoa e faatalofa aloaia atu ai i lou itumalo o Sagaga le Usoga o le Nofoalii o le Malietoa. Afio Saena ma le Aiga Sa Saena, afifio Alo o Fuatino, afio Tuitea, le mamalu ia Tupailasa ma le Fale o le afu o le Alataua, afio le paia o le Aiga Sa Gaufaleai, lo oulua toalua Fata ma Maulolo o le vagana tualafale ma le mamalu ia te Oe Tuisamau. Afio Sa Maualaivao ma le mamalu ia te oe Faamausili, afio Taito, susu Seiuli, le mamalu ia te oe Pou e fitu o le Fale o Malietoa ma Upu ia te Oe Auimatagai.

E muamua ona momoli le faafetai i le Minisita o Tupe ma le mamalu o le Matagaluega mo le galuega fita sa fegai ma latou. E fia faaleoina le lagolagoina e lou nei sui usufono o le Tala Faatatau Faaopopo o Tupe (Nu.2) 2012/2013 ma le Tala Faatatau Autu o Tupe 2013/2014.

Lau Afioga i le Fofoga Fetalai, e fia faamuamua atu nai manaoga o lou itumalo. E le tele lava aua o le itumalo lenei e le o se itumalo e tagisa ae lau Afioga i le Fofoga Fetalai e auala atu i lau Afioga i le Minisita mo Galuega, Felauaiga ma Atinae Esee, o auala galuega lava, auala galue i Tuanai faapena foi nisi o tulaga tau eletise o lo o i ai le faaletonu i nai aiga e lei oo atu i ai le eletise. O le auala i le tolotolo i Afega, ua tele ina faaletonu ma omoomo ma ua manaomia le toe faataina faapea foi le auala galue ma le eletise. E momoli atu le faafetai a le matou nuu o Malie i le Minisita mo Galuega, Fealauaiga ma Atinae Esee mo le auala toetiti lava maea ae pule mai lau Afioga po o afea e ootiina ai le lipine o lea galuega ona totoe ai lea o auala e lua i le pitonuu o Vailoa ma le pitonuu o Vaifoa. Tau lava ina faataatia atu iina i ou tafatafa atonu e fai fai lava oo ane i ai lau faasoa.

Lau Afioga i le Minisita mo Aoga, Taaloga ma Aganuu, e momoli atu le matou faafetai i le matou Aoga i Sagaga i le tou lava papale, lava onosai e tusa ai foi ma le Aoga a Sagaga Secondary School i le faatuai mai o se fanua e fau ai le faleaoga. Ona momoli ai lea o le faafetai i le paia o le Aiga Sa Gaufaleai ona ua maua se tala fiafia ua faamatuu mai se eleele i le afioaga o Afega e faatino ai lea galuega. E momoli ai le faafetai i le paia o le Aiga Sa

Gaufaleai, lo oulua toalua Fata ma Maulolo ma le vagana fetalai ma le mamalu ia Tuisamau e tusa ai ma le tofa loloto ma le faautautaga lelei ua faamatuu mai ai se fanua aua le fausia o le Aoga Mauuluga a le Itumalo o Sagaga le Usoga ma Sagaga le Falefa, o le a faatuina lea i Afega. Tau ina ia agalelei le Atua ma faamanuia i le tatou galuega pe a oo i le taimi e amata ai. O a foi ni faaetonu sa i ai lafo i nuu le aina ae alo le tatou vaa i luma tatou galulue faatasi.

Lau Afioga i le Fofoga Fetalai, e itiiti lava nai mataupu sa ou fia talanoa i ai e aafia ai le tulaga o le resiatatalaina lea o taavale i le LTA. E tatalo atu i le Afioga i le Minisita ma le Matagaluega aua o lea a faapea e misi loa le aso e tasi e lei totogiina lau resitala ona faasala lea o oe i le \$100. Ona o le matou lava faatamala ua lua nei tausaga o maua ai matou, e fa taavale tasi le aso e misi, \$400 i le faasalaga. Pe a fa au ae le tuu ane i ai sina vaiaso se tasi, fitu aso aua e i ai lava le mea e tau o le galo sao ma le galo sisio ae afaina ai tele matou ia ua matua galo moi lava ae taunuu atu e lesitala ua tasi le aso....aua o tulafono ia o la e mafai lava ona fai i lalo o regulations. O lona uiga e mafai lava ona fuafua e le Board po o lau Afioga i le Minisita ma e o lo o feagai ma nei ituaiga tulaga faapea. Ae tau lava ina silasila ane i ai aua afai e 5 au taavale ae faatoa manatua ifo i le po e expire ai ae alu atu i le isi aso e resitala lau taavale ua \$500. Sei silasila ane i lena tulaga pe mafai ona fai i ai se fetuunaiga.

Lau Afioga i le Fofoga Fetalai, o le isi mataupu ou te fia oo i ai e masani ona ou faalogo i le oi o tatou tagata i le Sei a le Ofisa o Niu Sila lea a faapea e manuia i le Sei ona alu atu laia i Niu Sila ao le mea ua tupu tele tagata ua ou faalogo i ai i le leitio ua gau tupe aua ua aumai le pepa faigaluega e le lelei pe aumai foi uma le taimi ua le aoga le pepa faigaluega. Pe aisea le mea e ala ai ona fai nei Sei ona toe tuumai lea i tatou tagata e o e saili pepa faigaluega? O le tele o papalagi i Niu Sila e le fia tilotilo mai ia tatou ia e o atu e sue pepa faigaluega pei ni refugees. Ae aisea e le faia ai e Niu Sila ia mea? Fai e latou le latou Sei, fesoasoani mai latou e sue pepa faigaluega a tatou tagata, faafaigofie ona tatou o atu i Niu Sila. O le tatalo i le tatou Malo pe mafai ona talanoa atu i Niu Sila i le Ofisa o Niu Sila afai ua fai tatou Sei, faafaigofie mai mo tatou tagata. Ua leiloa e tatou tagata po o fea a o e sue pepa faigaluega ai ae tatau ona fai se latou galuega e fesoasoani mai latou e aumai tatou pepa faigaluega. Ua tele ina ou faalogo i le leitio i tagata le malilie ua faali latou finagalo ua le malilie i luga o le leitio, o le isi loomatua fai mai e \$6,000 le tupe ua alu, talu ai le aumai le isi pepa faigaluega le lelei, aumai le isi pepa uma le taimi, alu atu i le Ofisa o Niu Sila le lelei mai foliga o le teine o le Ofisa o Niu Sila, fefe le tagata e alu i o ma atili ai ona le o le fanau ma maimau ai le taimi e fai ai le sei. O nai mea na ua ou fia talanoa atu ai.....

FOFOGA FETALAI: Malie le sui usufono sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malelegaai: Lau Afioga i le Fofoga Fetalai, e taua le saunoaga a le sui usufono ae na ona ou fai atu e faitau miliona foi tagata o la e tau sue ni galuega i Niu Sila o tagata Niu Sila lava latou.

Masalo ana leai le tatou feagai lea na fai e ave le tai 1100 semeamanu ua leva ona fai mai Niu Sila ua lava ia aua le toe o atu sei maua ni galuega aua e

oo foi ia Niu Sila ia ua leai ni galuega o toe maua, o le toatele o isi la ua o i Ausetalia e saili galuega ai. Ae sa ou faatupu manatu i le Alii Palemia pe mafai ona avatu pea a pasi loa ona ave lea o tamaloloa o latou ia o bread winners e sue ni a latou galuega ma nonofo pea i o mo ni masina e sue ni galuega a maua loa ni galuega ona oso mai loa lea avatu le aiga, ona o le faiga lea e fai nei seiloga e maua faatoa o uma. O le tele foi o pepa faigaluega e aumai, o pepa o atu tatou tagata faafesootai le palagi tusi mai ae fiu Niu Sila e sue atu e leai se fale faigaluega faapea. O le tulaga lena e taua le mataupu o lo o aumai ao le faalavelave lena o lo o taumafai foi Niu Sila ia e aloaia le tatou Protocol na saina i le 1982 i le faitau e 1100, ae ua tau leai ni galuega ua o foi tagata i Ausetalia e saili ai ni galuega ae o le toatele ua na o le queue foi lea e talia le alofa tunoa o tupe aumai na o le nofonofo i le fale ae aumai tupe e tausai ai. Tasi lena mea o la e faaeteete ai Niu Sila i le o atu o tatou leai ni galuega ae avatu e nisi o tatou aiga, ia nonofo nonofo lava i o toe uma toe o le aiga toe tau i ai o le vaega lea matou te nonofo na o mai e tau sue se galuega ae leai se galuega ua tigaina ai le matou aiga e tausai ua tau le aai ae maua ua toe tipoti i Samoa, o le tulaga lena ua toe tipoti mai e isi lava o tatou tagata. Ae taua le finagalo o le sui, ae o le suafa matai o le toaina foi lea taatia maia.

FOFOGA FETALAI: Tulai mai le sui mamalu e faaauau le saunoaga manatu ua malamalama le mataupu tau femalagaaiga.

Afioga MUAGUTUTAGATA FAAMAUSILI AUIMATAGI PETER AH-HIM: E fia faaleo foi se agaga mitamita e tusa ai ma le tatou Manu Samoa, faamalo le taaalo aemaise alo o lenei nuu ma lenei itumalo o lo o i totonu o le Manu Samoa, ia ua tautaua ai foi si o tatou atunuu. Leaga le mea e manaia o le TV ae misi ai ma le alu i le lotu pe a umi o matamata ae malo ae leaga le matamata ae faiaina. Faafetai ua maua se mea e faafiafia ai o tatou tagata i lenei foi vaitau. O le a foi le tulaga o le a i ai i le taaloga o lo o loma nei ma South Aferika ia o le a lava le tulaga tatou fiafia, ua lava ia manu tatou te fiafia ai ua tautaua ai si o tatou atunuu, o la foi e sikoa mai isi tama i le All Blacks o tama Samoa uma lava.

Lau Afioga i le Fofoga Fetalai, o tulaga uma o isi Matagaluega, pau sina mea lea o le Matagaluega o Faamasinoga, ou te fia talanoa i mea nei na issue mai o Poloiaiga le Tumau, e talosagaina pe mafai ona galulue faatasi ia le Ofisa o Faamasinoga ma le vaega lea i le Ofisa o Siosiomaga e pei o le PUMA aua a aumai se Poloiaiga Tumau i le Ofisa o Faamasinoga ua taofia se galuega a se aiga, ae fai faamalosi lava seiloga lava ta te toe alu e logo le PUMA ona faatoa gaoioi mai lea o le PUMA e taofi le pemitia ae a malosi lava le aiga ia e fai lava le latou fale, e gaoioi mai le PUMA ua ato le fale o le aiga ua nofoia le fale.

O le mea lea e tatalo atu ai i Ofisa uma e aofia i Poloiaiga Tumau, Ofisa o Leoleo, Ofisa o le PUMA, Ofisa o Faamasinoga ia sei silasila i ai po o le a se faiga e mafai ai ona galulue faatasi ai ina ia aloaia ai ia le Poloiaiga Tumau aua o le faatonuga mai le Faamasinoga, o le faatonuga ina ia usitaia, o le Tulafono ae o le tele o taimi e pei lava o se Tulafono faataetaealuga ia le Poloiaiga Le Tumau ae tatau ona aloaia lelei aua o le Tulafono e tatau ona usitaia uma e tagata o Samoa ma laugatasia uma ai ma maua ai le fiafia e tagata uma aua o lo o i lalo o le Tulafono.

Lau Afioga i le Fofoga Fetalai ona ou oo mai lea i le tulaga o mea tau pisinisi, lea foi na saunoa le Palemia, e sao e aoga tele le tagata faipisinisi e o mai iinei i Samoa ao faipisinisi sasao, o le tele o latou e mananao e o mai e fai hotel e mananao e fai atinae ae saili ifo saili lelei pe malamalama nei tagata i le faiga o hotel pe malamalama nei tagata i mea o lo o o mai e taumafai e fai. O le tele o i latou pei na ona omai e suesue manuia e faamoemoe i tatou tagata e fesoasoani atu ia i latou ma oo ai lava ina soli Tulafono e mafai ai ona faatalatalanoa i tulaga tau insider training, o insider training o se solitulafono matuia ua tele tagata e falepuipui ai i nuu mamao i Ausetalia ma Niu Sila, e tatau o ai ni tagata e omai e fai pisinisi iinei o le latou background afai o se au fai hotel pei o le vaega lea e omai i Taumeasina o lona uiga o le au fai hotel a iloa o le au fia fai hotel ma oo ai ina soli foi Tulafono i tulaga foi e le tatau ona faia.

Lau Afioga i le Fofoga Fetalai o nai motugaafa na a le sui usufono mo Sagaga le Usoga.

FOFOGA FETALAI: Tuu atu le avanoa i lau Afioga le Sui Palemia.

Tofa Hon Fonotoe Nuafesili Pierre Laufo (Sui Palemia): Ua maitau atu ua faaiuiu le saunoaga a le sui usufono mamalu ae ua maea foi le vaega lea o pisinisi sa saunoa i ai, o lau fautuaga ona e pei e tau atagia mai i saunoaga a le sui. O lau fautuaga afai o silafia ni kamupani faapena o omai i Samoa e lelei le lipoti mai ma faailoa mai i le tatou Matagaluega o Pisinisi o iina lea o lo o saili ai tulaga faapea ma silasila totoa i le aufaipisinisi mai fafo. E lelei la lou faailoa mai ona pei e tau maitau atu i lau saunoaga pei e te tau silafia nisi ae na e le o faailoa mai.

FOFOGA FETALAI: Ia tulai mai le sui usufono mamalu e faauma mai le saunoaga manatu o lea ua malamalama le tulaga o le fesiligia o mea tau pisinisi.

Afioga MUAGUTUTAGATA FAAMAUSILI AUIMATAGI PETER AH HIM: Faafetai o lea ua aumai le avanoa ou te faitatala ai, lau Afioga i le Fofoga Fetalai ma le mamalu o lenei Maota o le faaiuga lena o le matou lauga manuia tele lau Afioga i le Fofoga Fetalai ma le faafoega o le tatou Fono. Soifua.

FOFOGA FETALAI: Faafetai saunoa i lau Afioga i le sui usufono mo Sagaga le Usoga, manatu ua taliga i fialogo tuleiga ma saunoaga o lenei vaega o le aso. O lea toe 20 tatou minute o lo o maua pea le avanoa mo se sui usufono mamalu e toe fia saunoa ona faamaea ai lea i le afiafi a nanei.

Ia o lea ua tulai mai se tasi sui usufono mo Falealili, Afioga Tusa Misi Tupuola, tulai mai lau Afioga o lea ua avanoa le Maota mo lau saunoaga.

Tofa TUSA MISI TUPUOLA (Falealili): Lau Afioga i le Fofoga Fetalai, ou te tulai atu ma le agaga faaaloalo e momoli atu le agaga faafetai, ona o se avanoa ua mafai ona maua e lenei itumalo o Falealili. Ona o le Tala Faatatau Autu o le Tupe a le tatou Malo o lo o taoto nei i le Maota o le Palemene 2013-2014. O paia lava ma sa ma faigata o Tiafau o le malae o faautugatagi a Samoa ou te le toe oo i ai aua o ona paia ma ona mamalu mai lava i le

amataga e leai lava se poto poo se vave na te toe faaopoopo pe toe aveese, o paia foi o le atunuu faafogafoga tapuai mai lava i le tai samasama seia paia fili ma puletuu na tauilo ai malo e le toe oo foi i ai le sui usufono o Falealili, a o ou lava paia ma ou mamalu ia e le toe tau faamapuepueina i se matou tala aua o oe o le auma e fati loloa e leai se vave na te toe aveese pe toe faaopoopo ou paia sa ma faigata Samoa. E faatulou atu foi i le paia maualuga i le tapuaiga mamalu a Lana Afioga Mamalu O Le Ao o le tatou Malo ma lana masiofo faapea foi se tapuaiga i le afioga i le fononua a le sui tofia ma le masiofo, afioga i le alii Faamasino sili ma le mamalu o le Faamasinoga malo faafetai malo le tapuai malo i le tou tatalo le leoa e faia pea ua manuia ai Samoa i lenei vaitau o le soifuaga.

Lau Afioga i le Fofoga Fetalai, ou te fia oo lava foi i si ou itumalo o Falealili, aua le paia o Alalagafa ma le nofo i le toalua o tulafale ma le Tauana-eseese ma upu ia te oe Falealili. O ou paia sa ma ou faigata mai lava i Iliili Sisifo seia paia Tapulolou i Sasae e le toe oo i ai se tala a le tou atalii, na ona faafetai ma le agaga fiafia ona o le tou tapuaiga ma tui mai le mulipapaga aua le ma nonofo ai i la outou filifiliga na outou filifili ai i le Afioga i le Minisita se tasi o sui usufono mo Falealili, Tofa Tuiloma Lameko ma lou nei foi sui usufono mai lo tatou itumalo, malo faafetai, ou te iloa lava o i ai nisi o mea o lo o fia faaleleia i le tatou itumalo talu mai lava le afa o Eveni, ia ae ou te iloa lava o lo o silafia e le tatou Malo e oo atu lava i ai fuafuaga aemaise lava o nisi o aiga e pei ona aafia o latou maota ma laoa ona o le afa maemaea o Eveni pei ona aafia ai lo tatou atunuu i le tausaga ua mavae.

Ou te faatalofa atu foi i le tapuaiga i le paia i le Aufaigaluega paia a le Atua i le tatou itumalo, lau susuga i le Toeaina Faatonu lau susuga Tunumoso ma le faletua aemaise le Failautusi o le tatou pulega le susuga ia Amosa Vaetoe ma le faletua, failautusi o le tatou Matagaluega i Falealili lau susuga Anoi Faletutulu aemaise o le paia maualuga o le aufaigaluega o lo o faavaatua pea i totonu o le tatou itumalo ona o le Atua ma lana Tala Lelei, ia maua pea nisi agaga se tele o le itumalo aua le Alii ma Lana feau mo le agai i luma.

Ia tapuai maia sei faia se tatou sao aua foi le Tala o le Tupe a le tatou Malo o lo o taoto nei i le Maota Fononua o le Palemene aua se manuia au i luma o si o tatou atunuu aemaise o ana atinae o lo o taumafai ina ia aua se tamaoiga lelei o le tatou atunuu aemaise lenei vaitau o le soifuaga e pei ona tataou i ai.

Lau Afioga i le Fofoga Fetalai, e momoli tele le faafetai a lenei itumalo i le Afioga i le Minisita o Tupe ona o lenei Tala o le Tupe malamalama toe faigofie ao aafiaga o le maaleale o le tau o le tamaoiga ma le aafiaga o le tamaoiga lea lava o lo o manino ma atoatoa mai i le saunoaga autu a le Minisita o Tupe. Ua mafua ona o aafiaga o si o tatou atunuu talu mala faalenatura o se mea fiafia ai lea o lenei tootoo ona o lea o lo o saunoa malamalama le Afioga i le Minisita o Tupe i le tulaga o le aafiaga e pei ona i ai nei le Tala o le Tupe. Ma e matua lagolagoina e lenei itumalo tulaga uma o le faavasegaina mai o le tamaoiga o le atunuu aemaise lona agai i luma ina ia maua pea e tagatanuu uma o Samoa o se atunuu fiafia ma se atunuu e lelei lona pulega ma ana fuafuaga lautetele aua se manuia o Samoa mo a taeao.

O taiala e pei ona aumai lau Afioga i le Tala o le Tupe, ua matua taliaina ma le fiafia e lenei usugafono ina ia taumafai ina ia matua faalauteleina ma faateleina pea fua o faaleleleaga ina ia mafai ona faaleleia atili le tamaoiga o si o tatou atunuu e pei ona aafia talu afa, talu lologa ma isi mala faalenatura e

pei lava o isi atunuu uma o le Pasefika lea e aafia uma lava ona o le fesuiaiga o le tau po o le climate change.

O le tasi lenei vaega lau Afioga e tatau ona ave i ai le faamuamua a le tatou atunuu, o le suiga ma fesuisuiaiga o le tau ua aafia ai le tamaoaiga. Ou te fiafia tele i le tulaga ua i ai le Malo aemaise lau Afioga i le Palemia ma lau Kapeneta ma fuafuaga uma aemaise o Matagaluega uma o lo o galulue faatasi pea i le ao ma le po ona o le taumafaiga o se auala e faaleleia ai le tulaga o le fesuisuiaiga o le tau, aemaise o Samoa ma isi atunuu o le Pasefika lea ua mautinoa lau Afioga ma le mamalu o lenei Maota, e matua aafia tele lava i suiga o le tau. Ma ua tatau la ona silasila totoa, o a ni faiga, ni aiaiga ma ni tuutuuga lelei e tatau ona tatou galulue ai mo nisi foi mala faalenatura aua ua vaavaai atu ua le o toe misi lava ni tausaga ma tulai mai le suiga o le tau lau Afioga ma le mamalu o le Palemene.

Ona manatu ai foi lea o se manatu vaivai o lenei usugafono, i le faaaogaina o sui usufono o le Palemene mai lea itumalo ma lea itumalo ina ia galulue faatasi mo le taimi o le fesuisuiaiga o le tau, aemaise o polokalame faalauiloa ina ia faaaoga i ai le tofi o le sui usufono e pei ona filifilia mai e lona itumalo i le tulaga o le faatinoina o ia tulaga faigata o le fesuisuiaiga o le tau. Aua e talitonu lava, a malamalama tagata uma i le fesuisuiaiga o le tau ma latou silafia le tulaga o aafiaga, ona manatu lea o le a le maua i le mea lea o le loto popole ma le fefevele ma le atuatuvaale i taimi o le a tulai mai ai mala faalenatura lau Afioga.

O le isi tulaga lau Afioga i le Tala Faatatau Autu o le Tupe pei lava ona matou fai atu, ua matou talia ma le fiafia le Tala o le Tupe i lenei tausaga faaletupe, o nai isi ia vaega e tatau ona toe silasila i ai le Afioga i le Minisita o Tupe ma le Matagaluega o Tupe, aemaise foi le Ofisa Sili o Pulega mo le talanoaina o lenei Tala o le Tupe e pei ona talanoaina nei e le Palemene. O tulaga ia pei ona taua i le Tala o le Tupe lau Afioga, o mea lava nei sa ou lauga ai foi i le tausaga na tea nei, o mea nei o tupe maua ia a le tatou Malo ua le mafai ona ausia tapulaa e pei ona tuuina atu e le Matagaluega o Tupe ina ia mafai ona aoina mai e lea Matagaluega ma lea Matagaluega po o lea Faalapotopotoga ma lea Faalapotopotoga ina ia maua ai pea le fesoasoani i le tatou Malo, aemaise o le Matagaluega o Tupe mo le faatinoina o nisi o a tatou atinae. A o le mea lea e vaavaai atu i ai lau Afioga, se pei e le o ano lava isi tagata galulue, tulou lava le paia maualuga o le aufaigaluega i o latou tulaga maualuluga, ae leai se mea e mafai e le Faauluuluga pe a le faamaoni le isi vaega galulue i le aoina lea o seleni mo tupe maua a le tatou Malo.

O lea e fautua atu lau Afioga, pe le vaavaai po o le a se isi auala talafeagai lelei e mafai ai ona maua pea fesootaiga a le Komiti o Tupe Maua ma i latou o lo o aoina mai tupe ia i lea taimi ma lea taimi, ina ia nofo malamalama latou o galulue, e leai o lo o amanaia pea le latou feau ma le latou galuega. E faamoemoe atu le tatou Malo ia i latou o lo o galulue ina ia aoina pea tupe maua o lo o aoina ma ia faamaoni e teu lelei tupe ma vaavaai tupe na faaaoga ma fai lisiti, ina ia taofiofia ai ma aua ne i toe tulai mai nisi o faamasinoga e pei ona tatou faalogologo atu pea i ai ua maumau ai tupe a le tatou Malo ona o le le lelei ona faatinoina o latou tiute ma galuega e pei ona galulue ai lau Afioga.

O le tulaga lau Afioga e pei ona faaalua mai foi i le Tala o le Tupe, ou te manatu e tatau lava ona taumafai le tatou atunuu. Ua ou manatua foi le lauga a se tasi o sui usufono ua fai i lagi le folauga le Afioga i le Gafatasi, sa ia

saunoa ai i totonu o lenei Maota ina ia tatou taumafai tatou te galulue faatasi e gagau le vao, fai faatoaga ia lava faatoaga talo ma isi mau atinae e o o lava i lafumanu, sa saunoa ai le Afioga i le Gafatasi i lenei vaitau a o i totonu o le Palemene lenei. Ma i lou talitonuga lau Afioga ma le mamalu o lenei usugafono, o i ina tonu lava lea o lo o taumafai ai le Minisita o Tupe ma le Malo ina ia matua faateleina fua o faaeleleaga e faatau atu i le maketi ia faatele mai ai nisi tupe, aua le atinae o lona tamaoaiga ma le agai i luma. Ua tele vaega o le Tala o le Tupe o lea ua maea ona faitau i ai, ma ua manino foi ma malamalama lau Afioga i le tele o tulaga o ia vaegatupe ma ia vaegatupe. Ae pei na o se aotelega puupuu, o lea ou te tulai atu ai lau Afioga e faaleoina ai le agaga faafetai o lenei itumalo, matou te taliaina ai le Tala o le Tupe. Ae na o ni nai talosaga ae le i maea si au agiagi atu lau Afioga i lenei itula o le aso, na o si au talosaga i le Minisita mo Galuega, faafetai tele lava mo galuega lelei mo lenei itumalo.

Na pau lava o lea, ia toe silasila ane lava i le tele o nisi afioaga i Falealili o lo o leaga pea o latou auala, ia o le leaga lava o le maintenance e le o faatinoa lelei e kamupani ma konekarate ia e galulue le faiga o tatou auala i nuu i tua. Faafetai foi ona o nisi o matou talosaga ua uma ona tuuina atu mo nisi o auala galue, o lea lava ua vaavaai atu e tusa o le tatou galulue faatasi ma lau Afioga, o lea lava ua tulai mai o le a fuafuaina foi mo lenei tausaga nisi o galuega a o le i uma foi lenei Paeaiga latou.

Ia tau ia ina ia alofagia e le Atua ia maua pea lou soifua lelei maua le toa o le loto, aua ua tele faigata ma faafitauli o lo o feagai pea ma lau Afioga aemaise foi o le Matagaluega o Galuega, Felauaiga ma Atinae Eseeese i lenei vaitau o le soifuaga. Ou te iloa lava le tele o feau, ae faafetai i lau afioga i le Pule Sili mo Felauaiga i luga o Alatele, aemaise foi o le Ofisa Sili o Pulega o le Matagaluega o Galuega ma Felauaiga, ia maua pea le lototele e faatino ai ona o le tele o mea ua aafia talu ai le afa ma isi mala faalenatura e pei ona aafia ai o tatou auala tetele.

Lau Afioga i le Minisita mo le Soifua Maloloina, malo faafetai i lau Afioga. Ou te iloa lava o lau Afioga e te silafia mea uma o lo o tutupu i tua i Falealili aemaise lava le matou falemai. E le natia o le vaiaso na tea nei sa ou asiasi ai i tua, sa ou afea i le falemai i taimi o timuga ma le louloua o le tau, e taunuu atu o feofeoi solo gasegase ma nisi sa o atu o le fitafita mai Amerika sa i tai i le uafu, ua pe le paoa a o lo o tumu totonu i le mamalu o le itumalo. Sa ou fesili atu i le ofisa ae faapea mai le tala, ua leva ona pe le matou afi faaleoleo ua le iloa po o le a le mea ua fai i ai e le Matagaluega. Na o se talosaga, e lelei ona ave se afi lapoa i tua aua e fai si mamao aemaise o gasegase, ina ia aua ne i tupu mai ai ni faalavelave i le lumanai pe a pe le tatou paoa. E talosagaina foi lau Afioga i le Minisita mo le Soifua Maloloina, se i silasila ane i le maota o lo o nonofo ai nai alii ma tamaitai tausimai, ona o lae ua mautinoa ua le siia le falemai i uta, ae o lae ua tulai pea i le mea sa i ai. Ia na o se talosaga vaivai se i silasila ane i ai lau Afioga aemaise foi wards e lua lae i le falemai, e vaavaai atu ua le toe talafeagai, e tataua ona vaavaai i ai le Matagaluega mo le faaleleia aua gasegase o lo o taoto ai.

FOFOGA FETALAI: Ou te vaelupeina le saunoaga a le sui usufono mamalu. E faamalulu atu i lau Afioga i le sui usufono o lo o saunoa, ona ua tatou taunuu i le taimi malolo masani e pei ona faatulagaina le lafo faatu i lenei aso.

E momoli atu le agaga faafetai tele. O le a faaauau le saunoaga pe a tatou taliu mai i le malologa. O le a faia le tatou malologa mo le lua itula ona tatou toe taliu mai lea i le itula e 3:00 e pei ona faatulagaina i le tatou Fono. E momoli atu le agaga faafetai tele i lenei vaega o le aso i sui usufono na sausaunoa, e faapea foi ma sui usufono o lo o folifoli mai i le faaauauina o le felafolafoaiga i luga o le Tala Faatatau o le Tupe. O outou mama na. O lea ua saunia e le Matagaluega o le Fono le faamalositino.

Aua tou te afifio, o lea ua vela le suavai a tama, ua uma ulu o Tiafau o taumafai e saili se mea, sa saili foi i tua i le gataifale i tua i i, o la e ua maua mai le ia mai moana ua uma ona faalalo e tali ai la outou sua, ae le i toe amataina le tatou Fono i le itula e 3:00. Ia taitaiina lo outou soifua ma ia maua se faasiliga malosi.

Ou te faasilasila atu o le a faataatia ese Taulumaga a le Fono Aoao Faitulafono mo lana malologa masani i le aoauli ona tatou toe taliu mai lea i le itula e 3:00 i le afiafi a nanei.

Na faataatia ese Taulumaga a le Fono Aoao i le itula e 1:00 i le aoauli seia aulia le itula e 3:00 i le afiafi.

Na nofoia le Nofoa e le Fofoga Fetalai i le itula e 3.00 i le afiafi.

**TULAFONO TAU FAAOFI O LE FAATATAUINA O TUPE
FAAOPOPO (NU.2) 2012/2013 MA LE TULAFONO TAU FAAOFI O
LE FAATATAUINA O TUPE 2013/2014 – felafolafoaiga faaauau i luga
o le faitauga faalua**

Na toe faaauau felafolafoaiga.

FOFOGA FETALAI: E momoli atu le faafetai tele i lenei vaega o le aso i le paia maualuga o le tatou Maota ua aofaga potopoto i lenei itula afiafi. Malo le faapalepale ma le onosai mai i le tatou Fono e pei ona faatulagaina i le lafo faatu. O le naunautaga lava o le Malo ina ia faaauauina pea a tatou galuega e pei ona faatuina ai le lafo. E i ai le agaga ma le faamoemoe o le a tatou amata i lenei taimi ona ua ta tonu le itula e 3:00 e pei o le taimi faatulagaina seia aulia le itula e 7:00 a nanei.

Ua tapena foi le tatou Ofisa i le tulaga o le faasiliga malosi aemaise ai o le faamoemoe ina ia maua pea lo outou soifua manuia mo le faaauauina o le tatou galuega.

O le taeao analeila sa maitauina ai e le Nofoa nisi o tuleiga ma saunoaga a sui usufono, o le agaga ma le faamoemoe ia maua pea avanoa tutusa ma le tatou va fealoaloai e tusa ai ma a tatou felafolafoaiga, afai foi o le a sa outou faafogafoga i le tali atu a le Malo o le agaga maualuga lena o le Nofoa, ina ia mafai ona tapa se finagalo o le Malo i le mea e fia faasao ma le mea e fia faamalamalama ina ia taatia i le agatonu taulumaga o le tatou Fono. O le agaga atoa ina ia malamalama le sui usufono i manatu faaalua ma manatu laga e faapena foi ona maua le malamalamaaga i le faafogofoga tapuai mai a le atunuu.

O le mea lea i sui usufono uma e le i saunoa i le tatou Tulafono Tau Faaofi o le Faatatauina o Tupe 2013/2014, e le tau aoaia e Laupua Tamafaiga. O le agaga ma le faamoemoe o le tatou galuega o le tatou avega e tausoa, o le agaga ma le faamoemoe ina ia tau i manu ma ia vave ona pasi le tatou Tulafono Tau Faaofi o le Faatatauina o Tupe 2013/2014 ma vave tuu atu i aao o i latou o lo o faatinoina galuega ma faapena ona faagasolo ai galuega a le tatou Malo, ae i ai le talitonuga ia vaatele i o outou finagalo, o le tulaga lava ia o upu ma tala i felafolafoaiga faa-Palemene e le o ni upu fou, e aumai avatū tuleiga ma saunoaga i suaga faa-tamalii, afai foi e tetele i pesega ou te talitonu lava e matua i le oō. O lenei la aso ma le tatou galuega e tataua lava ona momoli atu le faamanatu a le Nofoa e fai foi o le na a o le nei O le faamoemoega o le tatou galuega ia tausisia pea lo tatou va nonofo ma lo tatou va tapuia e fai foi o lo outou sivasiva mai a o le taumafai atu foi e taualuga ma aiaiuili atu ia outou tuleiga ma saunoaga leaga e le faigofie. O tuleiga ma saunoaga a Itumalo faa-alaalafaga na filifilia outou e omai e fai le sao ia Manuvao aua le manuia o le tatou atunuu. Ona i ai lea o le lagona ma le faaloalo i lenei vaega o le afiafi sagai mai ai o le tai o le a fai le tatou galuega ma le talitonuga o le a tau i manu taualumaga o le Fonotaga seia aulia le po a nanei.

E faia le malologa o saunoa se tasi o sui usufono mo Falealili, Afioga Tusa Misi Tupuola. O le avanoa lenei o le a toe tuuina atu i le sui usufono e tulai mai e faaauau le saunoaga.

Tofa TUSA MISI TUPUOLA: Faafetai i lau Afioga i le Fofoga Fetalai. Faafetai ona o lea ua maea le malologa a le Maota, ua maea ona tali le sua faafetai i lau Afioga ma le Matagaluega ona ua maea ona tali le sua o le aoauli. Ona e le o toe tele ni mataupu a lenei sui usufono.

Lau Afioga i le Minisita o Punaoa Faalenatura ma Siosiomaga, ou te iloa o le tele lava o tiute aemaise o le feagai ai ma le tele o mea e faaleleia mo atinae o le atunuu. A o le talosaga lava lenei sa tuuina atu i lau Afioga talu mai le 2011 ina ua maea lau lauga faa-Taupou, ona o le taligalu i gatai ane o lo matou nuu o Matautu Falealili ua tele ina aia le laueleele ona o le maualuga o le suasami ma aafia ai lo matou suavai ae tasi lava le vai e taumamafa ai lo matou nuu pe a pe le paipa. Na ona toe valuvalusia ai aa o le fau i lau Afioga ma le Matagaluega se i silasila ane i le talosaga a lenei sui usufono, ona ua fesili soo tele mai lo matou nuu ia te au i lenei mataupu ma le faaloalo.

Lau Afioga i le Minisita mo Aoga, Taaloga ma Aganuu, faamalo faafetai i le tele ma anoanoai o fesoasoani ua maua e lenei Itumalo aemaise o a matou Aoga Tulagalua, aemaise foi o le fesoasoani a le Ofisa Sili o Pulega ona o nisi o a matou fuafuaga e pei ona taumafai ai aemaise o Aoga Tulagalua i Falealili i ni a latou malae taalo, o lea ua ou vaavaai atu ua aumai i le Tulafono Tau Faaofi o le Faatatauina o Tupe 2013/2014 le isi a matou talosaga aemaise o la matou faleaoga tulagalua ua leva ona aafia ona o afa ma ua le toe saogalemu mo le faaaogaina e alo ma fanau. O le a taatia atu pea i lau Afioga ina ia e silasila ane ai mo lenei Itumalo.

Ona ou oo mai ai lea i lau Afioga i le Sui Palemia po o le Minisita mo Pisinisi, Alamanuia ma Leipa, masalo o le mataupu lenei sa ou taua foi i le tausaga ua mavae ae foliga mai o lea ua tatou ofi atu i totonu o le WTO, a o apa eleni lava nei sa ou taua i le la tausaga ua tuanai ua le o toe lelei mo le

fofoga taumafa o le atunuu, ao lo o vaavaai atu lava i le tulaga o le tele o nisi o oloa o lo o faaulufale mai, e momoli atu le faafetai i le Matagaluega o le SROS faapea le Matagaluega mo le Soifua Maloloina, ona o le mataala ma le silasila totoa i nei taumafa ua soona lau mai a o lo o mautinoa e le o aoga mo le fofoga taumafa o le atunuu. Ae po o le a se isi fuafuaga e tatau ona toe silasila i ai ma taofia ai nei oloa ia aua nei toe faaulufale mai i totonu o le atunuu, po o le i ai foi o se faasalaga e mafai ona tuuina atu i nei Kamupani o lo o latou faaulufaleina mai nei mea taumafa i totonu o le atunuu.

O le tasi mataupu i le Afioga i le Minisita ma le latou Matagaluega ona o le toatele o fanau i tua ua le aoga ona o le leai o ni galuega ae taua foi le saunoaga faa-Minisita a le Afioga i le Palemia ua tau lototele atu ai se manatu. Ou te talitonu o le toatele o nai nei fanau ua iu mai i le tele o Kolisi ma isi aoga mauaululuga, ae oo mai i le aso lau Afioga ma le mamalu o le Maota, o lo o tau saili lava e matua ma i latou ni galuega. O le tatalo a lenei sui usufono se i silasila ane, po o le a se fuafuaga a le Matagaluega i le tulaga o le le maua o ni galuega, ae po o i ai nisi galuega faa-kamuta, galuega palama ma mea faapena e fesoasoani ai i nei alo ma fanau sa tuuina atu mo a latou aoga.

Ona faauma ai lea o so matou manatu i lenei Fonotaga lau Afioga.

FOFOGA FETALAI: Malie le sui usufono a o le i faaii maia le saunoaga se i tuu atu le avanoa i le Minisita mo le Soifua Maloloina.

Afioga Hon Tuitama Talalelei Tuitama: Sa ou faatali lava se i saa usi le saunoaga matagofie a le sui usufono, e amanaia foi ma le faaaloalo le fautuaga a le Nofoa, ma o le a taumafai ai e faapuupuu atu nai faauilavea nei ona o mea e tatau ona taua i lenei itula.

O le tulaga i le paoa mo le silafia e le na o le pau lea o le falemai e i ai le paoa po o afi foi nei e standby, ina ne i te i ua ui ane ai se isi saunoaga i se taimi mo le silafia e le Maota o lea tulaga ua see atu i le EPC. Ona pau lava le vaega e fia faamautu mai po o anafea na amata ai ona faaletonu le paoa? Lua, po o ua logo le Ofisa Sili o Pulega o le Auaunaga faa-Soifua Maloloina e mafai ai ona fesootea i le EPC mo le faatinoina o le latou galuega.

O lona tolu, po o anafea foi na logoina ai le Ofisa Sili o Pulega o le Auaunaga ina ia mafai ona fai se galuega fesoasoani mo le foia o lea faafitauli.

O lona lua, o le masina o Mati sa ou asiasi ai i falemai i nuu i tua e aafia ai ma le falemai i Poutasi, ua uma ona taoto le fuafuaga mo le toe faaleleia o lea falemai ona o vaega sa aafia i le Tsunami, o le a toe faaleleia ma toe faaopoopo i ai nai moega se lua po o le fa e tusa ai ma le manaoga o lo o i ai i lenei taimi atoa ai ma le faafoeina o lea Maota o lo o tua i ai le afaigaluega. O le fesoasoani atu lena i le mataupu sa taua e le sui usufono, ma le faaaloalo tele.

FOFOGA FETALAI: Malo, se i tulai mai le sui usufono mo Falealili, po o ua faamalieina i le tali a le Minisita?

Tofa TUSA MISI TUPUOLA: Lau Afioga i le Fofoga Fetalai, faafetai tele i lau Afioga i le Minisita mo le Soifua Maloloina o lea ua e saunoa malamalama, ua lagona foi le fiafia i lenei itu aso e tusa o le fesoasoani a le

Matagaluega aemaise o lo matou falemai i Falealili. O le faafesili po o anafea? O le aso 6 Iuni o le masina nei na ou oo ai i Falealili ma taunuu ai i le taeao o pe le tatou eletise ma ua pepe uma ai ma moli o le Falemai.

FOFOGA FETALAI: O Iulai po o Iuni le sui usufono?

Tofa TUSA MISI TUPUOLA: O le aso 6 o Iuni lau Afioga. O le faasaoga o Iuni na ou oo atu i ai ua pe le paoa ae fesili atu fai mai o le afi sa i tua ua leva ona leaga le part ua uma ona aumai i Apia a o lea lava e tau saili lau Afioga ma le faaaloalo.

Ona faauma atu ai lea o sa matou faamatalaga lau Afioga ma le faaaloalo, ia alofagia e le Atua ma ia maua pea le soifua laulelei i Ofisa Sili o Pulega o Matagaluega uma a le Malo ma Faalapotopotoga Tumaoti a le Malo, ia maua pea lo outou soifua auauna lelei ma ia maua pea la outou faautautaga aua le lagolagosua i le tatou Malo ma Afioga i Minisita i le faatinoina o feau ma galuega aua le tau atiaeina o lo tatou atunuu.

Ia manuia foi le faafofogaaga a Samoa ma lou Itumalo, soifua ma ia manuia le Fono.

FOFOGA FETALAI: Malo faafetai saunoa i se tasi o sui usufono mo Falealili, Afioga Tusa Misi Tupuola, faafetai malo saunoa. O lo o ua avanoa pea le Maota mo se tasi o sui usufono o lo o fia saunoa.

Tulai mai le sui usufono mo Aana Alofi Nu. 3 e saunoa.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa e fai atu ai se manatu o lenei Itumalo aua le tapenaina o le Sa o Samoa e ala i le Tulafono Tau Faaofi o le Faatatauina o Tupe mo le 2013/2014.

Ae ou te le i paia le faga o tautai aua paia faaape gata o lenei Maota, ou te muai faatulou i le afifio o le vaa folafola o le Talalelei o lo o outou paopaoina agaga o Samoa mo le Atua. O le Atua o lo o Faavae ai lo tatou Malo Tutoatasi.

Ou te faatulou ma ou faatalofa atu i lau Afioga i le Fofoga Fetalai, lau Afioga i le Palemia ma le Kapeneta, lau Afioga i le Taitai o le Itu Agai ma le mamalu o sui usufono o le Maota, o outou na faia mai le vao filifili aua le faalelegafulu a Samoa mo se manuia o ona tagatanuu ma lona siosiomaga.

Ou te faatalofa ma faatulou atu i le nofo faafogafoga tapuai mai a Samoa, afio lau Afioga Mamalu O Le Ao o le Malo ma lau Masiofo, Sui o le Fono a Sui Tofia ma lau Masiofo, lau Afioga i le Faamasino Sili aemaise o le mamalu o Ofisa Sili o Pulega ma Faalapotopotoga a le Malo.

Ou te faatalofa tau foi ma faatulou atu i le paia o Samoa aoao i ona tulaga faalupe aua le afifio o Aiga ma Tama, o Tama foi ma o latou Aiga, le Usoga a Pule ma Tumua, Itua ma Alataua, Aiga i le Tai ma le Vaa o Fonoti. Aemaise o le mamalu o faletua ma tausi, saao ma le aualuma ma le malosia o le tatou atunuu o lo o vae ma lima i ai le tele o aiga ma nuu aemaise o galuega a le atunuu.

Ou te faatalofa atu foi i le tapuaiga mau a nai o tatou uso i le Motu o Tutuila ma Manua ma lana Faigamalo aemaise o ona tulaga faale-aganuu.

E faatalofa atu foi i lou Itumalo mai mai Fogalefatu seia paia Lepapa, faatalofa faamalo tapuai, tapuai maia sei ou faia se tatou manatu aua le mataupu ua faapea ona faataatia i luga o le Maota Fono.

Lau Afioga i le Fofoga Fetalai, ou te faamalo i le Minisita o Tupe i le lavaloa o Faalapotopotoga ma Matagaluega a le Malo i le faamaopoopoina o lenei Tala o Tupe. E le gata i lea ao le Komiti o Tupe Maua ma Tupe Totogi a le Maota sa o latou fita i tuga i le iloilo ina maeaea o le Tala o le Tupe ua opea nei i le Maota aua e talitonu le agaga o se galuega lavelave ma le fita sa feagai ma latou.

Lau Afioga i le Fofoga Fetalai, o nai ootoga nei o nai manatu e tusa ai ma le Tala o le Tupe. O se vaaiga lautele a lenei sui usufono lau Afioga, o lenei Tala o le Tupe, e foliga mai e le faatauaaina le siitia o tupe maua ae faataua le faanaunau e faaalu tupe ma toaga e fai nonogatupe. O le uiga o lea faamatalaga lau Afioga i le Fofoga Fetalai, ua tolu nei tausaga o lenei Paeaiga ao lo o faaalua mai le maualuga pea i tausaga taitasi o tupe faaalu i Tala o le Tupe. Ua tusa nei ma le \$120miliona le siitaga o tupe faaalu ae na o le \$57miliona le siitaga o tupe maua o lo o faamauina talu mai le uluai Tala o le Tupe a lenei Paeaiga. O lona uiga ua faaluaina le tele o tupe faaalu nai lo tupe maua. A faatusatusa lea i le 10 tausaga mai le tausaga 1991-2001 lau Afioga i le Fofoga Fetalai, e silia ma le \$100miliona le siitaga o tupe maua ae pe na o le \$60miliona siitaga o tupe faaalu i lea vaiata. O se manatu la lau Afioga i le Fofoga Fetalai, e le o lelei le faatinoina o tiute o le Minisita o Tupe i le iloilo ina lelei ma faataua le sailia mai o tupe maua ae na o le toaga e faaalu tupe i atinae e le o lelei se fua mai faamanuiaga.

FOFOGA FETALAI: Malie le sui usufono o lo o saunoa sei tuu atu le avanoa i le faamalamalama a le Afioga i le Minisita o Tupe.

Tulai mai le Minisita o Tupe.

Afioga Hon Faumuina Tiatia Faolotane Liuga: Lau Afioga i le Fofoga Fetalai e leai se naunautaiga e faalavelave i le saunoaga a le sui usufono mamalu pau o le mea o le tulaga e pei ona saunoa i ai e le o sao atoatoa lona faatulagaga o tupe alu ma tupe maua. E amata mai lava i le amataga i le tatou Tutoatasi e oo mai i le taimi nei e lei i ai se taimi na faapea na tele ai ni tatou tupe maua i lo tupe alu. O le faasaoga lea o le saunoaga a le sui usufono ae ou te fautua i le sui usufono e saunoa pea i tulaga lautele ona fai atu lea o se tali i le taimi mulimuli.

FOFOGA FETALAI: Mo le faasaoina o le taimi o le sui usufono mamalu sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te leiloa po o malamalama le sui usufono lea e saunoa nei. O lea ou te fautuaina sei silasila ane i le itulau muamua o le Tala o le Tupe, ona tilotilo lea i le vaegatupe lena e 2012-2013 tupe maua na e i ai \$683miliona ona toe tilotilo lea i le 2013-2014, \$760miliona o lena e siitia i luga tupe maua. A tilotilo i le atinae o lena foi e aliali mai ai le fetauti o ana mataupu ia e aumai. Ou te leiloa po o malamalama le sui usufono i le Tala o le Tupe lea e avatu aua e te soona agai tele i tua e te le o malamalama foi ae vaai lelei tausaga. O iina e te iloa i le lua

tausaga, a faapefea ona agai i tua e te le o malamalama i le lua tausaga lea e i ai nei. E le o agai i lalo tupe maua o lona e agai i luga. \$683miliona lona ua sii i luga i le \$760miliona, o agai i lalo po o agai i luga? O lona e agai i luga. E amata mai lava i le taimi na e saunoa mai ai e sese. Lau Afioga i le Fofoga Fetalai, o le uiga lea o le upu lea na fai atu ai i le taeao e le toe tuufaua ni lauga faavalevalesa e aumai, tilotilo i fuainumera ona malamalama lelei ai lea. E le o le taatia o fuainumera ae ese le mea lea e lauga mai ai ae ua leva ona avatu le Tala o le Tupe e tilotilo i ai.

FOFOGA FETALAI: Faafetai i le saunoaga faamalamalama a lau Afioga i le Palemia. Sei tulai mai le sui usufono mamalu e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E faamalie atu pe afai ua pao papa se faamatalaga i lau Afioga i le Palemia ae o le vaega o lo o ou tilotilo i ai o ordinary receipts o tupe maua mai totonu o le tatou atunuu ma expenditure e lei tuua i ai totonu grants ma loans.

FOFOGA FETALAI: Malie le sui usufono sei tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea foi la lea o le a ou....se silasila la i lalo i ordinary receipts - \$529miliona i le tausaga talu ai, \$538miliona i le tausaga o lo o fuafua nei. A \$529miliona ae agai i luga i le \$538miliona ao lea e fai mai o lea e agai i lalo. O le uiga atoa o lau saunoaga i le aoauli nei ona e toe tilotilo foi lea i ordinary po o current papers ona e silasila lea e tataua ona agai luga ae pau le mea taua o le silasila i tupe maua aua o tupe maua e fua i ai tupe alu. Na amata sese lava lau mataupu.

FOFOGA FETALAI: Tulai mai le sui usufono mamalu e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai. Ona ou see atu lea i le isi vaega lea lau Afioga i le Fofoga Fetalai. O le vaega lea e vaavaai i ai i Vaega ia o CSO po o obligations a le Malo lea e tuuina atu i Faalapotopotoga a le Malo. Peitai lau Afioga i le Fofoga Fetalai e vaavaai lava le lea o se siitaga tele o tupe maua mai i ia Pulega pei o le SPA, SLC, EPC, SWA, LTA ma o le faataitaiga lau Afioga o lo o manaomia pei ona i ai i le fuafuaga o lo o faataoto mai i nisi o pepa sa tufaina mai e manaomia le \$17miliona o le siitaga lea e maua mai tupe maua i auaunaga a le Malo peitai ane o nei Pulega e tolu mo se faataitaiga o le Faalapotopotoga o le Malosi Faaletise o lo o faapea ona faaititia i le 20miliona iunite o lo o faaalu ma e le o mafai ona maua mai ai tupe e tusa lea e silia ma le \$12miliona eletise maimau mai lea Faalapotopotoga ae o lo o siisii pea lo latou talosaga mai i tupe e mafai ona faamatuu atu e le Malo. E faapea foi i le Pulega o le Suavaai.....

FOFOGA FETALAI: Malie le sui usufono o saunoa sei tuu atu le avanoa i le Afioga i le Minisita o Tupe.

Tulai mai le Minisita o Tupe.

Afioga Hon Faumuina Tiatia Faolatane Liuga: Faafetai i lau Afioga i le Fofoga Fetalai, o se mea e fia faamalamalama ina ia aua nei taitaiseseina le finagalo o le sui usufono mamalu o lo o saunoa. E na o le lua tatou SOEs ia e ave i ai tupe ia e tau o CSO, o le Pulega o le Suavai ma le Faalapotopotoga o le Malosi Faaeletise. O tupe ia e ave e fesoasoani ai e le gata e aveese ai le VAGST mai le eletise o lo o faaaogaina ae faapea foi ona fesoasoani i aiga e vaivai lo latou tamaoaiga i le tosoina o le eletise i o matou maota ma laoa . E faapena foi la i le tulaga o le suavai, e le faaaogaina e supplement ai ni tupe faaalu i isi vaega ae o le agaga moni lava o le CSO ia fesoasoani i le Pulega o le Suavai ma le Faalapotopotoga o le Malosi Faaeletise i tagata e maulalo lo latou tamaoaiga. Ma lou faaaloalo lava.

FOFOGA FETALAI: Malo faafetai. Ou te manatu ua malamalama lea mataupu ae tulai mai o lea ua oo mai taua i le Pulega o le Suvai.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai, o le faanaunautaiga lau Afioga ona o le itiiti o dividends po o tupe maua a le Malo o lo o maua mai i nei Faalapotopotoga a le Malo peitai ane o lo o tele pea fesoasoani a le Malo o lo o ave i ai e le agata i le CSO ae o lo o i ai foi nisi e pei o le loan a le Faalapotopotoga o le Malosi Faaeletise o lo o guarantee ma fesoasoani i ai le Malo ao lo o vaaia pea le le lava o tupe e maua mai nei Faalapotopotoga. O se faataitaiga e pei ona ou tuu atu lau Afioga o le silia ma le 20milion o iunite e le o mafai ona maua mai ai se tupe a le EPC e tusa lea ma le ova ma le \$15milion i le tausaga e tasi. O lea ua silia ma le fa tausaga e le o mafai lava ona faia i ai se fuafuaga ina ia faaleleia tupe maua mai lea Pulega ae o lo o faapea ona faaalu i ai tupe a le tatou atunuu.

FOFOGA FETALAI: Malie le sui usufono o lo saunoa, sei tuu atu le avanoa i le faamalamalamaga a le Afioga i le Minisita e vaaia le Faalapotopotoga o le Malosi Faaeletise.

Tulai mai lau Afioga i le Minisita.

Afioga Hon Manualesagalala Enokati Posala: Lau Afioga i le Fofoga Fetalai, ou te manatu o lea ua faamanino atu e le Afioga i le Minisita o Tupe le tulaga i le CSO Community Service Obligations. E tele le taua ona o lea e faaoga mo tatou moli auala aua e tele talosaga e tuuina mai ao le aoga lena o le tupe lea faatasi ai ma le fesoasoani tele i le fesoootaiga o connections o aiga e lima vaivai. E maitau atu i le sui usufono mamalu ua tetee i atinae, ua tetee i le fesoasoani o lo o ave mo e moomia le fesoasaoni e ala i tupe nei. O le tulaga i le eletise maimau, e le o muta galuega faatino a le Faalapotopotoga, o mea e faigata ona faamautuina le tulaga lea i le eletise. E i ai le upu e fai i le afi, e le taaalo se isi i le afi, o le eletise e sa ona e pai i ai. O lona uiga o le malosi ma le maaleale lea e faigata ai ona pulea ma vaaia. O le eletise e i ai eletise maimau i luga o le feavaeaiga o le eletise i luga o uaea ma mea faapena, e i ai foi eletise maimau i le faiga o cash powers, meters, connections i aiga e i ai legal diversions o mea uma na o lo o silasila i ai le Faalapotopotoga e le o se mea e faigofie ona vaavaai ae o lo o taumafai lava i

se faiga e maitauina ai ia tulaga. O le mea masani e pei o isi atunuu i fafo e 17% le eletise maimau i lona tulaga aotelega. O lea e i totonu i lalo ifo o le 17% o lo o faataatia ai le eletise maimau e tusa ai ma faamaumauga a le Faalapotopotoga ae le o muta ai le taumafai o le Faalapotopotoga e faamautuina ae le faapea o se mea o le a gata ai. O faafitauli lava ia e feagai ma le gaosia o le eletise ma faasopolia ma tufatufa atu mo le mamalu o le atunu ae o le mea e sili ona taua o la e galulue taumafai e faamautuina ma taofiafia le tele o le eletise maimau. E faatoa uma atu foi le polokalame o le suiga o laina, toe sui atoa transmission lines o lo o faatino e le EPC ina ia sui mai i le ituaiga laina fou e laitiiti ai le eletise maimau ma le mafai ona maua. E pei o laasaga ia e i ai ao le tulaga o le CSO, o la e patino lava mo le atunuu ma e e moomia, aemaise le talosaga e fia moomia ni moli aua tatou e faamalalamaina ai so o vaega o le atunuu. Ma le faaaloalo lava.

FOFOGA FETALAI: Malo saunoa faamalalamama i lau Afioga i le Minisita mo Galuega, Felauaiga ma Atinae Eeseese. Ou te manatu ua malamalama lea mataupu le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai. O le a ou see ese, ae na pau le auga o le manatu lau Afioga, e ao ona ave ni target pe ave ni faatonuga malosi i nei Pulega ina ia faaleleia le auaunaga, ina ia faaitiitia vaega ia. O le mea e fia faasao lau Afioga i le Fofoga Fetalai e pei ona taua e le Afioga i le Minisita, e le 17%, e 7.5% le mea lea e tau o lo o faaalu le aoga. A o le taimi nei ua ova ma le 20% le eletise maumau o lo o i ai. Ma o lo o faaalua foi e le Pulega, e tele ina aumaia i lalo lea vaega ona o le tele o le seleni o lo o faaitiitia ma sefeina mai e le Pulega, ae le gata i lea e mafai ona faaitiitia le tau o le eletise o lo o faapea ona ola ai le tatou atunuu. O le a ou see ese mai ma lea vaega lau Afioga. Na pau lea o le auga lau Afioga i le Fofoga Fetalai o se fautuaga mo Pulega nei e lavea ai pei ona ou taua, le Pulega o le Uafu, le Pulega o Felauaiga i Luga o le Laualeele, le Pulega o le Suavai ma le Pulega o le Eletise, e ao ona i ai se fautuaga malosi a le Minisita aemaise o le tatou Malo ian ia fautuaina nei vaega ina ia faaleleia a latou auaunaga ma sefe mai seleni o lo o mafai ona faaitiitia a ia fua agai i ai tatou CSO o lo o faapea ona tuuina atu i ai.

Lau Afioga i le Fofoga Fetalai, o le isi vaega e fia o o i ai se manatu ona o lo o matauina pea i tatou Tala o Tupe, o le siitia lea o talosaga po o tupe manaomia e faaalu i totonu o galuega fai a Matagaluega, aemaise o le siitia o tagata faigaluega a Matagaluega taitasi ona o lo o matauina foi le tele o galuega e fia faia. Ae le o tele se suiga lau Afioga i le Fofoga Fetalai i tupe maua mai le tele o ia Matagaluega. O le atugaluga po o se tuualalo foi lau Afioga i le Fofoga Fetalai, e ao foi i le tatou Malo ona fautuaina nei Matagaluega, ina ia faaleleia a latou auaunaga ma siitia le tele o seleni e faaono mafai ona maua mai, ona e i ai le talitonuga, o le tele o nei Matagaluega atonu e le o lava le sailia mai uma o seleni e ao ona mafai ona maua mai e fesoasoani i le tupe faasoa a le tatou Malo.

Lau Afioga i le Fofoga Fetalai, ona pau ia o nai vaega i le aotelega e avatu ai se manatu i le Tala o le Tupe, atonu e o o i le taimi o le tatou faitauga lona tolu ona maua lea o auiliiliga o nisi o vaega o lo o faapea ona faailoa mai i Matagaluega taitasi. A o lena taimi lau Afioga i le Fofoga Fetalai, o le a

taumafai atu nai motugaafa e fesoasoani ai foi i le aiga Kapeneta aua Samoa ona pau lenei o se avanoa e mafai ai foi ona faaoo atu ni fautuaga po o ni manatu foi, ona e le o maua ni avanoa tele e valaaulia ai e Matagaluega sui usufono aemaise lava lenei Vaega Faaupufai, a o tapenaina a latou manulauti ma fuafuaga alualumamao.

Lau Afioga i le Fofoga Fetalai, ou te fia amata mai i le Pulega o Tagata Tafafao mai Fafo. O se manatu lau Afioga, o le tele o faa-marketing po o le promoting a le tatou atunuu, o lo o faapea ona faalauiloa atu le vaega a le SANG SUNG and Culture. Peitai ane o le tele o faletalimalo o lo o ou vaai i ai i totonu o le tatou atunuu, o lo o i totonu o le taulaga i Apia, e le o maua ai le tele o vaega ia o lo o faapea ona faalauiloa atu i tagata tafafao mai fafo. Atonu foi o le tasi lea vaega e faale o tele ai ina omai, ona e le o tele ni faasalalauga o lo o faapea ona faaaluu atu, aua o le tele o tatou faletalimalo o lo o tu i le taulaga i Apia. O vaega ia e taua mo.....

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e sese atoa lea manatu e fai mai. O taimi uma lava ou te alu ai i Niu Sila ou te vaavaai ai i nusipepa o la e alu atu ai faasalalauga i TV a Niu Sila ma Ausetalia, lea e tele ai a tatou tagata asiiasi mai i Samoa nei. O le mea lea e tupu, o packages o ave e tatou faletalimalo e le o mafai ona latou tauva ma faletalimalo i Fiti. A mafai ona latou tuu ifo i lalo a latou tau, ona faigofie lea ona latou mauaina le tulaga lena o le maua o tagata e asiiasi maimoa mai i Samoa nei. O mea nei o faasalalauga i fafo, e matua tele foi faasalalauga o lo o fai i le internet. O le sese atoa lena o le saunoaga a le sui usufono. O lo o tele tatou marketing o lo o fai nei. Ae e te fiu lava e maketi a tatou faletalimalo, ae afai lava e le tutusa le tulaga o tatou faletalimalo ma packages la e aveane i isi atunuu, o le tulaga lena. Ua fiu foi e ave nei faamanatu ia i latou, e i ai lava faletalimalo o la e latou te faia le tulaga lena i le tauvaga, ma o lae foi e olaola lelei lava. E i ai isi faletalimalo latou te le lava ona faatauva, ona tupu ai loa lea o mea faapena, a o le tele o le galuega lea e fai o lea e faatino e le tatou Malo. O le fesoasoani atu lena, ae le o sao le mea lea e saunoa mai ai le sui usufono.

FOFOGA FETALAI: Ia, malo saunoa. Tulai mai le sui usufono mamalu e faaauau mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai lava i lau Afioga. O se tasi vaega foi e fia avatu ai se fautuaga, pe mafai ona tapena pea i tausaga ua tuanai sa i ai special events e le gata i le Teuila, a o Festivals, o Sports Tournament, pe mafai ona vaavaai i ai e tapena ai ni packages faapea e pei ona saunoa le Afioga i le Palemia, e package faalelei e galulue faatasi ai ina ia mafai ona i ai ni special events i masina taitasi pe tailua pe taitolu, ona atonu e mafai ona i ai se isi faaopoopoga.

FOFOGA FETALAI: Malie le sui usufono se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, na amata mai lava i le 1991 ona fai a tatou special events. Sa le i i ai ni mea na muamua atu. A o le tausaga o lea ou te tau manatua nei na faataoto mai ai le kalena e faasalalau i fafo special events i masina uma. Ua uma foi ona kava lena mea. A o le tulaga lea, e i ai le galuega e tatau ona fai e latou o lo o aafia i le tourism industry ona faataitai i isi faletalimalo. E le o faletalimalo uma lea e aafia i tulaga ia. A o le tulaga lena, a iloa loa e tatou ona faatauva ona maua lea o nai a tatou faaopoopoga.

O le tulaga foi i le mea lea o le atiaeina o Samoa e avea o le laumua o fonotaga ma le laumua o taaloga, ua leva ona faatino e tatou le mea lena. O lea ou te manatua le tele o tauvaga a le lalolagi, e le gata i tauvaga o taaloga a le lalolagi, a o tauvaga a le tatou itulagi, regional, competition i taaloga, o lea lava e malo tatou. Ae mafua lena, ona o le lelei o tatou faletaalo ma le anoano o le mau fonotaga ia e usuia mai i Samoa nei, aemaise lava ona ua alofia Fiti i le tulaga foi o i ai latou. E tele lava la le galuega lea o lo o fai e le Malo i le faatupulaia o le anoano o tagata tafafao mai i Samoa nei, ae tatau lava ona taumafai foi le industry ina ia fai foi le latou pitolaau e fesoasoani atili ai i le faaopoopoina, ae le o le tilotilo mai i le Malo i taimi uma taimi uma lava. Lau Afioga i le Fofoga Fetalai, ua uma ona faatinoina uma mea na e te fai mai ai.

FOFOGA FETALAI: Malo. Tulai mai le sui usufono mamalu e faaauau mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai lava i lau Afioga i le Fofoga Fetalai. Toe tasi lava si vaega lea mo le Pulega o Tagata Tafafao Maimoa Mai. E avatu ai se tuualalo i le toe faaleleia o nisi o tatou sites. Mo se faataitaiga o tatou auala i Lake Lanotoo, ma nisi o auala e mafai ona savalia foi e i latou o lo o tele ina malaga mai i le tatou atunuu. Ou te talitonu e fesoasoani foi lea i nisi o vaega o lo o faapea ona saunoa i ai le Afioga i le Palemia e ao ona faaleleia i totonu o le tatou atinae mo tagata tafafao maimoa mai.

Lau Afioga i le Fofoga Fetalai, ona ou see mai ai lea i le vaega lea o Aoga. Lau Afioga i le Fofoga Fetalai, e tusa ai ma faamaumauga a le Statistics, pe tusa ma le 3% o i latou i luga i le 15 tausaga e i ai faailoga po o Degrees, first Degrees i totonu o le tatou atunuu. O le taua o lea vaega lau Afioga, ona e foliga mai e silia ma le 80% o i latou o lo o faapea ona aotauina e le o mafai ona o o i le Iunivesite po o iu mai ma faailoga. Peitai ane lau Afioga, e matauina e le o tele ni a tatou polokalame po o ni vocational training programmes mo le 80% i le 90% lea o le tatou atunuu. O lea e avatu ai se tuualalo e tauala atu i lau Afioga i le Fofoga Fetalai mo le Matagaluega o Aoga, e ao ona toe tagatagai ma tapue po o a ni polokalame e talafeagai mo vocational training ona o le tele foi o nisi o taleni o lo o faapea ona i totonu o le tatou atunuu, e le gata o taaloga, o fatupese, o le taina o meataulima. O le tasi lenei o vaega e talitonu le agaga lau Afioga, ua tatou vaavaai foi i ai i atunuu i fafo, e sili atu ona tele tupe e maua e i latou o lo o latou faatinoina nei taleni, na i lo latou e i ai o latou faailoga.

Lau Afioga i le Fofoga Fetalai, o lenei foi vaitau, tusa nei ma le silia i le 20 tausaga talu ona amataina le tatou Iunivesite i le Papaigalagala, sa amata i le vasega foi lea o le University Preparatory Year po o le UPY. I le taimi lea pe

na amata na o se 20 tamaiti i le Form 7. I le taimi nei, ua silia ma le 100 pe ua lata i le 1,000 tamaiti o lo o faapea ona o o atu i ai. O se lagona lau Afioga i le Fofoga Fetalai, pe le ua tataua nei loa ona tagai le tatou Matagaluega o Aoga, e aveese mai i totonu o le Iunivesite le vaega lea a le UPY ae tuu loa o lea ua maea ona tapenaina a tatou kolisi foi o lo o faamoemoe i ai ae ave loa e fai ai le Form 7. O le taua foi o lea vaega lau Afioga, o le a faapea ona aumai ai le tele o faiaoga lau Afioga i le Fofoga Fetalai o lo o i ai i totonu o le Iunivesite, atonu e taua lo latou sao i le faaleleia lea o aoga a tamaiti o lo o faapea ona manaomia i totonu o high schools.

Lau Afioga i le Fofoga Fetalai, o se naunautaiga foi ona o lenei vaitau ua faapea ona alu i luma le tekonolosi, ma o le tele foi o le technology, aemaise le vaega lea a le IT ua tele ina lelei ai isi atunuu. Peitai le tatou atunuu, ou te talitonu tasi lenei maketi e ao ona tatou galulue i ai, e le gata i vocational training a o aoga foi, ina ia improve ina ia mafai ona tele ni tatou programmers ma i latou e faaleleia le polokalame tau computer. Tasi lenei maketi atonu e ao foi ona tatou sailia.

Lau Afioga i le Fofoga Fetalai, ona ou see mai lea i le vaega tau taaloga. Ou te talitonu pei ona saunoa le Palemia ma nisi foi o sui usufono, o se mitamitaga tele lea o le tatou atunuu o le Manu Samoa. Ou te talitonu afai e 50 tamaiti o le tatou atunuu e mafai ona taaalo i atunuu i fafo i taaloga ma maua ai seleni, e tele foi lea alagatupe tele a le tatou atunuu. O le fesili tele; o le a se tatou galuega e mafai ona faatino ina ia faateleina ai nei tamaiti o lo o faapea ona i ai le taleni. E avatu ai le talosaga lau Afioga i le Fofoga Fetalai e toe seu silasila ina ia mafai ona faaleleia malae ma fale taaloga i itumalo i tua. Faafetai o lea ua maea ma manaia fale taaloga i Apia, peitai ane o le tele o afioaga ma itumalo i tua aemaise le motu i Savaii, e le mafai ona faaaogaina nei facilities, vagana ua omai national po o international tournament ona faaaoga lea. Ae a fai e mafai ona faaleleia a tatou sport facilities i nuu i tua, ae le gata i lea ia faia faalelei certification a tatou faiaoga, aemaise o i latou o lo o aoaoina taaloga, o le vave foi lea ona maua mai seleni ma maua mai se lumanai manuia o nisi o alo ma fanau e le mafai ona ausia Iunivesite.

FOFOGA FETALAI: Toe lima minute o le sui usufono.

Afioga TOEOLESULUSULU CEDRIC POSE SALESA SCHUSTER: Faafetai. Lau Afioga ona ou see mai lea i le vaega lea o le Agriculture po o le Matagaluega o Faatoaga. Ou te talitonu lau Afioga o lea ua maua le vaega lea sa search. O le tuualalo lau Afioga i le Fofoga Fetalai, e ao ona faataua i lea polokalame le tatou import substitution po o le vaega foi lea o faatoaga ma atinae e faaitiitia ai le tupe e umai fafo. O le tatou naunau pea e faatele maketi e ave i ai i fafo a tatou atinae, e tele foi feuiuiaiga. Afai e mafai ona lava a tatou faatoaga e faaitiitia ai le input, o lou talitonuga lau Afioga i le Fofoga Fetalai, o i ina e mafai ona faaitiitia ma maua ai tupe i totonu lava o lo tatou atunuu a o le i vaai atu i le export market.

Lau Afioga i le Fofoga Fetalai ona ou see mai lea i le vaega lea i le energy. E talitonu e avatu se tuualalo i lau Afioga i le Fofoga Fetalai ona ua matauina pea e lua vaega o Matagaluega a le Malo o lo o i ai energy units, o le Matagaluega o le Punaoa Faalenatura ma le Siosiomaga ma le Matagaluega o Tupe. E talitonu e ao ona vaavaai i se auuala e mafai ona laugatasia ai lea

vaega ina ia faaleleia ai le faagasologa o atinae aemaise lava renewable energy ma energy efficiency.

O se isi lagona lau Afioga i le Fofoga Fetalai, e ao ona silasila le Malo i le faia lea o se Tulafono ina ia mafai ona fausia ai ma aumaia ai e tagata taitoatasi a latou renewable energy po o solar panels ma faatino ai e latou ma sell back to the group. E tasi lea vaega atonu e faafaigofie ai foi ona faaitiitia tupe alu a tagata taitoatasi, ae tele foi se fesoasoani i totonu o lo tatou atunuu.

Lau Afioga i le Fofoga Fetalai, ona ou see mai lea i le vaega lea o le Siosiomaga. O se fautuaga ona ua matauina le vaegatupe lea i le PPCR o lo o i ai galuega e faamoemoe ina ia toe faatinoina foi nisi peleni po o plans mo nisi o vaega o le atunuu, peitai ane ua maea ona tapena nisi o fuafuaga sa i ai muamua. Atonu e aoga lea US\$12milion ea pe a, ae amata faatino ai galuega, ae aua ne i toe faamaumauina foi e toe tapena ai nisi peleni ua uma ma ua maea.

Ona ou see mai ai lea i le vaega lea i le fonotaga o lo o faapea ona tapena atu i ai lo tatou atunuu i le tausaga o muamua. Pau lava se tuualalo afai e tau ane ai i se finagalo o le Malo i nisi o tapenaga e tusa o a tatou targets e vaavaai i ai, ina ia mafai ona oo atu i lea fonotaga pe a talafeagai, e manaia foi pe a launch ai muamua, o le siitia lea o eleele i le gataifale ina ia mafai ona faasaoina ma le tapenaina lea o se tatou environmental trust fund, e mafai ona tuu i ai seleni ina ia mafai ona fai ai ni feagaiga ma afioaga taitasi e faasao o latou gataifale, pe faaoga fuafua lelei foi o latou gataifale ma tuamaota, ae mafai ona fesoasoani i ai i a latou atinae.

O le vaega mulimuli lau Afioga i le Fofoga Fetalai, o le talosaga mo le Ofisa o le Fono Aoa. O sui usufono nei e manaomia lava lau Afioga i le Fofoga Fetalai le toe faaleleia o le Tala o le Tupe mo le tautuaina o alii ma tamaitai sui usufono o lo o faapea ona fitaituga aua lo tatou atunuu. O se isi vaega e talosagaina le fia faaleleia o tapenapenaga e le gata o fonotaga, a o ofisa foi ma vaega o lo o faaogaina e sui usufono.

O le vaega mulimuli lau Afioga i le Fofoga Fetalai ona o lou itumalo e le tagisa, ae pau lava nai vaega o lo o fia avatu i ai se talosaga ona o le afioaga lea o Satuimalufilufi. Lau Afioga i le Minisita mo Galuega, Felauaiga ma Atinae Esee, o lenei afioaga, o le afa o le afioaga ua alaala i uta, a o le auala o lo o nofoia e lenei afioaga e fai lava sina le lelei aemaise lava taimi o timuga. E talosagaina pe a mafai ona oo i ai se fuafuaga a o le i maea lenei 5 tausaga po o le isi foi 10 tausaga, e talitonu o le a mafai ona tapenapena foi i ai.

Ma le vaega mulimuli lau Afioga i le Minisita mo Aoga, Taaloga ma Aganuu. O lea na saunoa lau Afioga i le Minisita i le fonotaga talu ai o lea o le a faaleleia le malae taalo o Aana Alofi Nu. 1. Afai o lea, a o lea e vaai atu i le Tala o le Tupe e le o faamaoti mai ai se fuafuaga faapea, a o lea foi e tapena mai le itumalo aua le faaleleia o le latou malae ina ia mafai ona faaogaina e alo ma fanau i taaloga.

FOFOGA FETALAI: Ua maea le taimi o le sui usufono, se i faamaea mai le saunoaga.

Afioga TOELESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai ma e faamaea atu ai se faamatalaga, faafetai i lau Afioga i le Fofoga Fetalai mo le avanoa. Lau Afioga i le Palemia

ma le Kapeneta, o outou faiva na, matou te tapuaia a outou galuega. O a ni lelei, ia ave lea mo lo tatou Tapaau i le lagi, o a foi ni masei po o ni sese o lenei Itu, faamagalō mai.

O le toe talosaga mulimuli lau Afioga i le Fofoga Fetalai, o eleele lava o lenei afioga o Satapuala. Ou te faafetai o lea ua amatalia feutagaiga ma o le tatalo i le Afioga i le Minisita mo Eleele aemaise le Afioga i le Palemia, pe maua se avanoa e mafai ai ona faamaea feutagaiga o lo o faia nei ina ia maua se toafilemu, faafetai.

FOFOGA FETALAI: Malo, faafetai saunoa i le sui usufono mamalu mo Aana Alofi Nu.3. E manatu o lea ua taatia i Paga le tuleiga ma le saunoaga i lenei aso aemaise ai foi fautuaga matagofie ua oo i aao o le Kapeneta - malo saunoa, malo le fetalai.

E tatala atu pea le avanoa i se tasi o toa manumanu e lauga i lenei taimi o le aso.

Tulai maia se tasi o sui usufono talavou mo Faleata Sasae, Aveautau o Samoa e tulei saunoa i lenei vaega o le aso.

Tofa AVEAU TUALA LEPALE NIKO PALAMO (Faleata Sasae): Faafetai lava i lau Afioga i le Fofoga Fetalai, e faamalo atu foi i le paia ma le mamalu o le Maota Fono nei.

O le a ou le toe talatalaina faaupega lavelave mamalu o le aso, ou te le toe ta foi i Utumaau paia aua ua uma ona laumanuula le aso, ae muamua ona sii le faafetai i le Atua ona o lea ua tatou toe aulia mai lenei aso i le tatou fonotaga. Ou te faatulou atu ai i le paia ma le mamalu o le Palemene nei, e faatulou foi i le paia ma le mamalu o Samoa o lo o faafogafoga mai i lenei fonotaga. Lana Afioga Mamalu O Le Ao o le Malo ma lau Masiofo, le Sui Ao ma lau Masiofo, Afioga i le Faamasino Sili ma le faletua ma le Ofisa o Faamasinoga, e faapea foi Faafeagaiga o lo o tauasuina le vai o le ola i lo tatou atunuu.

Ae ou te le i tautala i le Tala Autu o le Tupe, e muamua ona avatu lau faafetai i lou itumalo o Faleata Sasae i le paia i le Susu o le Tama a le Fale, Tapaau ma Usoalii aemaise foi le Matua ia Patauave, lo oulua toalua le nofolua ma outou aiga, le matua aemaise foi o upu ia te oe Faleata.

O lenei aso ma lenei taeao, e ese le matagofie o le faalogologo ma le faafogofoga i manatu ua faaalua, ae muamua ona momoli lau faafetai i lau Afioga i le Minisita mo Galuega, Felauaiga ma Atinae Eeseese aemaise lau Afioga i le Palemia ona o le ala laupapa o lo matou nuu o lea ua amata ona fausia. Sa i ai lou manatu e uma loa lau faafetai i le ala laupapa uma ma lau lauga ona ua manaia lea galuega. E pei foi o saunoaga a i latou ua tuanai atu, e le tagisa foi lo matou itumalo. Pau lava lea lau Afioga i le Minisita ma le Malo, se i tagai ane lava i le auala i Samalaga i Alafua-uta faamolemole.

E ala ona ou talanoa so o i le auala lea, ona pau lava lea o le vaega o Samoa e le sao i ai se pasi ma e oo mai lava i le taimi nei o lo o savali lava tagata o lenei vaega e omai e faatali le pasi i Alafua. Ou te masalo ua silafia le mea foi lea e i ai le vilimaa, e le sao i ai se pasi i tua i ina ma e leai foi se pasi e mafai ona alu i ai. Na ona taatia atu lava i tafatafa o lau Afioga i le Minisita se i tagai ane i ai ona o lea ou te vaai atu, o lea ua alu i luga le paketi a lau Matagaluega i le faiga o auala, se i e alofa ane i lea vaega.

O le a fai sina au faamatalaga laitiiti i le Tala Faatatau Autu o le Tupe.

Ou te faafetai i le Minisita ma le Matagaluega i le Tala Faatatau o le Tupe mo lenei tausaga. O lea ou te matau atu, o le lua ai lenei o Tala o le Tupe talu ona tulai mai lenei sui usufono. Talu foi ona tulai mai lenei Palemene ua ou maua ai foi le avanoa e vaavaai ai i suiga o le tamaoaiga aemaise lava i galuega faatino a Matagaluega taitasi.

E pei ona saunoa le Afioga i le Minisita, o lenei Tala Faatatau o Tupe e faavae i se tulaga maaleale. O se Tala Faatatau o Tupe e faavae i le vaivai o le tamaoaiga. Talofa la i le Minisita ma le Matagaluega o Tupe i le tau faavasegaina ma le tau tufatufaina o nei seleni. Maumau la pe ana faapea e fesoasoani ane i ai nisi o Matagaluega i le tupe maua a le Malo e fua i tupe o lo o faaalua i tausaga taitasi, aua e i ai Matagaluega e pei ona faaalua i le Tala o le Tupe, mai le 14 o Matagaluega a le Malo, e 8 Matagaluega o lo o tumau lava le tupe maua. Ou te masalomia, e i ai lava Matagaluega e faigata ona maua ni tupe maua, ae ou te iloa i lalo o sini autu a se tasi o Tala o le Tupe e pei ona i ai, o lo o manino lava le fautua mai i sini autu mo tupe a le Malo o lo o faapea mai ai, ia faaleleia galuega faatino a Faalapotopotoga a le Malo aua le faamama avega i le Tala o le Tupe a le Malo mo nonogatupe e le tologiina. Ona sau ai lea i le isi vaega i lalo, ia uunaia le faaleleia o le aoina o tupe maua a le Malo. O lona uiga o lea lava e silafia e le Matagaluega o Tupe o lo o i ai ni faaletonu i totonu o nisi o Matagaluega a le Malo i le faatinoina o galuega e maua ai tupe maua e fesoasoani i le tamaoaiga. E le gata i lea o lea foi e silafia e le Matagaluega o Tupe o lo o i ai foi le faaletonu i le aoina o seleni mai totonu i nisi o Matagaluega a le Malo. O lea la e fautua atu ai i le Malo ma Matagaluega, se i fesoasoani ane i le Mainisita o Tupe i le tau faasoasoina o nei vaega.

A tagai i le pasene o tupe maua e pei ona taumafai atu foi i ai se tasi o sui usufono i lalo o ordinary receipts po o tupe maua, na o le 1.7% le tupe maua, ae 4.8% le faasiliga o tupe faaalua. O lea lava e i totonu o le tusi lenei ina ne i te i ua faalavelave mai se isi. O lea lava e sau i totonu i le tusi lenei lea foi vaega i le faamatalaga. E pei ona tagai i ai o lea e faapea mai le tusi lenei, “Atonu e oo atu i le tausaga lenei ua 2.3% se tupe maua a le tatou Malo, peitai ona o le afa masalo pe na o le 1.3%.” O lea la ou te talanoa atu iinei, se i tagai ane i vaega ia i Matagaluega aua e i ai lou talitonuga, e i ai Matagaluega a toe tagatagai i a latou manulauti ua faataatitia mo le 5 tausaga, se i toe fai i ai se fuafuaga ina ia suia ina ia maua mai ai nisi faamanuiaga, e mafai lava ona toe oo i ai ma e i ai se taimi ona ou talanoa atu lea i lea vaega.

O lau matau atu foi i le Tala Faatatau o le Tupe lenei, o le tele lava o Matagaluega e pei o le agana foi lele ua tupu mai ona o le internet o le cut and paste. E faapena foliga o le Tala Faatatau o le Tupe.

A e tagai i le Tala o le Tupe i le isi tausaga i tua atu ma le isi foi tausaga lea na tea nei, o mea lava nei e tasi o lea foi ua toe sau i le Tala Faatatau o le Tupe. O le ala lea o lou fautua atu atonu o le mafuaaga o lenei vaega ona o le manulauti ua uma ona faataatia i le 5 tausaga, ae e i ai lava lou talitonuga a toe tagatagai Matagaluega i a latou sini autu ma a latou manulauti ina ia sui nisi vaega e faatatau i le taimi ua i ai le soifuaga, e faatatau i le mea o lo o tupu i le vaitaimi lenei e mafai ona fesoasoani ai i le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau afioga i le Fofoga Fetalai.

FOFOGA FETALAI: Lau afioga i le sui usufono o saunoa sei tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le talanoa lea e talanoa mai ai i le 1.3 e faasino lea i tupe maua a le atunuu atoa, o lea e te talanoa mai i tupe maua a le atunuu atoa ae o lea e agai lau talanoaga i Matagaluega ao le mea tonu lea e te talanoa mai ai o le GDP o le Gross Domestic Product, a o mea tonu ia e te talanoa mai ai o le GDP. O e silafia tupe maua a le atunuu lea e i ai nei? O le fesili atu lena po o silafia e le sui usufono le tuu aofaiga o tupe maua a le atunuu lea e te agai tonu i ai, ona o lea e faapu moomoo lau saunoaga i Matagaluega, a o lea e te talanoa mai i tupe maua a le atunuu atoa, o e silafia e fia?

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: O lea ou te talanoa atu i fuainumera ia e sau i i. O lea foi ou te talanoa atu i tupe maua aua o tupe maua a Matagaluega tupe maua na a le atunuu.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea lena o lea na ou tulai atu ai lau afioga. Ou te lagona e le o silafia e le sui le lavelave lea e avatu i fuainumera. O le tupe maua a le tatou atunuu lea e talanoa i ai le 1.3 lena, i le 2013 e piliona 575 milion tala lea e faagaioi ai le atunuu atoa, lea e avatu i totonu ii, fuafuaga mo le 2013 i le 2014 e piliona 676 miliona tala 3.5%, lea ou te talanoa atu ai, ona o lea ua amata ona ou taumate atu e ese le mea lea e te talanoa mai ai ese le mea lea e avatu ai fuainumera ia. O lea e agai mea ia i le GDP Gross Domestic Product e le o agai i le Revenue lea e te talanoa mai ai. Lau afioga i le Fofoga Fetalai o le ala lena o lea e tau faamalamalama atu ia mea nei ona e ese mamao mea ia e avatu ai fuainumera ese mea na e te saunoa mai ai.

FOFOGA FETALAI: Tulai mai le sui mamalu e faaauau le saunoaga.

Tofa AVEAU TUALA LEPALE NIKO PALAMO: O au ou te talanoa atu lava i ordinary receipts ia ei i ma current payments ae ui i lea o le a faasolo pea lau lauga. O le tasi o vaega o lauga taua e le Minisita o lo o faapea mai foi i le lagona fiafia ua i ai le atunuu ona ua i ai se fuafuaga a le malo o le a le siitia lafoga, ae i lalo ifo o le vaega lea o lo o faapea ae e i ai se faamoemoe e i ai ni auaunaga a le malo o le a siitia nisi o auaunaga, ona tau faafesili ai lea po o a la nisi o auaunaga nei, aua a siitia nisi o auaunaga nei a Matagaluega po o Faalapotopotoga nei, o ai e aafia ai, e aafia uma lava le mamalu o le atunuu, aua a sii i luga le auaunaga, faataitaiga aua o lea na talanoa analeila sii i luga le levy o le penisini o lea foi o le a sii nisi o auaunaga a le EPC o le a sii nisi o auaunaga a le Environment o nisi o auaunaga a le Faamasinoga vaega na, aemaise o auaunaga a le Falemei Soifua Maloloina, ia o nei uma auaunaga e toe alu i tua i tagata lautele o le atunuu. Na o le fautuaga lava e tagai ane pe le sili ai le sii o le lafoga i lo le siitaga o lenei auaunaga.

Afioga Hon Faumuina Tiatia Faaolatane Liuga: Lau afioga i le Fofoga Fetalai.

FOFOGA FETALAI: Malie le sui saunoa sei tuu atu le avanoa i le faamalamalama a le Minisita o Tupe. Tulai mai le Minisita.

Afioga Hon Faumuina Tiatia Faaolatane Liuga: Lau afioga i le Fofoga Fetalai, o le siitaga o services nei e le o tagata uma e aafia ai, aua e le fananau uma ni tagata uma o Samoa i se taimi se tasi, afai o le pepa fanau pe sefulu pepe ia ua i ai i lenei masina po o lenei foi aso o le mea lena e sii, o faaipoipoga e le faaipoipo uma tagata i se taimi se tasi e le maliliu uma tagata i se taimi se tasi, o auunaga i le falemai e faapena foi, these services are highly subsidize e le malo. O se faataitaiga a e alu e vaai le fomai i Motootua e \$5, ae a e vaai le fomai i le taulaga e \$20 pe \$25, a alu la i le taxi le tagata e alu e vaai le falemai i uta ma toe sau e tutusa lelei a le tupe e alu i le taxi ma toe foi mai ma le mea e vaai ai le fomai i uta toe faatali i le laina umi, o e EPC ma le Vai ua faatulaga a latou siitaga ia, ao siitaga o services ia e le o tagata uma, a sii le VAGST e aafia le atunuu atoa. Ma lou faaaloalo lava.

FOFOGA FETALAI: Tulai mai le sui mamalu e faaauau le saunoaga.

Afioga Hon Palusalua Faapo II: Lau afioga le Fofoga Fetalai o le mea e fia faasao.

FOFOGA FETALAI: O le a le mea e fia faasao.

Afioga Hon Palusalua Faapo II: Pei o le saunoaga manino a le afioga i le Minisita e le aafia tagata uma, ae faamanatu atu i le Minisita e matua aafia tagata e leai ni galuega, tagata na e mamai soo, aua foi e le paleni le mea e tua i ai, tagata na e sili ona pagatia i le tulaga lea, o lau faavaseagaina e le aafia le toatele e maua tupe ae pito i aafia tagata e leai ni galuega ma leai ni mea e tua i ai. Pei o le aafiaga lea e tau faamalamalama atu i le matautia o le aafiaga o le atunuu i siitaga nei, atonu e te le o manatu e faapea e laiti tagata e aafia ai, la e faafogafoga mai le atunuu, o le matua aafia o tagata e aafia i le siitaga lenei.

FOFOGA FETALAI: O lea ua maua lou finagalo. Lau afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O au lea ua amata ona faaletonu le mafaufau o lea e augani mai lana vaega e aua le sii i ae sii ia VAGST ao lea e tulai mai ia fai mai e aua le siia mea ia, o le mea lea e tupu, o le a le mea na le faia ai se tou fono, sei tou o mai ma se manatu e tasi, ae o le agai mai o lau vaega e ese mea ia e agai mai ai ae ese foi mea ia e te agai mai ai, e faapea ona taitai se vaega? E ese mea e fautua mai e latou ae agai mai oe pei e tetee i mea ia e fai mai ai lau vaega. A uma nei ona tatou fono ona fai lea o se tou fono fai e lelei ona aumai se fautuaga e tasi ae le o le touluulu eseese mai o a outou mea, e le lelei i le faalogologo atu a le Kapeneta, o lea tou te aumai se manatu olea tou te fautua mai ae ese le mea lea tou te aumaia, tu ae le isi e ese le mea tu ae le

isi e tetee tu ae le isi e tetee, faapefea ona fai ae amata mai ia oe le taitai, e le lelei lea mea i le faafogafoga mai o le atunuu.

Afioga Hon Palusalue Faapo II: Lau afioga i le Fofoga Fetalai.

FOFOGA FETALAI: Ou te ofo Palusalue.

Afioga Hon Palusalue Faapo II: E leai. E tasi a le mea lea e laugatasia ai le vaega lenei o le pagatia o le atunuu. Ao le saunoa mai o le Palemia e fono matou, lau afioga e tataua ona fono latou aua e tele le faaletonu la e i ai.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Toetiti atoa le lua vaiaso o savali tetee le Itu Agai e tetee i le VAGST fai mai o le a ma a ma a, ia e leai lava ni mea faapena na tutupu, e leiloa pe fia tagata ia na savali tetee i le sui o taavale afi, fai mai e 700 tagata ia o le a feoti e tasoa e taavale, lona uiga aemaise tamaiti, o lona uiga e ese ia ituaiga taavale e fealuai fealuai lava vaai atu i tamaiti alu tasoa tamaiti, e mataga tele le mea lea e tulai mai i le tou Itu Agai.

Tofa AVEAU TUALA LEPALE NIKO PALAMO: Lau afioga i le Fofoga Fetalai.

FOFOGA FETALAI: Malie le sui saunoa manatu ua sagatonu lau o le foa, aua e te toe agai i mea ia o siitaga ia, o lea ua matua manino le faamalamalamaga e le Minisita o Tupe e eseese aafiaga o le siitaga o le VAGST ma siitaga ia e i ai atugaluega o le tou taitai. O lea see i se isi mataupu ua toe lima ou minute.

Tofa AVEAU TUALA LEPALE NIKO PALAMO: Atonu e i ai se taimi ona ou toe oo lea i le vaega lea pe a lava se taimi. A ou vaavaai atu i le Tala o le Tupe i exports ma imports, e ala ona fai lau tala e muamua momoli lau faafetai i a tatou paaga ia e aumai ai a tatou tupe maua ia e fesoasoani i le Tala o le Tupe. A tagai i a tatou oloa ia e faatau atu i fafo, o le tele o atunuu ia e manuia ai e i ai Niu Sila, a tagai i Niu Sila toetiiti 30% oloa ia e import mai, e sau mai Niu Sila, ae a tagai i a tatou export e ave i Niu Sila, pe na o le 14 i le 16%. O lea ou te fautua atu ai i le vaega lea, se i tagai ane. Ou te iloa o le tele o mafuaaga o mea ia, o le faia o mea ia o vaega o Regulations ia e tuu i totonu o mea ia a tatou e mafai ai ona ave i Niu Sila. A fuafua i le tele o tupe, e \$792 miliona le tatou tupe lea e alu i a tatou imports. O le tele lava o Niu Sila, ae faafetai ia Niu Sila o lea e tele foi fesoasoani ia e aumai mo tatou.

Ona ou oo mai lea i le Ofisa o Faatoaga: ou te fesiligia le \$5miliona lea e faatino ai le vaega lea e ave i lalo o le even i le faafuafuaina o le vaega lea, o le isi vaega o le polokalame lea a le Sa-Set, ou te fesiliga pe aisea e le faatino ai le Sa-Set e pei o le faatinoga o le Stimulus Package foi lea e faaalu i lalo o le kofe, koko ma le niu e alu faapena pei o le faatinoina o le polokalame lena, ao le mea lea e i ai nei le vaega lenei e te alu e fai lau nonogatupe faatoa mafai ona e lavea i totonu o le vaega lenei, afai lau nonogatupe e 16% e toe totogi e oe lea le tagata faifaatoaga, o lea na ona ou talosaga atu ai i le vaega lea o le Sa-Set, afai o lea ou te talosaga i se \$16,000.00 e faatino ai sau faatoaga, o le a le mea e le faatino ai pei o le faiga o le ponesi lea e alu i lalo

lea e i ai le isi tupe lea ua toe ave nei i ai le \$300,000.00 e faatino ai lea vaega. Ona ou oo mai lea i le Ofisa o Aoga e momoli lau faafetai i le Minisita o Aoga ma le Matagaluega o aoga ona o le polokalame lea ua ou vaai atu o lea ua faatupe o lea o le a amata ona aoga fua a tatou fanau e alu atu i le Year 9 e tau i le Year 11 pe afai e sao lau vaai atu i le tupe lea ua alu i le vaega lea. Faamalo faafetai i lea vaega o le tatou galuega. Ou te fesili atu lava i le mea ua oo i ai le tatou school net faamolemole ma le polokalame lea sa tatalaina e le Palemia masalo po ua 3 i le 4 tausaga lea e tau o le one laptop per child, leaga e i ai aoga ua maea ona ave i ai ia vaega ae po o le a se faatinoga o le a oo i ai lea vaega. Ona ou oo mai lea i le vaega lea o le SPA, ou te faafesili atu lava po o fea ua oo i ai le tatou kamupani lea o le PFL, lea foi sa tatou vavao ai pe ua maea ona faatau po o le a se taunuuga ua oo i ai lea vaega, ou te fia malamalama foi po o le a le mea ua oo i ai le uafu i Satitua, aua o lea ou te vaai atu i le vaega ole tupe lea e pei ona faatino atu i i e i ai le 4 miliona lea e ave i le vaega lea, i lalo o le fesoasoani lea a Eveni e faatino ai lea vaega.

I le Ofisa o le Palemia, ou te fia fesili lava i le 60 aso foi lea o le tatou free visa lea e ave e omai ai tatou i totonu o le tatou atunuu, ona o lalo o le tuutuuga o le 60 aso o le visa lea e mafai ona e sau iinei ma apalai ai lou pemitia e te faigaluega ai pe fai ai foi sau pisinisi. Ae a pe a toe tagai i lea vaega, afai e i ai se tagata e sau e fai sana pisinisi i lalo o lenei visa ae a pe a toe foi pea i lona atunuu ona toe sauni mai ai lea. O le vaega lona lua, afai e i ai se tagata na falepuipui po o se faasalaga na oo i ai i atunuu i fafo e tatau foi ona i ai se fuafuaga i lalo o lenei 60 aso, ona o le visa lenei e le o i ai se aiaiga faapea o oe sa e falepuipui i Niu Sila po o se vaega e mafai ona taofia ai ona e sau i totonu o le atunuu. E i ai le agaga lelei na ala ai ona fai lenei 60 aso o le visa ae pei ua faaoga e isi tagata e fai ai lea vaega e pei ona ou taumafai atu ai.

FOFOGA FETALAI: Toe 5 minute o le sui usufono.

Tofa AVEAU TUALA LEPALE NIKO PALAMO: Ona ou oo mai ai lea i le Matagaluega mo Galuega, Felauaiga ma Atinae Eeseese aemaise o le Faalapotopotog o le Malosi Faaletise. O lea ua maea ona saunoa se tasi o sui usufono i lea Matagaluega, ou te talosaga ina ia tagatagai i le lisi o le tatou paoa lea e ala ai ona tele le eletise o lo o lisi atu. O le isi vaega o le talosaga, pe mafai ona silasila lau Afioga pe mafai ona fai se audit o uaea ma poumoli ma mea uma faapenei, ona ne i te i ua i ai se isi e faipisinisi ai i lea vaega, ae na ona ou talosaga atu ina ia tagai ane lava i lea vaega o le auaunaga.

O le Matagaluega o Fesootaiga ma Faamatalaga Tekonolosi na ou fesili atu i le faatinoina o le Broad Band e pei ona saunoa le Minisita, o le Broad Band lea e foliga mai e faapitoa lava i Matagaluega ma Aoga, po o i ai se isi faamoemoega o le Matagaluega ae pe mafai ona faasafua atu i le mamalu o le atunuu e mafai ona access i ai aemaise lava i tamaiti aoga, o lotu ma mea faapena e fuafua i ai le alualu i luma o le tatou atunuu.

O le Pulega o Tagata Asiasi Maimoa mai Fafu, ou te iloa le tele o tupe maua mai i lea Faalapotopotoga, ou te iloa sa i ai foi le vaitaimi e lei mamao ai Samoa e omai ni tagata asiasi maimoa mai fafo i totonu o le tatou atunuu, ona sa tilotilo Samoa e ono afaina ai lana aganuu ma ono afaina ai lana tupulaga, a o le taimi lenei ua matua alu i le atoa Fiti ma isi atunuu e taumafai e avatu tagata tafafao maimoa mai fafo ia latou. O lea la ua tatou mananao e omai

tagata tafafao maimoa mai fafo e faigata foi ona omai tatou. O le tele o le vaega e ala ai ona faapea o le leai o se tatou vaalele, e le o lava vaa e omai i totonu o Samoa. A tagai i faamaumauga o lo o i ai e toatele lava tagata tafafao maimoa mai fafo o lo o omai mai Niu Sila ae pe na o le 34 malaga i le masina i le sau mai Niu Sila ae 12 i le 16 i le masina le sau mai Ausetalia. E leai se tatou vaalele o malaga mai i Asia a o lo o taumafai i tatou e uunai tagata tafafao maimoa mai fafo i Asia ae leai se tatou vaa e sau sao mai Asia mai i inei i Samoa seia vagana ua ui mai i se isi vaega. E faapena foi i totonu o Amerika e tasi le vaalele e oso atu i Hawaii, ou te iloa o le tasi lea vaega e mafua ai ona le toatele ni tagata tafafao maimoa mai i fafo e omai i le tatou atunuu.

O le isi vaega ua fai lava sina taugata o pasese e omai ai i tatou i inei i Samoa ae po o i ai se isi fuafuaga, a le o le Malo po o lau Afioga i le Palemia ma le Matagaluega, pe mafai ona toe taumafai ane e negotiate le pasese lea, o le alu i Fiti ma e nofo ai i se vaiaso po o le na o le \$300 a o le sau i inei i Samoa e le taitai ona afford e tagata asiasi maimoa mai fafo.

FOFOGA FETALAI: Toe 2 minute o le sui usufono.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai, a o le a faaiu atu le lau tautalaga aemaise lava i le fonotaga o lo o faia mai i inei a Atunuu laiti. E faamalo atu i le Malo i lea foi faamoemoe aua e manuia ai le atunuu. Ona pau lava lau fautuaga ona ua i ai se tala sala tua e faapea o lo o i ai se vaa e aumai e tuu ai nai tagata e fai ma apitaga i le toatele o nei Malo ae se i toe tagai ane pe le ono mafai ona faasoa i le Atunuu i alaafaga ma Itumalo taitasi. E le gata i lena o mea taumafa ina ne i te i foi ua aumai uma mai fafo mea taumafa o le fonotaga, ae pe o le a le mea e le amata ai loa ona tagatagai e o lo o faatapeina lena faamoemoe po o a uma mea e manaomia ina ia amata tapenapena i ai lo tatou atunuu, aua e foliga mai toe tasi le tausaga.

E momoli lau faafetai i lau Afioga i le Fofoga Fetalai aemaise o le Malo i le Minisita ma le Matagaluega ona Tulafono Tau Faaofi o le Tala Faatatau Autuo o Tupe 2013/2014 e pei ona faataatia. Ia manuia le tatou Fonotaga i lena aso.

FOFOGA FETALAI: Malo faafetai saunoa i le sui usufono mo Faleata Sasae, malo fautua, malo foi timai mo lena vaega o le aso ua faa-ao gagase lau Afioga e faaleo lua manaoga ma le sui usufono mo Faleata Sisifo o lea lava e malolo ma mapu o ia i niafane. O lo o ua avanoa foi le Maota mo se tasi o fia saunoa.

Tulai mai le sui usufono mo Falelatai ma Samatau.

Afioga TAEFU LEMI (Falelatai ma Samatau): Lau Afioga i le Fofoga Fetalai, ou te talitonu o lea ua oo mai le faasologa ia matou o lo o i le Komiti o Tupe Maua ma Tupe Totogi ma oo atu ai i le tali mai o le Kapeneta.

Ia Matamatanononofo ia le Maota o le Tui Aana i le malualii ai o le Maota Fono i Tiafau nei i le afifio ma papa aao o Taitai o le Atunuu. E faatalofa atu ai i sui usufono eseese i le afio o lau Afioga i le Fofoga Fetalai, afio foi lau Afioga i le Palemia, afio le Sui Palemia ma Minisita o le Kapeneta. E faafeiloai atu foi i lau Afioga i le Taitai o le Itu Agai aemaise le laveloa o le

aufue sina ma tootoo o le atunuu. E faapena foi ona faatalofa atu i le tapuaiga a Samoa i Lana Afioga Mamalu O Le Ao o le Malo ma lau Masiofo, faapena foi i le Sui o le Fono a Sui Tofia, Afioga Tuimalealiifano Vaaletoa Lauvi II ma lau Masiofo. O le tapuaiga a le Faamasino Sili ma le saofaiga i Alii ma Tamaitai o le Faamasinoga aemaise o le lavalao o Samoa i Aiga ma o latou Tama, Tama ma Aiga, tupu ma ee, faapea le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faapena foi ona fia oo se leo i le tapuaiga a lou Itumalo o Falelatai ma Samatau i le afio o le Aiga Tau Aana ma lo latou Tama, o le paia lava lea aua le Falefitu o le Ati Tagalao e afio ai lau Afioga Anae, lau Afioga Nanai, lau Afioga Lupematasila ma lau Afioga i le Laau na Fausi Misa ae tainane foi o le toatolu ia Lealaitagomoa ma lau Afioga Faalavaau ma lau Afioga Taefu o le Falefitu o le Aiga Tau Aana. Afio foi Faasavalu o le Matuamoepo, le paia o lou Aiga Salū ma Auvaapeau, afio Tonumaivao o lo outou Matua Aiga, Taiivao na Falefia i ai Aiga, alaatai foi le mamalu o Galuefa ma Tula o Salogo, Falelatai ma Tagata o le Vavau.

E faafeiloai atu foi i le Falefa o le Usoalii ma le Gafa, Fiamē ma le Tamaitai aemaise o le Nofa a Ituaiga ia te oe Leulumoega, o paia ia o lo tatou Itumalo. E faatalofa atu ai i lau Afioga i le Tama Pule o le Matagaluega o le Tasi Tolu Paia e i ai i Falevai, Siufaga ma Samatau. E faapena foi ona faamalo atu i lau Afioga i le Sui Taitaifono o le Fono Aoao a le Ekalesia EFKS i Samoa e pei ona toe tofia i ai lau Afioga i le Toeaina Faatonu lau Susuga Senara Tautiaga, malo le faatoatoa, malo foi le foe. Ia aemaise foi o le paia o lo outou Aiga Sa Levi i so o se fata faitaulaga i totonu o lo tatou Itumalo, malo le galulue, malo foi le tapuai, malo le tauatai i galuega o lo o fitaituga ai i totonu o lo tatou Itumalo.

Lau Afioga i le Fofoga Fetalai, o le a agai sina faamatalaga e tusa ai o nai galuega o lo o moomia ona faatino i totonu o le Itumalo. O le a ou amata atu e faigofie o ou vaavaai atu i le Minisita mo Leoleo ma Falepuipui, e avatu le faafetai ma le faamalo. Faafetai ua matou molimauina ua suia le auala po o le taavale fou i le Ofisa i Olomanu sa faaaogaina e lea vaega se taavale tuai a ua suia i le taavale fou. Ae toe o le auala a o lena lua te soo tuaoi ma le Minisita o Galuega, Felauaiga ma Atinae Eseeese a o le tualalo o le auala i le agai atu i Olomanu o lo o i ai atinae a le Malo, ia alofa ma faaleleia lea auala. E momoli foi le faafetai i lau Afioga i le Minisita e tusa ai o auaunaga masani a le Malu o le Malo i le Sisiina o le Fua ma isi tulaga faapena, e lagona lava le mitamita pe a oo ina maopoopo ma tino mai fuafuaga e tuufaatasi ai Malu o le Malo. E lapelapea foi le auaunaga i nisi o saunoaga e pei ona ou maua i le taeao, ae tautuana ma lau Afioga lea vaega ina ia silasila totoa i ai.

Lau Afioga i le Minisita mo Galuega, Felauaiga ma Atinae Eseeese, malo faafetai ua maua ua amata ona faatino faiga filifiliga aua le faatinoina o le taligalu e pei ona talosaga atu ai i le faatausiugiuga o le Itumalo i le pitonuu o Samatau e tau o Sualo ma faasolo mai ai i lo ma tuaoi ma lou uso a sui usufono o Aiga i le Tai i le vaega o Salua Manono, faafetai o lea ua ou maua ua amata ona faamautu lea tulaga i konekarate e faatinoina lea galuega. Lau Afioga i le Minisita, e momoli atu le faafetai tele e tusa ai o le atinae a le Malo i Fiaga, ua mitamita lava le agaga e foliga mai ua tele le supply lea ua tatou maua i le eletise, ona pau o lea o le a le avea lea ma mafuaaga o le pe o le paoa ona ua le lava le supply seia vagana lava ni faalavelave faafuasei ma

ni tulaga faapena ona toe pe lea o le paoa. O le matou maitau i le tulaga ua i ai le lavatia e afi tetele o lo o Fiaga le supply mo le tatou atunuu.

FOFOGA FETALAI: Malie le sui usufono o lo o saunoa se i tuu atu le avanoa i le Minisita o Galuega, Felauaiga ma Atinae Eseese.

Afioga Hon Manualesagalala Enokati Posala: Lau Afioga i le Fofoga Fetalai, ua ou tulai atu e fia faamalamalama le tulaga lea i Fiaga, ou te iloa foi sa nofo manino faasalalaua a le Faalapotopotoga e tau logologo ai le atunuu ona o lo o feagai se tasi o Kamupani mai Iapani i le siakiina ma faaolaina. O le faaiuga o Aperila sa tatala ai lea poloketi peitai ane e tasi le afi sa mafai ona faaola mai afi fou e fa o lo o i totonu o Fiaga. O le tulaga o le galuega ua maea uma galuega a konekarate i le fale ma fesootaiga o afi, tane suauu ma tane vai e faamalulu ai afi ma vaega eseese seia oo ina fesootai mai i Fuluasou. Ae peitai e i ai taimi faatulagaina e fa e siaki ai, o le test for commissioning o tatou afi nei e fa, e leai foi se auala e mafai ona faatopetopea ai, afai lava e 3 vaiaso e siaki ai le afi e faapena lava ona faasolosolo.

E oo mai i le taimi nei, o le vaiaso nei i le Aso Faraile e faamaea ai le siakiina o afi nei e fa ma tuuina mai ai aloaia faaola mo le tatou atunuu. Sa faalauiloa lava ma avatu i faasilasilaga sa fai ona o galuega o lo o mafai ona faatino. O le tulaga foi la e i ai, a i ai lava le faaletonu e otometi uma ona fiti le switch ona off laia, o lona uiga e malupuipua ai e le gata i afi ao meatotino i so o se mea e oo aiga pe afai e faaletonu le eletise mo le supply maiga o le eletise. Ao le faaiuga o le vaiaso nei e maea ai galuega ia ona amata loa lea ona faaola mai afi ia e fa aua ou te iloa o le tulaga masani sa i ai o afi taitasi e 5.7mita watts le malosi, o le peak e masani ona oo i ai le maualuga o le faaaoga e 18mita watts. O lona uiga a tuufaatasi afi nei e fa e maua le 22mita watts, o lona uiga o se malosi e mafai ai ona ausia e le Faalapotopotoga le tulaga lea o le reliable pe ua gafatia le eletise mo le tatou atunuu i Upolu ma Manino. O tulaga sa i ai faaletonu ona o siaki ma le vaaiga o tatou afi ae atonu a maea le Aso Faraile nei, o le a tuuititia ma i ai fuafuaga a le Faalapotopotoga e taofiofia ai ni faaletonu e tulai mai. Ae i ai lava faafitauli masani pe a faaleagaina tatou pou po o mea faapena i faalavelave e ono tulai mai. Ae pei o se faamaninoga lea ina ia manino le tatou Maota nei aemaise o le faafofogaaga a le atunuu. Faafetai.

FOFOGA FETALAI: Malo faafetai saunoa faamalamalama i lau Afioga i le Minisita. E manatu foi ua manino le atugaluga o lo o tele nisi o le atunuu e manatu po o le a le mea e pe soo ai le tatou paoa. Ao lea ua maitau o lea tatou te i luga o le trial basic, o lona uiga e uma loa le vaiaso lenei ona ola uma loa lea o le mafa fa lea i Fiaga.

Tulai mai le sui usufono mamalu e faaauau le saunoaga o lea ua malamalama le mataupu.

Afioga TAEFU LEMI: Faafetai. O le uiga lea o se faamatalaga, a oo ina tulaga lelei tatou afi, o le matou lena maitau i le lava o le capacity o tatou afi ia i Fiaga e supply ai le atunuu. O se tala lelei lea mo le ola faaauau pea o le paoa pe a maea nei tapenaga o lo o fai.

O le Pulega o le Suavai lau Afioga i le Minisita, o lo o lelei lava mea uma e ui foi lava e le o iloga lava ona lelei atu le supply o le suavai i lou itumalo ae ua uma ona ou faamaninoina i le Pulega o le Suavai, o le matou faaitu po o pitonuu mauululuga e faatali kalone i le po ona faaaoga lea i le ao pe a le oo atu le suavai ae pei o tulaga faapena e ao pea ona silasila i ai ina ia faaleleia atili. Na o le pau lava lau fesili po o le atugaluga lau Afioga i le Minisita ou te leiloa pe ua faamatuu atu ou te leiloa po o i i le Matagaluega o le Punaoa Faalenatura ma Siosiomaga i nisi o kamupani ava malosi mo le talafeagai lava ia ma le lelei o le faasoaina o le suavai mai le manava o le eleele e ao lava ona laugatasia tagata uma e oo lava i le pisinisi i le tologiina o le suavai. O le talosaga lena i lau Afioga i le Minisita po o tologi fuafuaina ma mita suavai a kamupani nei e pamu sao e latou a latou suavai mai le manava o le eleele aua o lea foi e faapena ona pamu mai le suavai o lo o taumamafa ai le atunu ma tatou tologiina faatasi. O le talosaga lena e uiga i le vaega lea o le Pulega o le Suavai.

FOFOGA FETALAI: Malie le sui usufono o saunoa sei tuu atu le avanoa i le Afioga i le Minisita mo le Matagaluega o Punaoa Faalenatura ma Siosiomaga.

Tulai mai lau Afioga i le Minisita.

Tofa Hon Faamoetauloga Ulaitino Faale Tumaalii (Minisita mo Punaoa Faalenatura ma Siosiomaga): O suavai ia e pamu mai le manava o le eleele o lo o i ai le vaega lea e i lalo o le Matagaluega o le Siosiomaga o lo o nafa ma pemita ma laisene e tuuina atu i kamupani ia e fai latou pisinisi i le pamuina o le suavai ma faaaogaina. E fuafua foi la le tau o le pemita i le tele o le suavai o lo o i lalo o le manava o le eleele. Ina ua uma ona suesue lelei ma iloa le tulaga o le suavai lea e lelei i le taumafa o lo o avanoa i lalo o le eleele ina ia mafai ona faaaogaina lelei. Ae ia aua foi nei soona faaaoga ona maua ai lea o le tulaga lea ua alu ae loa le vai ua magalo. E pei o le faamalalamalama lea.

FOFOGA FETALAI: Malo, ou te manatu ua malamalama lea tulaga.

Tulai mai le sui usufono mamalu e faaauau le saunoaga.

Afioga TAEFU LEMI: Malo faafetai pau lava lea o sina atugaluga sa i ai ina ia mautinoa lelei o paleni tatou tupe tologi e ala i le suavai mo pisinisi ma tagata taitoatasi. Ae faafetai tele i lau Afioga i le Minisita.

O ala galue lau Afioga i le Minisita mo Galuega, Fealuaiga ma Atinae Eseeese, e i ai lava nai talosaga sa tuuina atu ae o lo o maua e i ai talosaga a nisi o sui usufono ua maea ao le itumalo nei e fai foi sina tele. O Falelatai e le o se nuu laititi, e tasi lava le auala galue i Falelatai ua fai. O Samatau foi e feololo lava e le o se nuu laititi foi Samatau ae tasi lava le auala galue ua fai. Ona tatalo atu lea o le sui usufono o lea itumalo e i ai nai pitonuu tetele o Pata ma Siufaga e leai lava ni auala galue o faia i nai nei pitonuu sei silasila ane i ai lau Afioga ma lau faasoia pe a maua se avanoa. Sa lona tolu le pitonuu o lenei itumalo i le faasologa faataitai lea na aumai i le Tala o le Tupe i le la tausaga ae ua ou maua ua oo i le lima au auala galue ua fai, o lona uiga o lea ua misi le tolu. Ao le tatalo faatauanau i lau Afioga i le Minisita aua nei laaloa lau silasila i si o tatou pitonuu pe a faaauaua au auala galue. O le tatalo

lau Afioga i le Minisita, a faapea e faatino tatou auala galue aua o lea ou te maitauina e alu, alu lava le faiga o auala galue ona muta loa lea o le faiga ae o lo o alu lava atu falega i uta i le mea o i ai faatoaga. Ao le tatalo lau Afioga ae a pe a faapea ua muta le ta lea e fai ai le auala ona teu teisi atu lava, na ona teu lava tusa pe le faatino ae mo nai aiga o lo o i gauta atu ma nai faatoaga ae pe mafai ona teu atu faamaea le auala ina ua maea lena o le umi faatulagaina mo le auala e vali taina. O le tatalo lena aua ua ou iloa o se faiga sili lea ona lelei aua foi nai aiga ma nai faifaatoaga i uta atu i le vaega e lei oo i ai le ta. Pe afai e sao lau maitau po o le tausaga 1974, 1975 ou te leiloa po o ai le faigamalo sa i ai i lena vaitaimi, ae ese le lelei o lena faigamalo, sa o atu ai masini sua auala galue faasolosolo mai tua. O le matou la nuu sa nonofo ai lava masini i tua ma sua auala galue. E ala ona ou laga le mataupu lea ona e oo mai i le taimi nei o lo o i ai lava nei auala galue na sua i le 1974 po o le 1975 foi e masini na auina atu e le Malo. E oo mai la i le taimi nei o lo o faaogaina o ni auala savali ae maimau e, pe ana maua se isi masini e toe alu ai i luga o nai vaega ia ona ua feololo lava nai aiga ua tofu foi ma pikiapu e agai ai i faatoaga ae toe uia nai auala ia sa fai na vaitau ao le taimi nei ua fai ma auala savali. O la e lava e faaavanoa le auala mo taavale pe a i ai se taavale e toe sao ai ae sailiili ane lau Afioga i le Minisita po o se vaitau faapena. Ou te iloa leaga sa i ai si ou pupu talo sa fai i le vaitau tonu lena ae sa oso tonu ai luga le auala ina ua fai e le matou nuu le tulaga lea o le a fai le auala galue. E pei o nai vaega ia lau Afioga i le Minisita mo Galuega, Fealauaiga ma Atinae Eseeese ua uma ona talosaga atu faamolemole sei toe silasila ane lava i le auala lea e alu atu i Falelatai i Faleaseela, ou te maitauina o le auala lea o lo o lelei lava vaega ae peitai e i ai vaega o lo o faaletonu ai le flow a le alavai o iina tonu lava lea e manaomia le toe faaleleia. Ae silasila totoa ane i ai lau Afioga, e te talitonu foi aua e masani ona e uia le auala lea ae na ona toe faaleleia vaega tonu o le auala e le o lelei ai le tafe a le vai e tafe ese mai le auala o vaega na o lo o faaogaina ai luga o le auala e tafe sao ai lava le vai ma tafia ese ai le ta. O le tatalo lea i lau Afioga i le Minisita.

Lau Afioga i le Minisita mo Punaoa Faalenatura ma Siosiomaga.....

FOFOGA FETALAI: Toe lima minute o le sui usufono.

Afioga TAEFU LEMI: Faafetai mo taligalu ua fuafuaina mo le nofoaga tonu o lo o fia fai ai le matou Health Centre e pei ona afio atu lau Afioga. O le taligalu lea e i ai le manatu a maea loa ona fai o lea foi ua i ai le fuafuaga a le Minisita mo le Soifua Maloloina e faatino loa le Health Centre lea e latiti mo si o matou itumalo ao lo o faapena ona ou talitali mai i le taimi e faataunuu ai lea vaega. E i ai le manatu o mea ia o eleele faasao lau Afioga i le Minisita, e i ai eleele o lo o faasao ai le suavai ona faamatuu atu lea o le suavai i le Pulega o le Suavai, e i ai foi eleele o lo o faasao e maua ai le eletise ona faapea foi lea ona maua le eletise e le EPC ae o lau Afioga i le Minisita o lo o i ai punavai o ia eleele faasao ao le tatalo lava e sili lava ona manumanu le Pulega o le Suavai ma le EPC i nai vaega ia e maua ai le vai e gaosi ai le eletise po o le vai foi mo le taumafa a le atunuu ae taatia atu i lau Afioga ao la ta ita lea maitau i eleele nei ona o le saosaoa o le faaogaina e le mamalu o le atunuu ao lo o i ai pea nai eleele e tatau ona faasaoina. O le matou itumalo i tua lau Afioga i le Minisita, e feololo lava nai manu papalagi a faa Samoa o le asini o lo o tafafao solo ai i tua maota o lo matou itumalo. E

amata atu lava i le malae vaalele pe a e sopoia loa le auala tea mai loa le malae vaalele pe afai o le po lea e te afio atu ai ona e faaeteete lea i kolosi faafuasei ane se asini i le auala vaeane le Maota. E faapena foi la i tuamaota ma tualaoa o faatoaga a lenei itumalo o lo o faia ai pea le galuega a asini nei aua o le asini e poto e vaai le taamu ua matua po o le fai ua pula po o le fala ua pula, o mea uma na e fiafia le asini e taumafa ai. Ao le tatalo i lau Afioga pe mafai lava ona fai se fuafuaga i le Vaega lea o le Esetete Tausi na mafua ai ona fai nei meaola sei vaeane le Maota ina ia malupuipua le vaaiga o nei meaola ae aua nei tuufauina ona o nai faatoaga a le atunuu faamolemole.

Lau Afioga i le Minisita mo Aoga, Taaloga ma Aganuu, e momoli le faafetai i atinae ua faatinoina i le taimi nei. Na o sina faamamafa lava a lou sui usufono i nai mataupu ia o le Matematika ma le Faasaienisi mai lava i lalo i le Primary School seia oo i Secondary School, o le talosaga ina ia faamalosia lea vaega i faiaoga e molimauina lava le le lava o faiaoga ae i ai foi le isi auala lea na tatou faia i le isi vaitau o le fast tracking o le certificate po o le diploma ae taatia atu i lau Afioga i le Minisita i se faiga e vave ona foia ai le faafitauli o le le lava o faiaoga.

Faafetai i lau Afioga i le Minisita mo le Soifua Maloloina mo le fuafuaga i le taimi nei ina ia faatino loa le Health Centre mo le matou itumalo o Falelatai ma Samatau. Ua matou feiloai foi ma le Pule Sili o le NHS ua faailoa mai o le a faapea ona faatino i le tulaga o lo o ai nei Maota tuai ae ua uma foi ona talsoagaina le Minisita o Tupe e alofa mai mo sina fesoasoani e fai ai sina fale feololo aua le Health Centre lea.

O le Minisita mo Fesootaiga ma Faamatalaga Tekonolosi, faamolemole lau Afioga Hon Tuisugaletaua Sofara Aveau i tatou leitio ma televise o le tele lava o nei auaunaga e gata lava i le talafatai i Apia nei ae le o manino mai le tele o tv e oo atu lava i tua i lou itumalo, e oo foi i leitio, e i ai le leitio a le matou Ekalesia ma le televise e matamata ai lava nao e lolotu o i Apia nei ao matou lolotu o lo o i tua e le o maua mai le televise a le matou Ekalesia. Ae i ai lou talitonuga a lelei lava ona fai a tatou aiaiga mo le faamatuu atu o le laisene, ia e alu ai alu ai oo atu le televise i tua ma le leitio foi, pe a i ai ni nai aiaiga ma ni puipuiga i le faamatuuina o le laisene ina ia alu aso sau aso ae kava uma ai le atunuu.

O le internet lau Afioga i le Minisita, e lagona lava le faanoanoa i le auaunaga lea. O lo o feoloolo lava i le taimi nei, a o le tau lava lea ua fai nei ma pa puipui i nai o tatou tagata aemaise o fanau aoga. I Malua i le mea sa ou i ai foi i le aoga lea o le Bible School, o le tupe alu pito sili lava lea ona tele o le internet i Malua. E tele lava tupe totogi ma faagaoioi ai le aoga, ae pau lava lea o le tupe sili ona tele e faaalu e le aoga, o le internet. O le tatalo la lau Afioga, e le gata na o Malua, ae faapena ona faasafua lau silasila i le tele o aoga ina ia faapena ona fai i ai se fuafuaga i le mea lava lenei o le internet. Ou te talitonu ua alualu lava i luma si o tatou atunuu, o telefoni, o alatetele, ua tele mea e omai ai nai o tatou aiga mai fafo ma molimau mai, ua alualu lava i luma si o tatou atunuu. Se i vagana lava le internet o lo o fai pea ma faaletonu, o lo o tau punitia ai le alualu i luma o Samoa i le lisi o atunuu o lo o sili ona taugofie ai le internet ma maua soo ai e tagata. O le tatalo lau Afioga, se i fai ane se i toe silasila i tulaga lea o lo o i ai le tatou ofisa o le Regulator, ina ia toe silasila i le tatou internet i le tau lea ou te talanoa ai. Ae o le tulaga lena ou te talitonu a tuu mai i lalo le internet e pei ona maua i atunuu e i ai Fiti, Niu Sila ma Ausetalia e te maua i le malae vaalele,

faletalimalo, le fale o le Palemene le internet e wireless, o se ai sili lea mo le tatou atunuu lau Afioga i le Minisita.

FOFOGA FETALAI: Ou te vaelupeina le saunoaga a le sui usufono mamalu ona ua tatou oo i le taimi malolo. O le a faaauau ma faaii mai le saunoaga pe a tatou taliu mai i le malologa masani. Ou te faasilasila atu o le a faataatia ese Galuega a le Fono Aoa mo lana malologa masani o le afiafi.

Na faataatia ese Taulumaga a le Fono Aoa mo lana malologa masani i le itula e 4:45 i le afiafi.

Na toe faaauau Taulumaga a le Fono Aoa i le itula e 5:15 i le afiafi.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono. I le agaga faaaloalo, e momoli atu le faafetai tele i le onosai mai o le tatou Maota i lenei vaega o le tauafiafi. Ou te manatu o lea ua falii le la i lona nofoaga a o lo o mau pea le toovae i le paia o le tatou Maota. E vaai atu o lea ua maua la outou faatiliga malosi. E faamalulu atu ona o le tulaga o le tausiga, o lo o tau tatao pea le tulaga o le SPAGHAL ina ia maua lo outou soifua manuia ma umi pea lo outou ola manuia le tatou Maota. O a ni fai fua ua maua e le Ofisa ma le faamoemoe o le tatou Matagaluega, ia, fai ma afea ane le paketi a le Fofoga Fetalai lea e i ai le tausiga mo outou. O lea na o le sui usufono mo Aana Alofi Nu.3 o lea sa taua i le taeao analeila, ae lafo atu taulumaga o le tatou Maota ma le taumafai atu, e faigata le gasegase ma le tausiga aua lo outou soifua manuia.

E faia la tatou malologa o lo o faauma mai le saunoaga a le paia i le Aiga Tauaana, o se tasi foi o le sui o le Komiti Faapitoa e vailiilia le tatou Tala o le Tupe. Tulai maia lau Afioga i le sui usufono mo Falelatai ma Samatau e faaii mai le saunoaga.

Afioga TAEFU LEMI: Faafetai i lau Afioga i le Fofoga Fetalai. Ou te talitonu foi ua maua se faasiliga malosi i le paia o le Maota aua le faiga malologa sa feagai ai. A o le talosaga vaivai lena i lau Afioga i le Minisita mo Fesootaiga ina ia fai se galuega alofa i le tau o lo o i ai nei le tatou initaneti ina ia tatou laina faatasi ai ma isi atunuu o lo o laina faatasi foi ma tatou lo latou tamaoaiga, aemaise o le tatou faamuamua o lo o ave i tatou aoga. O le pine lea o lea faamuamua, o le taugofie o le tatou initaneti mo nai aoga.

O tatou faletusi po o library e pei ona silafia, po o le a lava le tele o le library, e gata lava lona aoga i le tele o le collection la e i ai i totonu o le library. Peitai o le initaneti, o le library e le faatusalia resources ma vaega eseese o lo o mafai ona maua ai le fesoasoani e le tamaitiiti aoga o lo o susesue. Ia, o le tatalo lena i lau Afioga i le Minisita.

E i ai nai a matou mataupu mo le Afioga i le Minisita e le o auai mai i le tatou Fonotaga, le Minisita mo Faatoaga ma le Minisita mo Tina ma Tamaitai, masalo o le a taatia ia se i afio mai. Na pau le mataupu, ia talosia ia ia vave mai se aso e toe taliu mai ai, a o lea e feagai le Maota ma ana Fonotaga.

Lau Afioga i le Minisita o Tupe, e leai, o le tatalo a lenei itumalo lea o le a toe faaleo atu le tatalo vaivai, o lea ua i ai le fuafuaga a le Minisita mo le Soifua Maloloina atoa foi ma le auunaga ina ia amata loa ona faatino se tamai falemai foi lenei po o se health centre e tau ina toomaga i ai nai tamaiti i le sela ma le vai o le manava ma tulaga faapena, ia amata loa i si tamai fale la e totoe i tua. A o le fale foi ia ua tolusefulu ma ona tupu tausaga po ua fasefulu ma ona tupu tausaga, a ua tele afa ma tasi le Tsunami ua o o mai, a o lo o sao lava sia fale. A o le fale la lea lau Afioga i le Minisita, o le a amata ai mo lenei taimi e talitali ai lau faasoa i se fesoasoani e ono fesoasoani e faaleleia ai lea fale.

Lau Afioga i le Minisita mo Tupe Maua, malo le faatoatoa i lau Afioga malo foi le silasila mo le faatoatoaina o le aoina o tatou tupe maua. Na pau lava o lea, ona e i ai nai aiga a sulufai mai i sui usufono, faapea latou ai e tiute fua ai latou taavale. Ae o le mea lea ta te maua e ita, ona e mafai ona lua tamai taavale, tutusa lelei foliga, e toalima le pasese, lua luma ae tolu tua, ae aumai tiute e eseese. E le ilogofie le mea lea o le eseese o size o taavale. O le mea lena e le iloa e le loomatua ma le toeaina, ae se i vagana lava le inisia po o tatou nei ua masani ai i le size o afi po o le cc foi lenei, ae pe i ai se isi faiga e faamama ai i nai aiga, aua a sau la e fa ogaumu ona aumai lea o le tiute ua \$3,000+. A aumai e ono ogaumu, o taavale lava e tai tutusa lea ou te talanoa atu ai, e sau le tiute ua \$7,000+. E eseese la le \$3,000+ ma le \$7,000+ a o le tatalo, e faaleo manino tele le toeaina ma le loomatua e a ia le taavale, po o le a le mafuaaga ua eseese ai. E ui lava i sota taumafai atu, a o lae ua faapea ua faapito manu ia tasi i le vaai a le fesoasoani a le sui usufono sa fai atu. O le tatalo lea. A le o lena foi, ia fai se awareness programme foi lenei aua o la e i ai o tatou ofisa i Niu Sila ma Ausetalia e fesoasoani ane e faamalamalama i o tatou tagata a mea o le tiute e faavae i luga o le tetele o afi o taavale ma o latou tausaga.

FOFOGA FETALAI: Malie le sui usufono o lo o saunoa se i tuu atu le avanoa i le Minisita mo Tupe Maua e faamalamalama tulaga o mea tau tiute. Tulai mai lau Afioga i le Minisita.

Tofa Hon Tuiloma Lameko (Minisita mo Tupe Maua): Lau Afioga i le Fofoga Fetalai faapea sui usufono mamalu o le Maota, faafetai lava mo le faafesili mai e uiga i le tulaga o le aumaiga o tatou taavale. Ma e sao le sui usufono, o le isi lea vaega, aemaise o le taimi lenei ua tele taavale o lo o aumai i totonu, ae o lo o manino lava le Tulafono. O le Tulafono la e i ai, e aumai le pepa o le mea na manufact ai le taavale. O fea na fau ai, afai o Iapani po o fea na fau ai, o le value la o le taavale lena lea na fausia ai, e base ma fua i ai le tiute. O le mea foi la lea na saunoa i ai i taavale tutusa, ae i totonu foi o taavale taitasi lava, o la e foi e i ai ma le tausaga na fau ai le taavale. O tai i le Matagaluega o le Tiute, ua i ai uma lava i le Ofisa ituaiga taavale eseese ma latou fausaga ma nuu na fau ai ma le value o le taavale e base i ai le tiute. E leai lava la se mea na fai i le tulaga lena, aua a le faia, ou te le iloa po o le a se mea e base ai le tiute. Ua uma lelei ona aoaoina tamaiti i le auala e totogi ai le tiute ma fau ai le tiute. I le taimi nei, e pei ona silafia o lea e fesoasoani tele le Malo i taavale. O le fesoasoani a le Malo, e faapea e le gafatia e se isi ona pay atoa le tiute o le taavale, ona fai lava lea o le valuation ia o le tiute e tataua ona i ai, ae alu atu la agai i le Minisita e talosaga mo se

vaega foi lenei pe mafai ona totogi se vaega o le tiute. O le mea la ua ou ofoina i ai, na ou fai i ai, e totogi lava le afa o le taavale. E le toe tuu foi lea se i pule ia pe fia le tupe e totogi. O le mea la e ua i ai nei, pe 50% po o le afa o le tiute, e tatau lava ona totogi i le taimi lena. O lau faamalamalamaga, o le tulaga lava ia i le tiute o taavale e tusa ma le Tulafono, e totogi uma lava. Ae peitai ane, sa i ai fuafuaga a le tatou Malo, o le fuafuaga alofa i tagata, e pei la o le toaina ma le loomatua lea na taua, a le gafatia, ona sue mai lea o le... ae fai la le feagaiga e totogi ai le vaega lena e totoe o le taavale e le i totogiina. Lau Afioga o le faamalamalamaga lea.

FOFOGA FETALAI: Malo saunoa faamalamalama i lau Afioga i le Minisita mo Tupe Maua. Ma e manatu ua malamalama le fesili a le sui usufono mamalu. E talosaga atu ai i le sui usufono mamalu e faaiu mai le saunoaga ua maea lou taimi.

Afioga TAEFU LEMI: Faafetai i lau Afioga i le Fofoga Fetalai faapea foi lau Afioga i le Minisita mo le faamalamalamaga. Na pau lava lea o se tatou polokalame foi lea i Niu Sila, o lae i ai leitio faasalalau i le tatou Ofisa i Niu Sila, se i tau faamalamalamaga atu i nai toeiina ua aumai o latou auala le tiute e ono totogi pe a faapea e omai i Samoa nei ma le mea e faavae ai.

Lau Afioga i le Sui Palemia, faafetai lava mo le auunaga. E i ai si atinae lelei lea ou te fia asia i le vaega lea o le Small Business Enterprise. Faafetai o lea e faamatuu i ai se vaega, ae ou te talitonu o le atinae, o lo o fesoasoani tele mai le Malo o Niu Sila. E mafua lau talosaga ona sa ou o o i ai i sau pisinisi laitiiti e fia faatu ae te i ua saunoa mai e gata i le \$50,000 le latou guarantee foi lea e 80% latou te fesoasoani mai ai e guarantee le loan. Ona ou fai atu lea i ai e le lava, e small business foi pe a \$100,000 se loan e mafai ona aumai e fai ai se na pisinisi. O le tatalo la i lau Afioga i le Sui Palemia, se i toe tagai ane pe le mafai, ua loa tausaga foi o lea fesoasoani a Niu Sila, pe le mafai ona toe silasila i ai. O lo o gata le fesoasoani lea i le \$50,000 ae mafai foi ona o o atu i le \$100,000 pe a. Ae ou te iloa lava o le pisinisi laiti lena e fai ai lena faiga.

Ia, o nai motugaafa ia e tusa ai o le tatou Tala o le Tupe. Na pau le mea lau Afioga i le Palemia e tusa ai ma le faatautaiga o le tatou faigamalo, e i ai lava fofoga aloaia o le tatou Malo e ala i le tatou leitio le 2AP i le faaogaina foi i a tatou faasalalau o tatou Fonotaga, ma le tatou nusipepa foi lenei o le Savali. Ia, o nai vaega ia e lua, po o le a se silasila a lau Afioga, ae pe talafeagai foi ona tuu faatasi i se faamalu se tasi le toalua lea, ia ona tuu loa lea i ai ma le tatou printing lea o lo o fai ma faafitauli i le taimi nei i le Matagaluega o Tina ma Tamaitai, atonu e faaleleia ai foi le aoina o ana ia pili, ma lelei atili ai foi lea vaega e fesoasoani mai i le Tala o le Tupe i se vaitausaga o i luma.

O sikolasipi lau Afioga i le Palemia, e i ai le tatou grant foi lea e ave i Aoga, ae ou te le o ma iloa a o le tatalo lava talosia o aafia ai nai tamaiti po o nai Aoao ia e agai i Aoga faa-faifeau e le gata o Malua a o Piula ma Moamoa, i le iloilo ma le faamautuina o le seleni lea e faamatuu atu ai mo nai nei aoga faamolemole. Ua ou oo i ai i nai nei i Aoga e leai e tauatai foi e feololo lava foi le faaletonu o potu aoga ma nai mea o lo o manaomia le fia faaleleia a o aoga a nai Ekalesia o lo o fesoasoani mai foi i nisi vaega o le Malo. E pe i o nai motuga afa ia.

O le tatou Ofisa o le Fono lau Afioga i le Palemia...

Susuga Hon Tuilaepa Fatialofa Lupesoliai Aiono Neioti Sailele Malielegaoui: E lelei ona ou vave tali atu lau Afioga, o le mea sili o lo o faafogafoga mai le Komiti o Tau Aoga, a loto lava e ave i ai se seleni aua o a latou Aoga uma lava, e mafai lava ona ave i ai, ae le o le avatu i ina toe avatu iinei o le a tele la mea e auala atu ai, ae lelei ona ave i le Komiti o Aoga, ona faaitalia lea o le pulega a Ekalesia pe vavae ane se isi mea ae ou te le iloa po o fea le Ekalesia lea e te i ai. Afai o le isi Ekalesia o la e lava tupe, ae afai o le isi Ekalesia o la foi e lava tupe.

FOFOGA FETALAI: Tulai mai le sui usufono mamalu e faaii mai le saunoaga ou te manatu ua malamalama mataupu uma e pei ona talanoaina.

Afioga TAEFU LEMI: Faafetai manatua o fesoasoani nei a le Malo e faalagolago i luga o le aofai o tamaiti, a faapea o aafia ai le aofai o nai Aoao o lo o agai i Aoga faa-Faifeau o le tatalo lena.

Susuga Hon Tuilaepa Fatialofa Lupesoliai Aiono Neioti Sailele Malielegaoui: O lena ua e sau tonu ai lava, e le o toe tamaiti tama na ua fai ava.

FOFOGA FETALAI: Tulai maia lau Afioga i le sui usufono e faaii maia le saunoaga ua maea lou taimi.

Afioga TAEFU LEMI: O le tatou malologa lea sa fai nei i le lua itula lau Afioga i le Fofoga Fetalai, faafetai lava i le tausiga ua maua ai le faasiliga malosi. E lua itula ua lava le taimi e ai ai, lava le taimi e te malolo ai, lava le taimi e siaki ai lau initaneti pe ana maua, lava le taimi e te malolo ai ma e toe nofo i luga ma e faamalu ona toe tui lea o ou laei ma e sau i le Fono. O le tatalo se i toe silasila ane i le tatou maota ma le auaunaga o lo o fai i le tatou Maota nei, talosia ia le faatinoina o galuega a le Maota Fono ina ia maua nai na vala e sili atu ma lelei mo le tautuaina o lenei Maota, ae tele lava taimi e mafai ai ona faaoga tataua pe ana ua maua nai na auaunaga i totonu o le Maota. O le tatalo lea i lau Afioga i le Fofoga Fetalai, ae momoli atu le faafetai tele i le paia o le Maota, faafetai foi i le Afioga i le Minisita. E faamalulu atu pe afai ua soona sii se leo po o ua soona tatalo atu foi lenei Itumalo.

E momoli lau faafetai faapitoa i lau Afioga i le Palemia ona sa ou taua le Aoga Tusi Paia i Malua e moni lava ua fai sina umi ona tatou mafuta ae sa lagona lava le mafanafana i lea aso i lau Afioga i le Palemia, Sui Palemia, Minisita o Fesootaiga ma Faamatalaga Tekonolosi faapea foi le Taitai o le Itu Agai, sui usufono mo le Vaa o Fonoti faapea le sui usufono mo Aiga i le Tai i le aso na tatou feiloai ai i Malua, ua maualuga lava lea aso i le tatou mafutaga. E ui lava ina vave le taeao e le i suia la tatou taimi e ta le 9 a o lea ua ta le valu i le taimi lenei sa tatou mafuta ai i Malua ona o la outou faaeaea, faafetai tele i la outou lagolago ma le faaaloalo foi i le Aoga e oo lava i le Susuga i le Alii Pule ma le Komiti o le Au Toeaiina sa lagona lava le mafanafana i lea aso. O le Aoga Tusi Paia lava ia e le na o se isi e avea le

Aoga Tusi Paia mo tatou uma, o le mea lea o la ua fai mai i Apia tatou te agai uma i ai e aoao ai le Aoga Tusi Paia.

Manuia lau Afioga i le Fofoga Fetalai, manuia foi le tatou Fono i lenei afiafi.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, na o se fesili lava i le sui usufono mamalu i lana tusi pasi. Pe taga ai ona lauga i le pulelaa ae ou te fia faalogo se i lauga, pe na o le tusi pasi lava.....

FOFOGA FETALAI: O le faanaunautaiga lena o le sui usufono a maea lona taimi i le Palemene ona agai loa lea i Malua e faaauau ai, atonu o se mea aoga foi lena e lima taitaiina ai le tatou – o le manatu foi lena o le Taitai o le Itu Agai a maea atu i ona afio lea i o e faaauau lona valaauina.

Afioga TAEFU LEMI: Lau Afioga i le Fofoga Fetalai, o le fesili lea ou te fia tali atu foi i ai, o le Bible School e le mo se fata faitaulaga se tasi. O lea ua mafai ona ou lauga i le EFKS, Metotisi, Katoliko, Assembly ma so o se Ekalesia ua mafai ona ou lauga ai ona ua ou iloa le Tusi Paia latou te faaaogaina. E tatau ona i ai se soifuaga o le sui usufono pe a uma lona soifua o se sui usufono. Amen

FOFOGA FETALAI: Le sui usufono mo Faleata Sisifo, e ese le tovine la e galue ai e i lalo o le vaega lea o le Son of the King, they would be never be king, they will always be son. A i ai se taimi ona agai atu lea e mulimulitai i le faataitaiga matagofie lea ua saunoa i ai le sui usufono mamalu.

Malo faafetai saunoa i le sui usufono mo Falelatai ma Samatau i le paia o le Aiga Tau Aana ma la latou Tama, malo fetalai, malo saunoa, malo timai, malo foi fautua i finagalo foi ma lagona aua le tatou Tulafono Tau Faaofi o le Tala Faatatau Autu o Tupe.

Ua avanoa foi le Maota mo se tasi o sui usufono e fia saunoa. Tulai mai lea tala na ato i se tasi o sui usufono mamalu, tulai mai se tasi o sui usufono mo Vaimauga Sisifo, Lefau Harry Schuster.

Tofa LEFAU HARRY SCHUSTER (Vaimauga Sisifo): Faafetai i lau Afioga i le Fofoga Fetalai mo le avanoa, ou te muai faatulou atu i lau Afioga i le Fofoga Fetalai. Ou te faatulou atu i lau Afioga i le Palemia, Sui Palemia, Kapaneta, Minista Lagolago ma lena itu o le Malu. Ou te faatulou atu foi i lau Afioga i le Taitai o le Itu Agai, Sui Taitai ma sui usufono uma o lenei itu o le Maota.

Ou te faatulou atu foi i le tapuaiga ma le faafofogaaga a le atunuu. E faatulou atu foi i le tapuaiga ma le faafofogaaga a lo matou Itumalo mo Vaimauga Sisifo. E faatulou atu foi i le Failautusi ma le mamalu o le Matagaluega, tulouna foi le paia ma le mamalu i Ofisa Sili o Pulega o Matagaluega ma Faalapotopotoga Tumaoti a le Malo, faamalo le onosai, malo mo le faatinoina o galuega mo le atiaeina o lo tatou atunuu.

Lau Afioga i le Minisita o Tupe, e momoli atu le faafetai tele i lau Afioga faapea le Ofisa Sili o Pulega ma le Matagaluega mo le tapenaina o le Tulafono Tau Faaofi o le Tala Faatatau Autu o Tupe 2013/2014 ua i luma nei o le Maota. E tatou te iloa uma lava o so o se Tala o le Tupe lava a le Malo e

faitau miliona po o Kamupani, Asosi po o le aiga ae le faigofie, aua e mili manaoga ma le utiuti o le tupe e tau faasoa e momoli atu ai le faamalo.

Ou te faaluaaina le finagalo o lou uso a sui usufono mo Faasaleleaga Nu. 2, e momoli atu foi le faafetai i le Minisita o lo o aoina tupe faapea le Tamaitai Ofisa Sili o Pulega ma le mamalu o le Matagaluega mo le galuega i le aoina o tupe, aua o tupe nei o lo o faatino ai lo tatou Malo. Ou te iloa a na o se tulaga foi lea i le aoina o tupe e le o i ai le manaotele o le tagata po o le kamupani e matua tele lava tupe a le Malo e maua. O le vaitaimi foi na ou Loia, e fai foi o le tele o tupe a le Kamupani la te loia, ae fai mai ou te tago e sue ane se auala e aua ai le tologia uma le Tax la e fai mai le Malo e totogi atu. O tulaga ia e faigata ai galuega a le Matagaluega, e fai o le naunau e ao a ua i ai foi loia a kamupani e taumafai e faalaitiiti le tupe e ao. O le mea lea e avatu ai le faamalo i lau Afioga i le Minisita ma le Matagaluega.

I faamaumauga a le Ofisa o Faamaumauga, e 36,735,00 e o lo o nonofo ma papa aao i le talafatai o Apia lea e tau e le Statistics o le Urban Area. O le faitau aofai lea e le na o le Vaimauga Sisifo a o lo o aafia ai ma Faleata Sasae ma o se fuainumera maualuga. Ae mai lea fuainumera e 10,419 tagata faigaluega ae 264 e o lo o faafaigaluegaina le afaigaluega lea i totonu o le lio a le Apia Urban area. E aafia ai i le faitauga lea le Malo o lo o faafaigaluegaina tagata e aupito sili ona maualuga ona sosoo ai lea ma Kamupani ma Pisinisi laiti.

O le tulaga o Aoga, e 30% o tamaiti aoga uma o Samoa mai le Vasega 1 e oo i le Vasega 8 e i totonu uma o le lio o le Apia Urban Area, e 44% o tamaiti aoga uma i Samoa mai le Tausaga 9 e oo i le Tausaga 13 o lo o i totonu foi o le Apia Urban Area, mai le 44% lea na o le 22% e oo atu la latou aoga i luga o le Iunivesite, o faamaumauga ia o lo o i totonu o le Statistics. O le tausaga ua mavae lau Afioga mai le Vaimauga e taua le maua o avanoa mo Aoga a fanau e fesoasoani e maua ai galuega ma taumafai e atiae a latou lava pisinisi. E laitiiti galuega e maua i faailoga tikeri e pei ona taua na o le 20% o tamaiti aoga e au i luga o lea tulaga, e laitiiti foi avanoa faigaluega i totonu o Samoa e manaomia ai le Tikeri. E toatele atu tamaiti lea e agai mai i Aoga e pei o le isi 44% lea e pau ese mai, e manaomia la se isi ituaiga aoga e o i ai lea vaega ina ia maua ai foi se avanoa e atiae ai o latou olaga. E taua tele lea tulaga mo i matou nei i Vaimauga ona e le tele tele, ae tuu i isi fuafuaga a le Malo i le itu tau faatoaga e le tele se laufanua e fai ai faatoaga i Vaimauga ona o le tele o fanua o freehold land e tele ina faaogaina i pisinisi.

O le mea lea e taua ai tele se fesoasoani mo lea vaega lau Afioga i le Minisita mo Aoga, Taaloga ma Aganuu ina ia talafeagai aoga e o i ai ma le agai i luma ina ia mafai ona fai se pisinisi ma maua ai se galuega e tausi ai aiga i totonu o le Vaimauga. O le tele lava o avanoa faigaluega o le Malo, Yazaki ma Kamupani o lo o i ai a latou auaunaga tau faatau oloa po o kamupani laiti o sew traitors. O le Tala o Tupe o le tausaga na tea nei e \$400,000 na faapitoa e le Malo mo le SPEC, o se tasi lea o auaunaga e fesoasoani ai mo tatou tagata e amata ai se pisinisi laitiiti ma atiae ai le aiga. E \$100,000 na faapitoa e le Malo mo Pisinisi Tumaoti ae \$3.7miliona na faapitoa e le Malo mo le SROS, e le o manino mai la i le Tulafono Tau Faaofi o le Tala Faatatau Autu o le Tupe o le 2013/2014 pe toe faaauau lea tulaga. O le Tala o le Tupe o le tausaga ua tea nei e lagolagoina le matagofie ona e maua ai avanoa e le gata o le atiae o ...

FOFOGA FETALAI: Malie le sui usufono o lo o saunoa se i tuu atu le avanoa i le Sui Palemia.

Tofa Hon Fonotoe Nuafesili Pierre Lauofo (Sui Palemia): Lau Afioga i le Fofoga Fetalai, e leai se agaga e fia faauilavea i le saunoaga matagofie a le sui usufono. O fesoasoani nei e lua e pei ona taua i le fesoasoani mo le vaega o Pisinisi Tumaoti e \$100,000 e pei ona tuuina atu ai i le Tala Faatatau Autu o Tupe 2012/2013, o le fuafuaga e pei ona silasila atu i ai i le Tala Faatatau Autu o Tupe 2013/2014 lea o le a tatou agai atu i ai lea na faaopoopo i ai le isi \$50,000 ona \$150,000. O le tulaga foi lea o lo o i ai i le SBEC e \$400,000 le fesoasoani po o le sao a le Malo i le SBEC i tausaga taitasi ae \$600,000 e fesoasoani a Niu Sila ona maua ai lea o le \$1miliona mo Pisinisi Laiti. E pei foi ona silasila atu ai i le Tala Faatatau Autu o Tupe 2013/2014 o lea ua faaopoopo le \$50,000 i le sao o le Malo e \$400,000 ona maua ai lea o le \$450,000 mo le tausaga faaletupe fou lea o le a tatou saunoa atu i ai. E pei foi ona saunoa se tasi o Tooto na faatoa faamaui atu nei, o le fesoasoani lea i le SBEC e \$10,000 muamua e 100% na guarantee e le SBEC mo pisinisi laiti pe afai se nonogatupe mai se faletupe. A fua mai ma maitau mai e \$1miliona e fesoasoani mo pisinisi laiti i le tausaga atoa, afai la e sii i luga i le tai \$100,000 e vave lava ona uma le tupe lena ae a silasila foi i le tele o pisinisi laiti lea ua i ai nei, a oo loa lau pisinisi i se ituaiga tupe lena e \$100,000 o lona uiga e le toe taua o se pisinisi laititi ae ua tele lau pisinisi. Lau Afioga i le Fofoga Fetalai, e pei ona tau faamanino atu le vaega lea o lo o saunoa i ai le sui usufono mamalu.

FOFOGA FETALAI: Malo faafetai saunoa faamalamalama i lau Afioga i le Sui Palemia o le Minisita foi o feaatauaiga aua pisinisi laiti ma alamanuia mo le atunuu.

Tulai mai le sui usufono mamalu e faaauau le saunoaga.

Tofa LEFAU HARRY SCHUSTER: Faafetai i lau Afioga i le Fofoga Fetalai, faafetai foi i le Sui Palemia mo le faamalamalamaga ma e lagolagoina tele foi e lenei sui susufono mo Vaimauga Sisifo le faamalamalamaga ma le tupe o lo o i ai mo le faagaoioiga o pisinisi laiti i le atunuu. O le naunautaga lava o le tele o lea tupe ia faaoga i le itumalo o Vaimauga ae le faapea foi e faapito aua e tatau foi ona atinae nisi o pisinisi laiti o amata e isi tagata o le atunuu i isi vaega o le atunuu. Ae faafetai mo le faamalamalamaga.

Lau Afioga i le Minisita e lagolagoina tele e lou sui usufono vaai atu i le Tala o le Tupe i le lagolago o lo o ave i le Tala o le Tupe i le vaega lea e tausisia le Tulafono e pei o le Samoa Law Commission ua atofaina i ai le \$1,264miliona o le Matagaluega o Leoleo ua atofaina i ai le \$26miliona, o le Ofisa o le Loia Sili e \$3.2miliona ua atofaina i ai, o le Matagaluega o Faamasinoga \$9miliona+. E faatauaina e le sui usufono mo Vaimauga Sisifo le mea lea lau Afioga ona e matuai taua tele le uunaiina o fanau faapea le atunuu lautele i le tulaga tau aoga. E tutusa lelei lava ma le faataua o le Tulafono ma tausisi le Tulafono ia amanaia ma faaaloalo le atunuu lautele i le Tulafono aua po o a fuafuaga tetele ma le Malo ma le Palemene nei i le lumanai o le Malo, ae a le tausisi le tatou atunuu i le tulafono ma faaaloalo i le tulafono e matua faigata lava ona alualu i luma. O le mea lena e

lagolagoina ai le Tala o le Tupe lenei i tupe o lo o lagolagoina ai le Matagaluega lenei. E momoli atu le faafetai tele i le Afioga i le Minisita o Faamasinoga i le Lipoti a le Matagaluega o Faamasinoga ua i ai nei ua iloga le alualu lelei o auunaga a le Matagaluega ma o lo o alu foi i luma. A i ai ni vaega o lo o aumai i le lipoti a le Matagaluega e faatupu manatu foi ma o lea e avatu ai se manatu vaivai i lau Afioga i le Minisita. O le lipoti a le Ofisa i le tausaga na tea nei e 15 faamasinoga na ave i le Faamasinoga Toe Iloilo ma o le 15 lea o Faamasinoga Toe Iloilo na afua mai lea i faamasinoga e 1,600 sa tuuina atu i le Faamasinoga Maualuga e na te fofogaina. O le 1,000 o faamasinoga ia o faamasinoga solitulafono ao le isi 600 o civil cases. E atagia mai i i e laititi lava le pasene o iuga o faamasinoga a le faamasinoga maualuga la e apili, e 15 faamasinoga mai le 1,500 o se fuanimera laititi ma e iloa ai i i o lo o lelei le faafoeina o faamasinoga ma o lo o i ai foi faaiuga. Pau le talosaga i lau Afioga i le Minisita e pei e atagia mai ai o lo o faamauina foi i le lipoti i totonu o le ono masina ua mafai ona maua sau faamasinoga i le supreme court. O aso la sa oo i le lua tausaga o e faatali i le fofogaina o lau faamasinoga i le Supreme Court, o le Court of Appeal o le mea lava lea tasi sa i ai ao le mea lea ua i ai i le taimi lenei e fofoga lava faaiuga a le Court of Appeal i le tauaga lava lena i totonu o le ono masina ua maua le faaiuga, ua faalua i le tausaga ona omai le Court of Appeal. O lona uiga e fofoga lau apili i le ono masina faapeana foi le Supreme Court. E le o se fautuaga lau Afioga ae maitau atu o lea e i ai i le taimi lenei i le Supreme Court Justice Slicer le polokalame lea a Ausetalia, o lo o i ai foi le tamaitai faamasino lea mai Niu Sila le Afioga Ida Malosi. O lo o fesoasoani la ia tatou faamasino ia e toatolu o le Afioga Patu Tiavasue o le Faamasino Sili, Afioga Lesatele Rapi faapea foi le Afioga Vui Clarence Nelson. O le popolega nei tei ua faamuta le polokalame lea a Ausetalia ia Slicer pe le sau foi la se isi i le polokalame ou te le o mautinoa po o le polokalame lea ia Ida o lo o faatupe foi e le Malo o Niu Sila pe a aveese le vaega lea e ono toe foi la tatou i le mea tuai lea ole tele o faamasinoga ae toalaiti faamasino e faia faamasinoga.

I le Faamasinoga Faaitumalo, e 5,000 criminal cases o lo o fofogaina e faamasino faaitumalo e toalua. E 1,500 civil cases. E le o maua mai i faamaumaga a le Matagaluega pe o i ai ni apili i le Faamasinoga Faaitumalo o alu i luga i le Supreme Court. A faapea o le faamaumaga lea e leai se apili o i ai e momoli le faamalo i famasino ia e toalua aua na o le toalua laua ae 6,500 faamasinoga ia la te vaaia o le Criminal ma le Civil. E 50 faamasinoga o tupulaga laiti, 150 faamasinoga o mea tau aiga, 70 suesuega o malii faafuasei, 8 faamasinoga o PSC appeals, 1,200 adoptions. E na o se manatu vaivai lau Afioga i le Minisita pe le talafeagai le tagai foi i le District Court ona o lea ua agai ina tele isi tulafono ia ua pasia atu i i o lea ua ave i le District Court ae na o le toalua faamasino ia e i ai na o le Afioga Vaepule ma le tamaitai faamasino ia Mata Tuatagaloa. Na o se fautuaga lau Afioga.

Ona ou oo mai lea i le Faamasinoga o Fanua ma Suafa o lo o faamauina ai e 370 faamasinoga o le tausaga lea na tea nei mai faamasinoga ia e 80 faamasinoga na talosaga e toe iloilo ae 350 faamasinoga i Tuasivi. A faatusa le apili o faaiuga a le Faamasinoga o Fanua ma Suafa e fatusatusa i le Faamasinoga Maualuga, e maualuga tele le fuainumera lea mai le 80 famasino mai le 370 ae lau Afioga o lau vaai e le o se tulaga faapea e faaletonu faamasino. E maitauina i le Faamasinoga o Fanua ma Suafa e pei o le tele o tagata o tatou e otometi lava le mafaufau e apili pe a sau ua faaletonu

le faamasinoga. O le mea matagofie lea e i ai, o lea e sau i le lipoti ua faaitiitia – o faamasinoga a Fanua ma Suafa sa i ai sa oo i le 10 tausaga o faatali ao lea ua pau maualalo mai ua fofogaina faamasinoga nei i totonu o le lua tausaga. E le o se galuega faigofie, e avatu ai le faamalo i lau Afioga i le Minisita ma le mamalu o le Matagaluega o Faamasinoga ma Pulega tau Faamasinoga ma alii ma tamaitai faamasino i le tulaga lea. E na o se manatu vaiavai lau Afioga i le Minisita i lau tau vaai atu i ai i apili ia, o lea foi e fesoasoani alii ma tamaitai faamasino mai le District Court ma le Supreme Court e fesoasoani ia Tagaloa i le faiga o apili a fanua ma suafa. O lau faamatalaga e le faapea o le promote ina o loia ae pe lei oo i le taimi ua tatau loa i le panel lea i lalo i le fofogaina muamua o le faamasinoga, o le taitai o le panel lena o se loia ua fitu tausaga o practice i le Court. O panels uma lava e fofogaina faamasinoga muamua, e taitai ai loia faapea ma alii ma tamaitai Samoa ua lava le tofa ma le faautaga i le aganuu ma mataupu tau Samoa e fesoasoani ai i le tagata lea. Na o se fautuaga i le tulaga lea faaletulafono ina ia faaitiitia apili e mafua mai ona o procedure ona laititi foi lea o le numera mai le Lands and Titles Court. O numera ua faamauina nei lau Afioga i le Minisita e momoli atu ai le faafetai i lau Afioga ma le mamalu o le Ofisa. E tasi lenei Matagaluega e faitioina ona o le umi ao lea ua tele le fesoasoani ae nao le pau le mea lea e atagia mai le lipoti lea e alu i luga le aofai o cases i le Supreme, District faapea foi le Lands and Title, e tatau foi la ona alu i luga le aofai o alii ma tamaitai faamasino e fesoasoani i le tulaga lea. O se fautuaga lena i lau Afioga i le Minisita mo Faamasinoga.

Ma le faaaloalo tele i lau Afioga i le Minisita mo Galuega, Felauaiga ma Atinae Esee mo le silafia o le matou itumalo le isi itumalo na fai sina tigaina i le lolovai i le afa o Evan. Na o se manatu e tuu atu po o le a se fuafuaga i le vaitafe lea o Vaisigano i le pa ma aafia pei ona aafia. Ua tuanai le aafiaga lea e mafua mai i le lolovai ma ua toe faalelei fale o tagata ae i ai la le isi aafiaga lea o pisinisi sa i Matautu ae ua o ese ma Matautu o i isi mea ona ua le saogalemu le tulaga lena. O le faaiuga lava lena a le tagata faipisinisi ae i ai isi tagata e le mafai ona o ese ae o pisinisi ia sa ola ai foi isi vaega o matou i Vaimauga ae a o ese la pisinisi ia ua faalaitiitia foi le atinae o le vaega lea i le Vaimauga.

O le isi lau Afioga i le Minisita mo Galuega, o le tulaga lea o auala laupapa lea i Leone, tasi lea auala e fesoasoani tele i taavale e sau mai le isi itulagi e agai mai iinei. Ou te iloaina e tele se galuega e fai i le auala laupapa lea ae a tagai i gauta i le auala lea e sau mai Magiagi ona ua fai sina poloka o le traffic i taeao ona o le auala laupapa lea.

Lau Afioga i le Minisita mo Galuega o le isi talosaga mo le matou afioaga lea i Vaivase uta. O le auala lea e i ai sa faata ae o Vaivase uta e fai sina aafia gofie i timuga, o le taimi lava e timu ai e toe aafia ai foi le auala i le vai. O lea e talosaga atu ai i lau Afioga i le Minisita mo le tulaga lea i le auala i Vaivase uta. E faapea foi le auala galue i le afioaga o Magiagi ma le taligalu i Moataa ma Vaiala. E tau feololo Moataa ao Vaiala e fai lava sina aafia tele aemaise lava luma i le mea o lo o i ai le matagafa sei tagai ane i ai lau Afioga i le Minisita i fuafuaga a le Malo.

Lau Afioga i le Minisita mo le Punaoa Faalenatura ma Siosiomaga, ma le faaaloalo tele lava lau Afioga a tagai i le auala laupapa lea e i Vaisigano i lona fausiaina, o au na ou ola i Malifa i Apia. O aso la matou te faasee i pa fai pe a pa le vaitafe o le Loto Samasoni sau iina i Vaisigano ona e toe tamoe foi

lea i gauta toe sue le isi pa fai. E lei polokaina le pa o le vaitafe i aso la, e lei oo mai i luga o le auala laupapa ao le taimi lenei i le isi pa ma le sua mai o le tai, na oo lelei i luga o le auala laupapa. Lau Afioga i le Minisita, o le tulaga lea ua tupu nei o le vaega lea e lauina le oneone ua o atu poloka ana, e valu ana o le auala laupapa na fau mai ai ae ua o atu nei le au lau oneone poloka ana e tolu o le auala laupapa la e pito i o, na o le lima la ana ia ua i ai nei. A pa la e na o le lima ana la e avanoa e alu ai le suavai, o le isi lea mea ou te iloaina ua mafua ai ona pa ma alu i tua le suavai ma le augutu o le vaitafe ona ua le avanoa ana ia e tolu e tafe ai le suavai. Ou te iloa foi na faasino mai e le isi ou tei ina ua pa le vai i le lologa, ou vaai atu ua tanu e le au lau oneone ana e tolu ae tagai i ai lau Afioga i le Minisita ma le Matagaluega o le lauina o le oneone lenei ua tanu ai ana e tolu. O se mea o le a poloka ai le vai ma pa i tua ae sei faamolemole lau Afioga i le Minisita sei tagai ane i ai.

FOFOGA FETALAI: Toe lima minute o le sui usufono. E faamalulu atu i le sui usufono o lo o saunoa sei tuu atu le avanoa i le faamalamalama a le Afioga i le Minisita mo le Punaoa Faalenatura ma Siosiomaga.

Tulai mai lau Afioga i le Minisita.

Tofa Hon Faamoetaulao Ulaitino Faale Tumaalii: Lau Afioga i le Fofoga Fetalai, e pei ona laga mai e le sui usufono mamalu le auala laupapa lea i Vaisigano, o le tulaga ua i ai ua uma ona fai le faaiuga a le Malo e le toe eliina le oneone i le area lea e pei ona e taua faapea sa i ai e na eliina le oneone ma tanu ai alavai ia, ua ala ai ona oo mai le malosia o le vai i luga o le auala laupapa. O le tulaga lenei lea ua i ai fuafuaga a le Malo i le taimi nei.

FOFOGA FETALAI: Tulai mai le sui e faaauau le saunoaga.

Tofa LEFAU HARRY SCHUSTER: O le talosaga pe mafai la i ana ia e tolu aua o la e poloka lava i le taimi lenei, aua ua nonofo le vaega ma faapamaa mai le pito i uta, a o le fanua o le au Young, ma faasolo mai ai i le fanua o le fale rental la e i ai i le mea sa i ai le aiga o Hans Kruse i aso ia. O i ina i aso o matou laiti e le sao se taavale i ina, e te alu atu i ina i aiga o matou na e i ina i Leone, na o le au Kruse lava sa i ai iina ma le au Young ae ofi uma lava a latou taavale i le pito i luma, ae o le taimi nei ua o ifo le vaega lea lau oneone ua faapamaa uma le mea sau le laina pamaa lenei sau tau mai le ana lona tolu o le auala laupapa ua tanu faasoloatoa mai ana na e tolu, ua le mafai ona tafe ai le vai. O le talosaga pe mafai e le Malo ona toe aveese uma mea na ae toe faatafe le vai i ana ia e tolu e pei ona sau ai le auala laupapa i aso ia. Ma le faaaloalo tele lava.

Lau Afioga i le Minisita mo Galuega, Felauaiga ma Atinae Eseeese ma le Suavai, o le talosaga i le tulaga tau vai o le faatanoa lea i uta ia matou i tua o le Bahai sa faaleagaina le faatanoa tele sa i ai iina i lologa ia o Eveni, ma ou te iloa e tele se tupe e taatia foi le tulaga lea i fuafuaga tetele a le Malo ona e le laititi le aafiaga o le tanoa lea e tataua ona fai atoa. Ua fai e le Matagaluega se tulaga la e mafai oan sue ai le suavai i le taimi lenei, ae e i ai le taimi o le tausaga le taimi lea pe faasolo atu ia Aokuso ia Oketopa pe a utiuti le suavai, ua masani lava le matou pitonuu o Vaoala e tape le matou vai mo se taimi o le aso ae tau faasua mai le suafa e faasoa mai le suavai iinei i le taulaga i Apia. O le popolega lea e i ai poo le a se tulaga i ai i oo atu i le vaitau lea ae

ua le lava le suavai e tafe mai Apia ma le suavai e sau ia matou, ae malamalama lava le matou pitonuu i le tulaga lea, pau lea o le popolega o le mea lea e i ai i le taimi lenei e temporary si tamai faatanoa la na fai mo le faatafe i ai o le vai, ae tele atu le vai e manaomia pe a faapea e toe oo i le tulaga lea sa fai i aso ia aua sa tele le faatanoa sa faatoa ai le vai ona faatafe mai laia, pau le isi talosaga lau afioga o le matou pitonuu i Vaivase uta o le tulaga foi lea o le utiuti o le suavai, ma ou te le o mautinoa la pe mafua mai o se faaleagaina o se faatanoa mai le afa o Evani pe pau lava ua laititi le vai, ae faaoo mai le talosaga a Vaivase ona o le tele o taimi ua le sua le latou suavai ae e i ai foi nai aiga e i ai a latou pisinisi o latou fale la e rent out ua oo i le tulaga ua le toe fia nofo le tenantry i le fale ua tele atu le taimi e leai se vai i lo le taimi e i ai le vai. Na o se talosaga vaivai lea. Faafetai tele mo le avanoa.

FOFOGA FETALAI: Malo faafetai ua tinitauao tonu lava lau saunoaga ma le taimi faatulagaina, faafetai le amanaia o le taumafai atu o le Nofoa, lau afioga i le tausī Tulafono malo, fai oe ma faataitaiga sili i sui ia e fiu e fai atu ae sau lava. Tulai mai se tasi o lea itu o le Maota Palauli. Lau afioga Afoa Fouvale ua avanoa le Maota mo lau saunoaga.

Afioga AFOAFOUVALE JOHN MOORS: Faafetai i lau Afioga i le Fofoga o le Maota mo le avanoa matagofie.

Ou te muai faatulou atu i lau faafogafogaaga Samoa, ou te faatulou atu i lo outou paia ma lo outou mamalu aua le tapuaiga a outou o Faafeagaiga tau i le lagi, ae a Lana Afioga Mamalu O Le Ao o le Malo ma le Sui Tofia, ae faapea foi lau Afioga i le Faamasino Sili ma le Ofisa o Faamasinoga, lau Afioga i le Palemia ma le Kapeneta, faapea foi le mamalu o le Palemene nei, le paia lasilasi o le atunuu pele i o outou paia ma outou sa, ia nuunuu atu faatini o tausala.

E faapea foi ona ou faatalofa atu i si ou itumalo pele, tulouna a Faasisina, tulouna le Fofoga o Sa Lilomaiava, susu oe le Maopu, susu le Tei, tulouna a le Fofoga o le Vai, susu Alo o Lilomaiava, ae a le Aloalii, susu oe Suafa ma le Matua, tulou le Faleao ma Safaleletaua, tulouna le lua Aiga Taulua, alaalatai Tulafalealii, tulouna lau fetalai le Sao Fetalai, ae a le Uso Taua ma le Fale Tulafale.

E faatalofa atu foi i ao sinasina o le atunuu aemaise foi e pito iti le fanau iti o loo faapea ona tapuai mai i lenei afiafi, faafogafoga mai o faapena ona soalaupule mataupu i totonu o lau Palemene. O Palauli e faigofie lava, e muai sii le viiga ma le faafetai i le Tapaau sili aua ana le seanoa Ia tatou te le faapenei. Faafetai atu i le Malo i le tele o galuega eseese e le gata i lea o atinae sa faapea ona faataunuuina, faafetai atu mo le tali manao, faafetai atu foi mo le tali leleia o lenei sui pe a oo atu i ofisa mamalu o a outou afioga o Minisita, talitonu o lena ua maea ona tatou soalaupule taatia atu laia pei ona outou saunoa ai, faafetai atu mo galuega lelei uma ua faapena ona faataatia mai. O le tala i le Tupe, matagofie lagolagosua i ai Palauli e le faigofie le tou galuega i le afioga i le Minisita ae le gata i lea o le Matagaluega faafetai mo le faasoaso, talitonu o le a faapena ona tatou taumafai e fai ni galuega lelei aua si o tatou atunuu pele, o le naunautaiga lena o lea ou te iloa o loo taiala ai le faasoaga o le tatou seleni. Faafetai atu i le Ofisa mo Tupe Maua, i le tou galuega faigata ma le fita, e le gata i lea o le aoao tetele o le aufaigaluega mamalu o le tatou Malo, faauluuluga ma le aufaigaluega o lo o faapena ona

fitoituga i aso taitasi o lo o faapea ona feagai ma outou galuega faigata. Faalapotopotoga tumaoti foi o le Malo faafetai lava mo galuega fai. Lau afioga i le fofoga o le Fono ia faamanuia atu le Alii. Maua se mau ia faapena ona faatautai ai le tatou fonotaga i lenei afiafi aemaise aso oi luma, faamanuia atu le Atua i le tatou fonotaga i lenei afiafi. Soifua ma ia manuia.

FOFOGA FETALAI: Malo faafetai saunoa taupou manaia, faafetai saunoa i le sui o Palauli. Ia o le a sooula ma le sui mamalu o Samoa aoao tulai mai le sui mamalu o le town area ma le vaipanoa uma o le paia o Tumua ma Pule ma Aiga.

Afioga MAUALAIVAO PAT AH HIM (Palota Taitoatasi): Faafetai i lau afioga i le fofoga o le Maota mo le avanoa, tulai atu ma le faaaloalo e fai se sao o lenei itumalo e tusa ai ma le Tala o le Tupe i tatou nei fonotaga. E muamua ona ou faatulou atu i le paia o le Maota i Tiafau nei, le afioga o le taitai o le tatou Malo aemaise foi afioga i Minisita o le Kapeneta. Tainane foi le paia o lena itu o le Maota le taitai o le Itu Agai faapea sui mamalu aemaise foi sui mamalu o itumalo eseese ua aofia i lenei aso. Faatulou atu i le tapuaiga a le Ao Mamalu o le tatou Malo ma le masiofo tainane le aufaigaluega tofofi a le Atua o lo o tala faauto i itu e fa o Samoa, tainane foi le faafogoga mai a le mamalu o le atunuu ia Samoa i ona tulaga faalupelupeina. Ae tainane foi le tapuaiga i le Faamasino sili tainane faauluuluga o Matagaluega eseese i a latou matafaioi o feagai ai. I lenei itula atonu o loo faafogafoga mai lou itumalo. O lea lava e saunoa mai le fofoga o le Fono ia Samoa aoao, o le sui lenei o palota taitoatasi ia ua faapena ona aofia uma ai Samoa ona e le na o le tasi le nuu o loo i ai se sui o lou itumalo e le gata i Upolu nei ao Savaii faapea foi motu uma o le tatou atunuu. Ou te talitonu o lenei itula faamalo i sui mamalu ua maea ona saunoa ua fai se sao e tusa o le Tala o le Tupe o le tatou Malo. Ao lei tautala i tala o le tupe e muamua ona avatu se manatu i mea foi o lo o fia faaleleia o le matou itumalo faapea foi si o tatou atunuu. Momoli le faamalo ma le faafetai i Minisita aemaise foi o faauluuluga o Matagaluega. I lenei taimi e momoli atu le matou faafetai tele i afioga i le Minisita o Leoleo ma Falepuipui talitonu e tasi lenei Matagaluega e sili ona mamafa tu le latou avega, ma ou te talitonu o le Matagaluega leni e feagai pea aemaise le malu puipua o si o tatou atunuu i faafitauli e tulai mai. E lei se isi Matagaluega e tapa i ai si o tatou atunuu ma o tatou tagata, o le Matagaluega leni o Leoleo. Ou te talitonu faamalo faafetai, e le o faaaupegaina outou i nisi o vaega e tatau ai ou te talitonu o le tofa faapea foi le gagana o lo o feiloai ai tatou faapea foi le Ofisa mamalu o lo o feagai tonu ma faafitauli ma faalavelave o le matou vaai ua faapena lava ona tuputupu pea faafitauli o le atunuu i faalavelave eseese o lo o tulai mai i lea taimi ma lea taimi. O ai o lo o feagai ma ia faafitauli? Lau Afioga i le Minisita o se fautuaga ia faapena ona faamalosiau pea le aotauina o le Matagaluega i le feagai ai ma tiute fai aemaise foi i taimi uma o lo o feagai ai ma faafitauli. E i ai foi taimi e faatoai atu ai ni faafitauli, ae faafetai ua vaaia lava le vave ona faatino vave foi ona pai mai le fesoasoani i vaega o le tatou atunuu. Ia o se matou faafetai atu lea i lau afioga i le Minisita faapea foi le Matagaluega mo Leoleo.

Ia ona sosoo mai ai lea ma le matou faamatalaga lau Afioga i le Fofoga Fetalai i le Minisita mo Galuega, Felauaiga ma Atinae Eseese, faapea foi le o lo o pulea le eletise ma vaega uma e i ai auala ma atinae tetele a le atunuu. E

muamua ona momoli atu le faafetai i lau Afioga e tusa ai foi ma le faasoasoa ma le galueaiina o atinae tetele o le tatou atunuu. Matou te faafetai atu i nisi vaega o matou talosaga ua talia ma le fiafia, ma ou te talitonu foi ua alalaga foi tagata ua o o atu ia fesoasoani ua mapu i latou, ua lelei o latou auala, e pei o le auala lea i Nuu, lea e agai atu i Fogaa e tau i uta i Tafaigata, ae i gatai mai o le fanuatanu i Nuu, o lena e i ai le auala e afe i tua, o le tele o le atunuu o lo o ua i ai i ina ma fai a latou faatoaga. Ma ou te talitonu, e tele le mea ua lelei auala, ae ua malamalama foi i pou moli, moli o le auala ua faapena ona faaopoopo e faaitiitia ai le faafitauli o le talepe fale aemaise foi uiga lava faapena o lo o feagai ma tatou. Na pau o le mea, e le uma ai foi le tagisa i lau Afioga i le Minisita, o lo o i ai le auala masalo pe toe 400 iata le isi auala lea e alu atu i tai fetaii ma le auala lea, toetiiti lava tau. Toetiiti lava si vaega o le auala, e talosaga atu ai ma le faaaloalo e alofagia, pe mafai ona toe faaauau lea vaega ina ia atoatoa le fiafia o lea foi vaega o le atunuu.

E momoli foi lau faafetai i lau vaai i ai i le tele o auala i le taulaga ua matagofie, ua i ai lava mea o alavai ua maea ona ufiufia ua saogalemu ai foi le savavali faapea foi le feoi o tagata aemaise o taavale afe i le feseseai ai pe a faapea e o o mai lologa o vai. O toe o nai isi foi vaega o le atunuu i le talafatai lava lea i Apia, e i ai Sinamoga, Alamagoto, o le alu lea i uta i Vailima, o lo o i ai auala na toetoe lava pe nai inisi lava, e o lava taavale i luga o le auala, a o la e foi e feoi tagata e leai se mea i tafatafa o le tafatafa o le auala, e lava lea mo le savaliga o tagata. E talitonu e avatu ai le matou faafetai. Na pau lava o le fautuaga i le itu lea, e i ai vaega o galuega e fai i le pogisa. E i ai vaega o auala e fai i le taimi lena, ae o le fautuaga, ia lava faailoilo, o le matou vaai, o le lamatia ia o auauna a le atunuu o lo o faatinoa ia galuega i taimi ia. E talitonu lava i la matou vaai, na ona matou logo atu pea i lau Afioga e ala atu i le Nofoa e tusa ai ma ia puipuiga. E lelei lava le puipuia i lo le tau togafitia. Ia o nai faafetai na e avatu i lau Afioga i le Minisita. Faafetai e i ai foi isi auala e le o o foi i ai lau faasoa, ou te talitonu toetiiti. E i ai le auala lea i Moamoa, e tóatele nisi sa alaala i Sogi ma isi vaega faapena o le atunuu, ua siitia i uta, ua latou nofoia ia vaega o le elelee, a o auala, o mea faigofie ia mo le feoi i taavale, aemaise foi ua fai ai a latou faatoaga. Ia o nai talosaga ia e tuuina atu i lau Afioga pe tau ane ai pe ua lata ane i ai lau faasoa, ona faapena lea ona faatino mo lea foi vaega o le atunuu. E momoli atu ai lau faafetai tele e ala atu i le Nofoa.

Ma ou te soso mai i le Matagaluega lea o le Siosiomaga lau Afioga i le Fofoga Fetalai, ou te fia tautala i ai i nai vaega e tuualalo i le tatou Matagaluega lea. Ou te talitonu o se Matagaluega ua tele ona tiute ma matafaioi o lo o feagai, e i ai foi luitau o lo o feagai ma le tatou Matagaluega aua foi le faatonutonuina ma le taumafai e limataitaiina si o tatou atunuu i mea e ao ona faatulaga ina ia tusa ai ma le tulafono, e pei o le fausia o fale, faapena foi atinae i mea tau le aiga, e faapena foi pisinisi ma tulaga maota ma tulaga o falefaigaluega, o mea uma faapenei. Ma e i ai le matou tuualalo e pei o le matou vaai mamao, o lo o televave pea le atinae o Samoa i le faaatinaeina o pisinisi e faapena foi le televave o le fausia o falefaigaluega, aemaise lava le talafatai i Apia. Ou te talitonu foi, e ao ona silasila totoa i ai le tatou Malo i lau Afioga i le Fofoga Fetalai i lena foi matafaioi a le Matagaluega lea i le faatulagaina po o le vaevaeina o tulaga e ao ona faatino ai nei atinae, nei faletetele. Aua ua outou silasila foi i ai, ua tupu olaola le atunuu. O aso ia, e pei e o faatasi, a o le taimi lena, pei ua matou vaai ua

tatau ona faanatinati se galuega e mafai ai ona faatino le zoning o areas, aemaise lava a outou silasila foi i ai, e pei o le mea lea e tupu mai i le atinae o tagata tafafao maimoa mai. Se i silasila foi i Apia latou, e faigata lava ona tutu faatasi fale inisinia, o ni fale pau, o ni fale gaosi mea, e fefiloi faatasi ma ni atinae o lo o i ai tagata tafafao maimoa mai fafo. Ma ou te talosaga atu ai e ala atu i le Nofoa.....

FOFOGA FETALAI: Malie le sui usufono o lo o saunoa se i tuu atu le avanoa i le Minisita mo le Siosiomaga se i saunoa faamalamalama. Tulai mai lau Afioga i le Minisita.

Afioga Hon Faamoetaulua Ulaitino Faale Tumaalii: Lau Afioga i le Fofoga Fetalai, e faafetai atu. E leai lava se agaga ia te au e faalavelave a o saunoa le sui usufono mamalu. Ae mo le tulaga ina ia faamalamalama, o lea ua amata le mea lea o le zoning o areas, ma o le la ua amata i Vaitele le tulaga lena, ma o lo o ua faasolosolo mai i totonu o le taulaga le tulaga lea o le vaevaeina o areas nei e i ai pisinisi eseese e pei ona saunoa i ai le sui usufono mamalu. Ma lou faaaloalo lava.

FOFOGA FETALAI: Malo faafetai. Ou te manatu ua malamalama le faafesili a le sui usufono mamalu. Ia tulai mai le sui usufono e faaauau le saunoaga.

Afioga MAUALAIVAO PAT AH HIM: Faafetai i lau Afioga i le Fofoga Fetalai, e malamalama gofie lava le sui usufono, ua faamuta atu ai foi i i lau talanoa i lea vaega o le a le toe faalauaitetea. Ou te talitonu lava ou te o o i ai i se taimi pe a ou o o i le Minisita mo Tagata Maimoa Mai Fafo. Ma ou te faafetai foi i le Afioga i le Minisita mo Aoga.....

Afioga Hon Palusalua Faapo II: Lau Afioga i le Fofoga Fetalai, o se mea lava e fia malamalama ai.

FOFOGA FETALAI: Malie le sui usufono mamalu o lo o saunoa se i tuu atu lava le avanoa i le Afioga i le Taitai o le Itu Agai.

Afioga Hon Palusalua Faapo II: Leaga e taua tele le mataupu lea, aemaise lava le fefiloi o maota ma falefaigaluega, e faapena ma falesa. O lea la ua saunoa i ai le sui usufono, ona o lea lava e i ai le feteenai e pei ona tatou vaaia i le faaiuga o le faamasinoga, o lea e aafia ai le faletalimalo, aemaise o se maota tapuai. O le tulaga la lena, ona e taua tele, aua o lea e afio mai le Minisita o le Siosiomaga.

FOFOGA FETALAI: O lea ua maua lau Afioga i le Taitai o le Itu Agai. O lea ua maua le atugaluga lau Afioga i le Taitai o le Itu Agai.

Afioga Hon Palusalua Faapo II: E pei o le mea lena o lea ou te tulai atu ai, po o le a se faamaninoga a le Afioga i le Minisita.

FOFOGA FETALAI: O lea ua uma. A lea ua uma ona faamanino mai malie lau Afioga o lea ua ou tali vave atu, o lea ua ou maua lau mataupu. O

lea ua ou maua tonu lava le mea lea e te atugalua i ai. O lea ua saunoa malamalama le Minisita, ua amata mai i Vaitele le faa-zone ina. O le tali malamalama lena e fua agai i ai le tatou galuega. Ia manatua foi o le tatou taulaga, na tatou alu faasoloatoa e o faatasi mea uma. O lea la ua tulai mai i lenei vaitau ma atugalua ua tulai mai, o lea ua amata mai i Vaitele le faatonutonuina ina ia taatia i lagatonu le atugalua lea ua e saunoa i ai i le mataupu lea na saunoa i ai le sui mamalu. Ia fai lena ma ai, ou te talitonu ua matua malamalama le mataupu mo le tosoa o le tatou Fono. O lea ua malamalama le saunoaga a le Minisita e amata mai i Vaitele, ona faasolo mai ai lea o le faa-zone ina o le taulaga atoa.

Afioga MAUALAIVAO PAT AH HIM: Faafetai. E pei ona matou fai atu e tele lava le mataupu ae ua lava lea. Faafetai i le Afioga i le Minisita ua tali mai, o lea ua amatalia le galuega. Ia o le mea taua lea ua fai, ua amatalia.

FOFOGA FETALAI: Aua e te atugalua i le iuga a le faamasinoga. Afai lava o le tali mai le Atua, o le tali lena, ia onosai le sui usufono o lo o saunoa, ae faaauau le saunoaga, o lea ua tali le Matagaluega e le o tuumamaina lo outou finagalo, ae vaai foi i le aia tatau a nisi o sui o lo o outou nofo tuaoi. Tulai mai le sui mamalu e faaauau le saunoaga.

Afioga MAUALAIVAO PAT AH HIM: Faafetai i lau Afioga i le Fofoga Fetalai. Ou te talitonu foi, o lau tautalaga foi i lenei afiafi, e leai lava ma se mea o afea ai lea vaega. E leai ma se mea e fai mama lava le momoliga o se tuualalo. A o nisi vaega e taua pei ona saunoa lau Afioga faapea foi le Taitai o le Itu Agai, e leai, ou te talitonu lava e moni le saunoaga a lau Afioga i le Fofoga Fetalai. Ia o le a faamuta ai i i lea mataupu ou te le toe o o i ai. Faafetai.

Ae o le a ou soso mai i le Afioga i le Minisita mo Aoga, Taaloga ma Aganuu. E momoli atu lau faafetai i le Afioga i le Minisita, ua matou vaai i suiga i lenei vaitaimi, ua matou le vaai i ni tamaiti talavou, ni tupulaga talavou sa feoi i le taeao po ma tamato, o afitusi. O nei mea faapenei, ua ta fiu e vaavaai, ua seasea. O le mea lea ua ta talitonu ai, the system works, ua mafai ona faatino ma ua taunuu le faamoemoe lelei lea, o le tupulaga ua compulsory le aoga o le fanau, o lea foi ua tali mai matua, e faapena foi le tatou Malo i le amatamea i le vaega lea. O le mea taua la lea, aua o le lumanai lea o Samoa o tupulaga. O lea ua muamua aoga, ona faapena foi lea ona omai ua iloa mea e tatau ona fai. E faafetai puupuu atu ai i lau Afioga i le Minisita o lo o faapena ona nafa aemaise foi o le Matagaluega i aoga ma tulaga ia e mataalia ai, e matauina mai e le atunuu o lo o faapena ona galulue punouai le aufaigaluega i le faatinoina o tiute.

Lau Afioga i le Fofoga Fetalai, o lau Minisita lea o le Soifua Maloloina, ou te le talafulu pe faaviivii ia te ia, ae fai pea sau tala i ai, leaga e tatau ona faaleo i le atunuu lau faafetai i le Afioga i le Minisita aemaise foi le Faauluuluga i le Ofisa Sili o Pulega o le Matagaluega ma auaunaga eseese faafomai. O le mea lea e tau o le galulue faatasi, work together as a team, ioe. A divided e le tau taua mai i ni upu, e vaai i foliga, toetiiti uma le falemai. Ua tau le pisa tagata i le tuai o le vaaiga o mai, ioe, asiasi gasegase o le itupa o alii, itupa o tina faapea le fanau. Na pau lava lau tala, faafetai i le

Matagaluega i le faatinoina ma le lagolago i le Afioga i le Minisita o lea ua manaia le tatou falemai fou toeitiiti maea.

O le a faasao la lou taimi, o le a ou o o atu ia i le Pulega o Tagata Tafafao Maimoa Mai Fafo. Ou te fia tautala laitiiti i ai, ma ou te talitonu, pei ona saunoa le Afioga i le Minisita, e tele naunau galuega a le tatou Malo o lo o faatino ina ia fesoaoani i ai ma tulai mai lea atinae i se tulaga e tata ai. Ou te talitonu o le tele o fautuaga i Shareholders a lea foi industry ia alolofa e le o le pepa tatou te maua ai Malo, aua ne i tatou tau le pua ma lafo mai ae tatou omai i le mea lea e i ai le Puaiaganoa o lo o manogi ai le pua, ia afifio mai tatou te soalaupule ma le Malo it is broken system they can assisted anything aua o i latou ia o le galulue faatasi ae le o le tatou o ma ao mai faasalalaua o le a le tatou mea o le a maua ai. Ia faamolemole e omai tatou tutu faatasi ae tatou – e fofo lava e tatou, e ala ona faaletonu o le tatou le nofo lava o i tatou ma fofo.

O le mea lea sa ou fia taua i le Matagaluega mo Punaoa Faalenatura ma le Siosiomaga, i le faatulagaina o mea e tutu ai atinae nei ma isi ituaiga atinae. A outou silasila foi i beach fales o luga lava matafaga e faasaga i le sami o mea na e tau o beach fales. O ia ituaiga atinae e ese le moomia e tagata asiasi maimoa mai fafo, aisea? E ola ai ma maua le savili malu, o le ala foi lena o lo matou talitonuga o le atinae lea sometimes it base on a location po o le mea e tu ai, e ala ona ou naunau atu ina ia faasao le nofoaga o lo o feagai ma le sami le water front, aisea? A outou silasila ma tatou matamata i atunuu i fafo pe a tatou faimalaga o le a la outou silasila, ua na o fale talimalo, fale talimalo ae tumu aisea? O mea ia e agai i ai i latou o lo o asiasi maimoa mai fafo. E i ai foi malo i faletalimalo, e tagi mai e fia ia vaeatu lava le paia o le Maota, na o le fia fufulu lava o matou vae i le sami ioe. Ou fai atu ta o i Mulinuu leaga o lea e leai se mea koso vaa e te savali ai i lalo a le o lena o le a ou alu e asu mai se sami e fufulu ai ou aao. O mea faapenei e pei ona matou fai atu o le tasi lea mea e foia ai le upu lea i le atinae o le graces. E silasila mamao foi e o le a faatinoina lea vaega i le location because o isi ituaiga pisinisi e mafai ona tutu i so o se mea ae maua lava le current help. A o le ituaiga pisinisi e faapitoa lava le mea e tu ai ona mafai lea ona faatosina. O le tasi lena auala e ao ai ona more tagata asiasi maimoa mai fafo. O le ala lena o lou naunau atu pe mafai ona faasoa ae faafetai tele lava o lea ua tali manino mai le Afioga i le Minisita, ou te talitonu e tele lava nisi galuega a le Malo e mafai ona fesoasoani ai.

Lau Afioga i le Fofoga Fetalai,

FOFOGA FETALAI: E malie lava le sui usufono o lo o saunoa se i tuu atu le avanoa i le sui usufono mo Alataua Sisifo.

Afioga Lafaitale Patrick Leiataualesa (Alataua Sisifo): Lau Afioga i le Fofoga Fetalai, e leai se agaga e fia faalavelave i le saunoaga matagofie a le sui usufono, ae ua ou tulai atu e faatu le lafo, *Ina ia faaopoopo se isi afa itula o le sui usufono ua manaia tele lana saunoaga.*

E le i faaluaina le lafo.

FOFOGA FETALAI: Ou te manatu e le o toe manaomia se afa itula o lea ua faaii mai le saunoaga a le sui usufono. Tulai mai le sui usufono , o le ava

tele o le sui usufono mo Alataua Sisifo i le lua va nonofo aua e masani foi ona fai lana tab i lau bar, ae tulai mai e faaiu le saunoaga.

Afioga MAUALAIVAO PAT AH HIM: Faafetai o lea ou tulai atu ma le faaaloalo ou te tautala lava au ia Samoa atoa po o le a so matou sao e ave mo le atunuu. Ou te talitonu e tele foi se galuega ma le sao a le Malo o lo o totoe e faatino ina ia mafai ai ona maua le sini o le faamoemoe o le atinae o le Malo e ala i tagata asiasi maimoa mai fafo aua lo tatou agai atu i le lumanai ina ia faatosina mai tagata asiasi maimoa mai fafo. Ou te talitonu a faaleleia a tatou malae vaalele i se tulaga e more International e faigofie ai ona omai a tatou vaalele ma toatele ai tagata asiasi maimoa mai fafo.

O lona lua e i ai lava e vaatuia ai lava nisi o tagata asiasi maimoa mai fafo aua e toatele ina savavali e tafafao, e le mafai ona nofonofo i potu ae fia matamata i le matagofie o Samoa ae savavali atu vae atu lava le paia o le Maota, e mau ai lava le taifau o lo o tafao i le auala e toe foi ai lava le tagata asiasi maimoa mai fafo i le fale ma toe oso i le vaalele Auckland loa. E tatau ona fai se faiga e faamate ai e lamatia ma faaleaga ai le tatou atinae o tagata asiasi maimoa mai fafo. O lau toe upu faamolemole a tatou faletalimalo e le faigofie foi la outou galuega, e le o toe taugofie foi e oo lava i fua o faatoaga pe a outou silasila i ai i le taimi na oo mai ai Eveni, e omai malo mai fafo e fia taumamafa i fua o faatoaga aemaise o le fua o le esi. O le a le tau o le esi sa i ai? E \$9 i le esi e tasi, o le mea lenei ou te fautuaina ai le Matagaluega o Faatoaga ma le Faleoloa o Faatoaga ina ia vaai i nei fua o faatoaga e tatau ona atiae lelei aisea, aua ua amata ona taugata. Faafetai amata ona toe taumamafa le atunuu i fa'i, ua tele le talo, fai, ua le motu le fuata i ulu...

FOFOGA FETALAI: Ua maea le taimi o le sui usufono, faaiu mai le saunoaga.

Afioga MAUALAIVAO PAT AH HIM: Faafetai, e pei ua tau see ese foi le lauga ona ua – faapea au ua talia le lafo lea ae leai. O lau fautuaga ia outou Afioga i Minisita, ia alolofa e fai lelei matou lea i o outou tua e faapena lava ona matou tagi atu ma outou tali mai, o outou lava e pei e ese ai foliga o Matagaluega pe a matou o atu, ae leai e tasi ae foi atu sa matou tala ae na ona faufautua atu ma le lagolagosua atu i le galuega a le Kapeneta. Malo i lau Afioga i le Palemia, faafetai tele mo galuega o lo o faia mo le tatou Malo, ao le agaga lenei ona o lo o tele pea galuega o lo o fia faatino aua le atinae o tagata asiasi maimoa mai fafo e ao lava lona tatou fofo faatasi, e leai lava se poto po o se malamalama, o lenei foi fofo ou te fai atu ai au ao lo o i ai foi nisi tamalii e sili atu la latou fofo. O lea e tatala atu le avanoa e omai tatou galulue faatasi. Male faaaloalo tele, ia manuia tele le tapuaiga a Samoa aemaise o le tatou Maota.

FOFOGA FETALAI: Malo faafetai saunoa i le sui usufono o le sui foi o le Palota Taitoatasi, e le o se tala faapaole leaga a tau loa le tutoatasi o e mai i ma o o lona uiga e soo Samoa i le faatufugaga ma le ma mamalu sauoo. O lea foi ua e fautuaga i le tulaga aloaia o tatou tagata asiasi maimoa mai fafo leaga e le o nit ala faamaene o i ina o lo o i ai le faalagolagomaga a le atunuu. O lea foi ua ou fautua aua le taua le pua ma lafo ae tau ma sei e lelei foi e

faamatagofie ai le atunuu ma le faamoemoe mo tagata asiasi maimoa mai fafo.

Faafetai saunua, malo le fetalai, tulai mai se tasi o sui matua o le Palemene le sui usufono mo Gagaifomauga Nu. 1.

Tofa TUILOA ANETELEA (Gagaifomauga Nu. 1): E le umi, o se mea e faauma ai le kakou Fogo ma faakua malie ai le kakou mafukaga i legei aso ua loaloa foi o kakou maluluiga. Faafekai aku mo le avagoa, o lo o faafogafoga mai Samoa i oga kulaga maualuluga e amaka mai lava i oga ao seia oo lava i oga iu, e oo foi i auauga paia a le Atua o lo o kala faauko i iku e fia o le kakou akuguu, o lo o kapuaia o kakou kiuke ma o kakou faiva.

O le a fai siga au kala laikiiki lava i lou Ikumalo masalo o falolo mai i kuapola pe fai se kala a Au, ia lo kakou Ikumalo o lea laa fai lau kala e faafekai aku ai i la oukou kapuaiga. E kakou ke viia le Atua i mea lelei ma mea silisili ua ga faia mo kakou, o le kele foi o kaimi sa kakou le mafuka ai oga o mai o le kigo e leai se isi e pule, e pule lava le Atua. Afai e faauma, faauma, afai e ola, e ola e le koe alu ese ma le Palemege ae malo kapuai. E faapea foi oga ou faamaise aku i lo kakou guu o Magase i le afioaga o Kaiko ma Aiga faapea foil au Fekalaiga Kauasa oga o le kuua o le Malo i le Susuga i le Alii Faifeau Faatonu o Siueva Gogo, o le Atua ga ia aumaia, o le Atua foi na te toe aveva. Aua kakou ke faagoagoa ae kakou kakalo i le Atua ia mou se koa ae koe kulai mai se isi koa o le Talalelei a le Atua lakou ke semasemaiga gi magu aua lo kakou guu. Ia faapega ona faamaise i le nofo a alo aemaise o le Ekalesia. O gai mea e fia faamagaku e le o se isi pito i le kakou mafukaga faale-Malo ia oukou Afioga i Migisika o mea e koe faamagaku aku pe kau age ai so oukou figagalo aua o lea ou ke iloa e pule lava Sikafuge i le la o loga vaa. O le Kala Faakakau Auku o le Kupe i le faasoasoaga i Matagaluega kaikasi e lagolagoiga e legei Ikumalo. Faafetai i mea uma a le Malo sa kuu aku i lou guu o mea uma sa oukou gapakia ma kalia mai kalosaga i aso ua alu o la ua kulai mai ma fiafia ai lou guu e pei ua koe maua se kaulaga fou i Savaii e oo i lo makou falemai. Oga pau lava le mea e faukua aku ai i lau Afioga i le Migisika o le Soifua Maloloiga, se i vaai se akuguu e aumai ai gi kui, o kui ia e faaoga e kakou falemai, sole, o au e masagi oga kui lou koko i le fale faamama koko aua ua ou lavea ai foi i le au faamamakoko ou ke le iloa gei mea po o gi gila po o a gei meae le gaka i le kiga ma maigi ae ka ke le fia kilokilo i ai i kui e elea, e le fekau. O le mea e alu i kokogu o le kigo o le kagaka e kakau oga pei o Amerika o le falemai o Amerika e leai se mea faapea ae ga oga faukua aku i le Makagaluega o kigo o kagaka lea e kau ai kui e le o gi ogafai, ua ka fiu, ga ka alu aku ua ka le lava i le kui ae ala oga fai ou ke le fia oki ae ka ke kui koai. O so o se falemai lava ka alu ai i kokogu o Samoa ou ke le iloa po o gi kolopa lea e aumai e le kakou falemai, ae faukua aku se i fogo la oukou Makagaluega e fuafua mai, ga ou alu aku e vaai au i le fale mimiki koko ae kui au ae pasi mai le koko o lou lima oga ou fai aku lea po o ai e kokogia le koko lea ua pasi. O le mea lega e faukua aku ai i lau Afioga i le Migisika o le Soifua Maloloiga, ia lea o le a faakopekope aku leaga o le a laka le po.....

FOFOGA FETALAI: Malie le sui usufono o lo o saunua, se i avatu le avanoa i le Minisita mo le Soifua Maloloina se i faamanino le vala lea e te atugalu i ai i tui. Tulai mai le Afioga i le Minisita.

Afioga Hon Tuitama Talalelei Tuitama: Lau Afioga i le Fofoga Fetalai, o lea ua saunoa manino le sui usufono se i fai sina tala malie. Ia, e lagona foi le puipui i le afaigaluega ma le auaunaga ona o le tulaga i aveseseina i le faafofoga a le atunuu, ona e i ai lava e matau ma faaaoga sese tulaga faapea. A o lea lava tatou te silafia ma malamalama lelei i le uso nei o lo o saunoa, o ana saunoaga masani lava. E i ai le manatu i tulaga ia ua taua ai tui ia ua elea, o se tuuaiga e sili ona matuia, ne i afaina ai, e le mafai ona faaaogaina ni tui ua elea i totonu o le falemai. O tulaga foi i tui ia o lo o faaaoga nei e tui ai le Afioga i le sui usufono, ia manatua foi o le faamama o le toto, e tui mai le toto alu i totonu o le masini e faamama ma toe faafoi mai i totonu o le tino. E le mafai la ona faaaogaina se tamai nila, o nila e masani ona faaaoga e fai ai isi ituaiga tui, o nila e laiti ma e manifinifi ae faigofie ona ulufale i totonu o le pau o le tino ma le aano ma le alatoto. A o nila ia e faaaoga i mea nei o faamamatoto, e fai si lapopoa. A toe faaopoopo atu la i ai ma le fefeu o le pau o le vae, ia ua atili ai ona fai si faigata. O le tulaga lena e fia faamalamalama atu i tulaga ia ma le faaaloalo lava.

FOFOGA FETALAI: Malo. O lea ua maua le faamalamalamaga a le Afioga i le Minisita. Ia se i tulai mai le sui usufono mamalu o lea ua tali lau fesili i atugaluga o nila ia sa e atugalua ai le sui usufono mo Gagaifomauga Nu.1. O lelei lau silasila?

Tofa TUILOA ANETELEA: E faaakaaka a lafoga e i ai lava le kaimi ou ke kuia ai oe. A o le mea sili e le faapea o fai aku o se uiga foi lele, a o le agaga e kalosaga, aua o fomai ia e le kuia. A gasegase e i ai lava a lakou mea faapikoa e faapikoa i o lakou soifua. E le kea aua faapea a sau lava o le gaifi salipopo kui ai, ae faafekai i le Afioga i le Migisika. E leai e le faaleagaiga lau Afioga ma le kou Makagaluga. A o gai magaku e kuu aku e lagolago ai so o se mea.

Lau Afioga i le Migisika o Aoga, e koe kakalo aku lava i lelei kalosaga ga ou kakalo ai a o i ai gisi Migisika ua kuagai aku i le kakou mafukaga, ae ou ke iloa foi, o lau lasi go lelei, ou ke le koe alu i se paloka. Ae ia alofagia e lau Afioga se malae lakapi o si ou ikumalo, ua leva ona savavali ifo nai fagau lakapi ma fai mai ia ke au i so lakou malae, ona ou fai aku lea i kamaiki, ia kapuai aku se i ou alu i Apia pe i ai se malae e aumai e faamalae ai kakou, ae se i ou alu e kalosaga pe maka e kalia mai le kakou kalosaga i gai fagau lakapi. O le agaga lega e le kakou ona kua i kua, ia avaku pea i lau Afioga e faakaiala i lou figagalo lea faamoemoe, e faapea foi le Migisika mo Galuga. O lo o i ai le auala o le sooga o le auala galua ma le nuu lea o Paia, e fesookai auala ia, ou ke kakalo aku, o auala ga fai muamua, a o le kaimi lelei, koeikiiki lava le koe sao ai se kaavale. A o le auala e feoai ai pasi mo kamaiki aoga i kaeao ma afiafi. Ia ua logo mai e gai kagaka i siga fesoasoagi mo le auala lea. O le auala e alu aku lava pasi Paia ae aki i le maka o le afi. Ae a lelei lava foi lega auala, ua faigofie i le makou guu ona fuafuaiga le feoai i guu, e pei la o le guu lea o Paia ma lou guu, e i ai foi mea o fuafuaga faa-Samoa e feafioai ai kagaka e felogogai le ikumalo. Po o le a sou figagalo. Sa i ai le vaikaimi ua fai si leva, na faasee ai e isi sui usufogo au, na o aku makou fekau i le vaa ona ou fesili aku lea po o fea e afifio i ai, ae fai mai e o aku e asi lou auala lea. Ua leva. Ia, o le mea ua kupu, fai mai o lea e o aku e asi, o

lea o le a alu aku le galueaiga, le faiga o lou auala. E le ga se laiga, se i kulou o lou guku ma le afi, ai lava o le mea lea e kau o le faasee e le isi sui usufogo o le isi sui usufogo, fai mai o laua e komiki o Galuega a le Malo. Ona fai mai lea ia ke au e faakali aku. Ona ou alu lea kao le puua ma le faiai fee pei o le fale legei le fee, ae o o mai gei e leai se auala o faia.

Lau Afioga i le Migisika, vaai kagaka gei po o gi komiki moi aua o le kaimi e koe ogoogo aku ai i lou guu, e omai ua leai gi ulu. Ia o le mea lena, aua le faasee e le isi sui usufogo le isi sui usufogo, ae kaumafai e alu i aga faakamalii ma fuafuaga lelei a le Malo e faakauvalea ai guu. E faapea e o aku faakauvalea makou ma saugiugi mai gi fuafuaga. A koe fai, ga oga ou faukua aku i sui usufogo ia, aua aua ge i koe faia, aua a le maua oulua i se ala, e i ai le faga foi lele e 17 pulu, e kuli aku lava oulua i oukou aiga. Ae kaumafai e fai i le vafealoaloai ae aua le faia lena mea o le kaufaasee, e o aku pepelo. E le lelei. O au foi ua fai si makua, a o le o a lima e pu ai le magava o le kagaka pe a lavea. Ia o gai mea ia e logologo aku i legei aso...

Afioga Hon Palusalue Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Ia, malie o lea o le a faaii mai le Taitai o le Itu Agai. Malie lau Afioga i le sui usufono mamalu, se i tuu atu le avanoa i le Taitai o le Itu Agai.

Afioga Hon Palusalue Faapo II: O se mea e fia faamalamalama i le sui usufono o lo o saunoa ona o se mea e tatau ona faasao, aemaise o lau saunoaga ua fai si oooo. O lea foi e faalauaitele le saunoaga a le sui usufono, a o lou talitonuga o la e faalogologo mai itumalo ma taumate po o ai sui usufono ia, ae lelei lava le tau sao o suafa o sui usufono, ina ia aua ne i satia fua le maaveave le fua. Ia o se mea lea e tulai atu ai ma le faaloalo.

FOFOGA FETALAI: O lea ua maua le faauilavea i lau Afioga ma le atugaluga i lau Afioga i le Taitai o le Itu Agai, ae manatu e le o ni... ae o lea o le a faaii mai le saunoaga a le toeaina, o saafiafiga lava o le faaiiuga o le tatou po lea na mafua ai ona tuu pea e le Nofoa se i uma mai lana agiagi ona faauma ai lea o le tatou Fono.

Tulai mai le sui usufono mamalu e faaii mai le saunoaga.

Tofa TUILOA ANETELEA: Leaga le mea leaga o le mea o le oso a Popa. O oukou silafia le kagaka e igoa ia Popa, ga kae le ulu i le osovale ona alu aku lea ua le faia se mea i luga, ae alu aku maua leaga e kae ai le ulu, ua gofo lava ia ma faakae loga ulu.

Lau Afioga i le...

Afioga Hon Palusalue Faapo II: Lau Afioga i le Fofoga Fetalai, o ituaiga saunoaga la nei tuulafoai ma le faavalevarea. A o upu ia e aumai, leaga e tatau ona saunoa sao, a o lea la ua aumai upu le mafaufau.

FOFOGA FETALAI: O lena ua ou tuu atua le avanoa muamua lau Afioga i le Taitai o le Itu Agai.

Afioga Hon Palusalue Faapo II: Lau Afioga, se i faatonu le sui usufono. O lea ua ou faaaloalo i ai leaga o le tagata matua ae ua ova le le mafaufau ma le faavalevatea.

FOFOGA FETALAI: A lea ua uma ona ou faamalamalama atua i lau Afioga. Tulai mai le sui usufono mamalu.

Tofa TUILOA ANETELEA: E ke le faakogua au, na o au ou te faakogua oe. A ou fai atu loa e ke alu i fafo ona e alu loa e ke faakali mai ka ke fekau ai. A e fia velovelo, ka velovelo. Pe e ke lapoa, e ke pae lava ia au.

FOFOGA FETALAI: Malie ia le sui usufono o lo o saunoa, o lea ua toe tolu minute uma le tatou Fono. Ia faaii maia le saunoaga.

Tofa TUILOA ANETELEA: E leai se mea o le a kau aku ai fua kagaka. A kau aku gei la o sui o le lakou iku, o le a la lau mea e fai? E akili ai ona o ese ga kagaka.

FOFOGA FETALAI: Faaii maia le saunoaga le sui usufono mo Gagaifomauga Nu.1, alofa mai ma amanaia le talosaga atu a le Nofoa, o lea ua tini tauao saunoaga ma fetalaiaga e faaiuiu le tatou Fono.

Tofa TUILOA ANETELEA: O lea o le a sese le upu o le faamalu. A kau le upu o le faamalu ia o le ako alaala. E faamalulu aku i lau Afioga i le Fofoga Fekalai. Afai foi o a ni upu ua sala i le kakou mafukaga i lelei aso ma le kaikai, e faamalulu aku ai, e leai se mea e aafia ai o oukou figagalalo. Aua a ou fai aku gei o sui usufogo o le kou iku, e popoe ai le kaofi. Ou ke le fia kaukala e kau gi igoa, ae silafia e le sui usufogo mea na latou faia.

Afioga Hon Palusalue Faapo II: Lau Afioga i le Fofoga Fetalai, e le asiasi ni sui usufono o le Itu leneni. O tuuaiga la e aumai e le lelei. O le a la le mea e le saunoa sao ai i sui usufono na faavalea oe?

Tofa TUILOA ANETELEA: Ia, o lea la o le a ou fai aku, o le sui usufogo mo Saleaula ma le alii lea o i kala mai o le malae vaalele. O Koeolesulusulu. E a? E gaga la e a? E gaga o sau fagau? Fai i au kama e o aku e susu.

FOFOGA FETALAI: Malie le sui usufono, o lea lava... o le manumanuga.....

Afioga Hon Palusalue Faapo II: Lau Afioga ma le faaaloalo lava, e tatau ona aumai ni faamaoniga i totonu o tuuaiga ia, leaga e le o i i Saleaula. Ia malie ia leaga o si toaina ua mai.

FOFOGA FETALAI: Malie ia lau Afioga i le Taitai o le Itu Agai, malie o lea na ou piiama atu lava.

Tofa TUILOA ANETELEA: E le o mai, a mai o le alu o lima e pei o le moamoa? Ia ma le sui usufono mo Saleaula. Ia o le a le mea o le a aumai ua uma ona ai le puaa? O mea na e aumai e faamaonia ai tatou mea? O le a ai ai

le puaa ona fai mai lea e o atu faavalea au? Ia fai i au sui e omai e o i fafo. Ia e faamalulu atu. Tatou faamalulu.

FOFOGA FETALAI: Le sui usufono mo Gagaemauga, ia faaiu mai lau lauga i lau faafetai i le Malo i le tatou falemai mo le sao o le tatou Malo.

Tofa TUILOA ANETELEA: Ou te faafetai aku i lau Afioga i le Palemia, le Kapeneka ma le mamalu o la outou mafukaga faa-Minisita, i mea uma lava o le makou ikumalo na oukou fausia ona o le alofa, e leai lava se isi e maua ai le agakogu ma le sao, ga o le Akua. Alofagia e le Akua aua a ou fai aku gei o oe o le kama e ke igaiga, a ou fai aku o le auauga a le Alii, e ke fiafia. Faafekai i le kou auaugaga na oukou kuuina mai mo le makou falemai, ma mea uma sa oukou gaosia oga o lelei ikumalo. E leai se kaui, po o se alio po o se maakaua ae makou ke kakalo i le Akua ia alofagia ia maua pea lo oukou lagimama ma le lagisoifua, maua la oukou faaukukaga ma le moe aua Samoa ma ona upufai i gisi gofoaiga o sosoo mai. A o le makou galuega o lo o fai, leaga o lea ua fai mai o lea ou ke mai. E leai, o lea e kakui au e le falemai. O lea e fesoasoani mai kui a le falemai i lau kama lea le Migisika o le Soifua Maloloina. A o mea uma lava o le kakou mafukaga i lelei kaeao ga liugalua, e faamalulu aku foi i ni upu ua fesasiai, o uiga lava ia o Samoa ma aga upufai, e fesasiai lava ae makua i le oo. O a foi ni fekaliaiga o lelei aso ma le makou kalagoa aku, ia alofagia ia malu ave i fale i la oukou faafogafoga mai aemaise foi le faafogafoga a Samoa. A i ai se upu ua lape pe masei i la oukou faafogafoga, ia faamagalo le auauga ua sau foi le makua. Ua ova kausaga ga ola ai, koe pau lelei o le gofoaiga. Ae kiga lava ona fai mai ou ke le koe sau, ou ke koe sau foi, kusa e sau mai ai pea. E lelei lava le mai i le fale foga, e lelei lava le vaai mai o kagaka ua oki, momogo i le fale fonu. Ia, faafekai i le Akua ua kakou maua lelei aso fou ma lenei mafukaga. Ia maguia lau Afioga i le Fofoga Fekalai, ia maua sou makagu aua Samoa ma aga upufai. Ia maguia le kakou aso.

FOFOGA FETALAI: Malo saunoa i le saunoaga ua taumuli ai lenei aso ma le tatou faamoemoe i lau Afioga i le tama matua le sui usufono mo Gagaifomauga Nu.1. Ia aua ia le alo lau foe ma faanape, o lo o malolosi lava o ma tauau ma le sui usufono mo Gagaifomauga Nu.2 e amo oe. Aua e te popole, e faaalu lava le tatou galuega, po o fea e agai i ai, ia maua lou soifua manuia. O le aoga lena o le auaunaga faa-soifua maloloina e faapoopo ai aso o e ua gasegase ae tatou tatalo i le Atua ia faafoi lou malosi.

E manatu ua tatou taunuu i le taunuuga o le tatou galuega i lenei aso. E momoli atu ai le agaga faafetai tele i le paia ma le mamalu maualuga o le tatou usugafono i lenei aso ma le tatou uluai Fonu o le aso muamua. E momoli atu le faafetai tele i saunoaga ma malelega ma tuleiga o lenei aso. E talitonu ua logo faatutuila le Maota, ma ua logomalie i le faafogaga a le Maota aemaise foi o le tapuaiga a le tatou atunuu. O le agaga ma le faamoemoe, o lea ua toaiva sui usufono ua saunoa. O le agaga ma le faamoemoe ia tatou tulitulumatagau le ufi a Sina i le aso a taeao. O le a fetuunai pea i le vaai ma le tilotilo i le aso a taeao ona faapena lea ona fetuunai le tatou taimi manava ma le taimi malolo, a o le agaga ma le faamoemoe, e tatau ona papaaveloa le tatou galuega. Faafetai atu i lau Afioga i le Palemia aemaise lau Kapeneta mamalu mo le tauavagameaina o lenei aso.

Malo foi le onosai i le taumafai e tali mai ma faamalamalama atugaluga i tuleiga ma saunoaga a sui usufono mamalu, aemaise o mea sa laga i lauga.

E momoli atu foi le agaga faamalulu i taualumaga o le faafoeina o le tatou Fonotaga i lenei aso i sui usufono mamalu na sausaunoa, e leai se isi e i ai sona atoatoa. O le agaga ma le faamoemoe, ia soo le fau ma le fau i le tatou galuega ina ia mafai ona soalaupule ma taatia i lagatonu tulaga uma o felafolafoaiga. Ae i ai le faamoemoe, e le mafai ona faagaloina le tapuaiga a si o tatou atunuu. Samoa e, ia e lagona pea le mafanafana ma le o o mai o la outou tapuaiga i le pule mamalu a alii ma faipule i ona tupu ma ona ee ma faleupolu o Samoa, ia mau pea le toovae ma fili mai la outou afa aua le faalagamaea a le atunuu o lo o matou alofaiva. Ou te manatu o le taimi e lelei ai la outou malologa o le po, matou te galulue pea aua le manuia o si o tatou atunuu. I le tapuaiga mau i le au nofo tatalo ma le itulagi i tamasa a le atunuu i faafeagaiga taulagi, ia aua ne i tuuaunoaina la outou tatalo e le aunoa aua se manuia o lenei Maota. O le a tatou taupule i le aso a taeao ina ia taitai i ai lo tatou soifua manuia. Le paia ma le mamalu maua o le tatou Maota, o ni upu ma ni tala, o a taualumaga o lenei aso, ia ola le faugagana.

A o le i faaiuina le tatou Fonotaga i lenei afiafi, ou te tatalo atu i lau Afioga i le Sao Faapito, lau Afioga i le Tamaitai e tasi o le Kapeneta e te saunia se tatou tatalo faaiu ona tolopo ai lea o le tatou Fono.

Tatalo.

Na tolopo Taualumaga a le Fono Aoao i le itula e 7:03 i le po seia aulia le itula e 9:00 i le taeao o le Aso Lulu, 19 Iuni 2013.